

De'en Gwso'on Apostol Ca'

Jeso'osən' bene' lyebe
sele'e Spirit che Diozən'

1 ¹⁻²Teofilo dao', ca' naquə
libr de'en bzoja' de'e nech,
bzoja' che yoguə'əlo' de'e güen
de'e ben Jeso'osən' na' de'en bsed
blo'ine' dezd catə'an gwzolaogüe'
bsed blo'ine' xte catə'an beyepe'
yoban'. Žlac bsed blo'ine'enə'
gwleje' apostol che' ca' na' len
yelə' chnabia' che Spirit che
Diozən' bene' mendad naquən'
so'one'. ³Nach gwde gwso'ot
benə' Jeso'osən', jəyeloe' laogüe'
apostol che' ca'. Na' de'e zan de'e
bene' par niç gosə'əneze' de
que mbancze'lenə', na' gwdalene'
lega'aque' choa ža na' bzejni'ine'
lega'aque' can' chene'e Diozən'
nabi'e benə' so'e latjə.

⁴Na' žlac ne'e zo Jeso'osən' len
apostol che' ca' bene' mendad cui
yesyə'əžaše' syoda Jerosalennə'
lgüegwzə. Gože' lega'aque'
yesyə'əga'ane' yesə'əbeze' xte
catə'an baçh goc can' ben Xē'
Diozən' lyebe gaquə, ca de'en
bzejni'ine' lega'aque'. ⁵Jeso'osən'
goze'e lega'aque': —De'e zaque'enə'
ca naquə Juannə' bchoe' benə' nis,
pero entr yeto çhopə ža, nada' gona'

par niç gaquə to de'e zaquə'əche,
gona' par niç yedəso Spirit che
Diozən' lo'o yichjla'azda'olen'
nabi'an le'e.

Jeso'osən' beyepe' yoban'

⁶Na' catə' bazjəndopə zjənžague'
len Jeso'osən' gwse'ene': —Xanto'
žəbabžin ža gono' ca yeçoj nasyon
Izrael chechon' xni'a benə' zitə' ca'?

⁷Jeso'osən' gože' lega'aque': —
Bito naquən par niç le'e ənezele
bi ža bi orən' gon Xacho Diozən'
de'e ca' babži'e bia' gone'. ⁸Pero
na' catə' yedəso Spirit che'lenə' len
le'e, gaquəlenən le'e len yelə' guac
che'lenə' par niç güe'ele xtiža'anə'
syoda Jerosalen nga, na' doxen ga
mbane Jodean', na' Samaritan' na'
doxenlə lao yežlyon'.

⁹Beyož gwna Jeso'osən' ca',
lao chəsə'əgüiia disipl che' ca' le'
beyepe' yoban' to lo'o bejw na'
bitoch besə'əle'ine' le'. ¹⁰Na' ne'e
chəsə'əgüiichgua disipl che' ca' le'e
yoban' gan' besə'əle'ine' beyepe',
catə'əczla gwsa'acbe'ine' bazjəzecha
çhopə angl len lega'aque' benə'
zjənyaz lachə' šyiš. ¹¹Na' benə' ca'
çhopə gwse'e lega'aque': —Benə'
Galilea, žbixçhen' chgüiiale le'e
yoban'? Catezəczən' ble'ile beyep

Jeso'os nga yoban' catə'ən bechoje' ladjwlen', ca'atezəczən' le'ile yide' de'e yoblə.

Gosə'əbeje' Matias par gague' apostol Igua'a Jodən'

¹²Nach besa'aque' ya'a de'en nzi' ya'a Olibos jəya'aque' Jerosalennə', na' naquə galə'əzə Jerosalennə' to catə'ətə'ən de lsens sa'aque' ža dezcanzən' segon costombr che beṇə' Izrael ca'. ¹³Na' catə' besə'əžine' Jerosalennə' apostol ca' šnej na' beṇə' ca' zjənžague' besyə'əgüie' gan' nite'enə' lo'o cuartən' zo žcuia la'alə. Apostol ca' šnej beṇə' quinga: Bedən', Jacobən', Juannə', Ndresən', na' Lipən', Tomasən', Bartolomen', Mtion' na' Jacob xi'iq Alfeo, na' Simon ben' chon txen len partid de'en nzi' Cananista, na' Jodasən' beṇə' bišə' Jacobən'. ¹⁴Yoguə' ža gwnitə'ətezə gwnitə' apostol ca' šnej gwso'one' orasyon txen len beṇə' ca' zjənaquə bišə' Jeso'osən' na' len Maria xna' Jeso'osən' na' len yeziquə'əchlə no'ol ca' zjənžague'.

¹⁵Na' ca tyemp na' Bedən' gwzeche' ladjo to gueyoa galjə beṇə' ljuežj chio'o chonlilazə'əcho Jesocristən' par be'elene' lega'aque' dižə'ən, na' gože' lega'aque': ¹⁶— Beṇə' bišə', Spirit che Diozən' benən' par nič de'e Rei Dabin' bzoje' na' be'e dižə' che Jodən' ben' gwche'e beṇə' ca' gosə'əzen Jeso'osən' gan' jesə'əšague'ene'. Na' benən' byen goc complir can' nyoj Xtižə' Diozən' che'. ¹⁷Jodən' goque' txen len neto' apostol, na' bene' txen len neto' yoguə'əloł de'en gwyo'o lao na'ato' bento'. ¹⁸Na' Jodən' gwxi'e

to pedas yežlyo len laxjue' de'en gwxi'e par de'e malən' bene' bdie' Jeso'osən' lao na' beṇə' ca'. Pero na' bexope' gan' golə'ədite'enə' na' gošj le'enə' na' doxen xjlo'enə' bchoj. ¹⁹Yoguə'əloł beṇə' ža' Jerosalennə' gosə'ənezene' can' goc che'enə' na' de'e na'anə' bosə'əsi'e yežlyon' Aseldama na' xtižə'əga'aque'enə' zeje dižə' yežlyo chen. ²⁰Na' de'en gwso'one' ca' goc can' nyoj to Salmo nan:

Liže'enə' gaguən to yo'o daš,
notono no so' na'.

Na' leczə nyojən nan:

Na' te beṇə' yoblə gwłane'
xlatje'enə'.

²¹Na' nitə' beṇə' entr chio'o nga beṇə' bagwso'on txen len chio'o bedote lao gwɔdalen Xancho Jeso'osən' chio'o. ²²Bagwso'one' txen dezd catə' de'e Juannə' bchoe' le' nis xte catə'ən beyepe' yoban', na' cheyałə' cuejcho toe' gone' txen len neto' apostol güe'eto' dižə' can' beban Xancho Jeso'osən' ladjo beṇə' guat ca'.

²³Na' gosə'əbeje' čhopə beṇə', toe' Jwse ben' le Barsabas, na' leczə le' Josto, na' ben' yeto Matias. ²⁴⁻²⁵Nach gwso'one' orasyon gwse'e Diozən': —Xanto' le' nombi'o yichjla'aždao' yoguə'əloł beṇə'. Entr beṇə' ca' čhopə blo'išguei neto' noe' bagwlejo' par tie' gwłane' xlatjə Jodən' par gague' apostol na' gone' xšino'onə' txen len neto', ca' naquə Jodən' gwlejjyichje' de'en ngo'o lao ne'enə' gone' na' bazjəyede' gabil gan' naquən yeyeje' yelə' güen de'e mal che'enə'.

²⁶Nach gwso'one' rif par gosə'ənezene' non' bagwlej

Diozən' na' Matiasən' bchoje' na' gwso'onene' cuent len apostol ca' šnej.

**Can' goquə catə'an bidə
Spirit che Diozən'**

2 Na' bžin ža lni de'en ne' Pentecostes, na' apostol ca' na' yoguə'əloł beṇə' ca' bagwso'onlilažə' Jesocristən' zjəndopə zjənžague' txen tozə latjə. ²Na' to de repentzə goc to sšag le'e yoban' ca sšag che to be' bdon' gual na' nenxejə lo'o yo'o gan' zjəchi'enə'. ³Na' besə'əle'ine' to de'en naquə ca yi' beł na' bžinte latə' güejə de'enə' chalə'ənin gan' zjəchi' to toe'. ⁴Ca' goquə bedənabia' Spirit che Diozən' yichjla'aždao' to toe', na' Spiritən' benən par nič gosə'əzolaogüe' gwso'e gwde gwdeł dižə' de'e gwse'ejni'i beṇə' zitə' ca'.

⁵Na' ca tyempən' beṇə' zan beṇə' Izrael ca' ža' Jerosalennə' beṇə' chso'elao' Diozən', za'aque' zan yež yoblə lao yežlyon'. ⁶Na' catə' gwse'enene' sšaguən' de'en goquə lo'o yo'o gan' ža' apostol ca', zan beṇə' Izrael ca' besə'əžague', na' lechguale besyə'əbanene' čhedə' to toe' gwse'enene' chso'e beṇə' ca' chso'onlilažə' Jesocristən' dižə' de'e chəsə'əne to toe'. ⁷Bito gwse'ejni'ine' bin' chac na' besyə'əbanene', gosə'əne': —žEcaguə beṇə' Galilea beṇə' quinga chso'e dižə'anə'? ⁸žNactecxa chaquən' to tocho chenecho chso'e dižə' can' chso'e beṇə' gwlaž checho ca' dižə'? ⁹Balcho naccho beṇə' Partia na' balcho beṇə' Media, na' balcho beṇə' Elam, na' balcho

beṇə' Mesopotamia. Na' yebałcho beṇə' Jodea, na' yebałcho beṇə' Capadosia, yebałcho beṇə' Ponto, yebałcho beṇə' Asia, ¹⁰yebałcho beṇə' Frigia na' beṇə' Panfilia, na' yebałcho beṇə' Egipto, na' yebałcho za'acho yež Africa ca' de'en zjəchi' delant Sirene. Na' entr chio'lo za'acho Roman' balcho goljcho naccho beṇə' Izrael na' yebałcho ben cuincho beṇə' Izrael. ¹¹Na' balcho naccho beṇə' Creta na' beṇə' Arabia. Na' gatə'ətezə beṇə' naccho, yoguə'əcho chenecho chso'e beṇə' Galilea quinga xtižə'əchon' de'en chaccho, chso'e dižə' che de'e zan de'e baben Diozən' de'e zaquə' yebanecho.

¹²Na' yoguə' beṇə' ca' besə'ədobə choso'ozenague' besyə'əbanene' na' gwsa'acžejlaže'e che de'en chaquən', na' zane' gosə'əne': —žBi zejen de'e nga chaquən'?

¹³Na' yebałe' gwso'one' borl gosə'əne': —Beṇə' quinga chesə'əzožene'.

**Dižə' de'en be' Bedən' len
beṇə' Izrael ca' besə'əžag**

¹⁴Na' Bedən' gwzeche' lao beṇə' ca' txen len apostol ca' yešnej na' be'e dižə'an zizjo gože' beṇə' ca' zjənžaguən': —Le'e beṇə' Jodea na' notə'ətezəchle zole Jerosalennə', che'enda' gwzenagle chia' na' gonle xbab che de'en ze'e nia' le'e. ¹⁵Beṇə' ljuējja' quinga bito chəsə'əzožene' can' chaquele, la' ne'e naquə tempran. ¹⁶Bachac can' bzoj de'e profet Joelən' ben' be' xtižə' Diozən' cana', bzoje' de'en gwna Diozən', nan:

¹⁷Catə' bazon əžin tyemp par šo'o fin che yežlyon'

nada' Dioz gona' par niç Spirit
 chia'anə'
 yedəson len beṇə' ža' doxen lao
 yežlyon'.
 Na' gona' par niç xi'inle ca'
 so'e xtiža'anə'
 na' beṇə' byo xcuidə' ca'
 yesə'ələ'idaogü'e'ene'
 bi de'en gona' par
 yesə'ələ'idaogü'e'ene',
 na' güe'elena' beṇə' byo
 golə ca' dižə' lao bišgal
 çhega'aque'enə'.

¹⁸ Na' yoguə' beṇə' ca' chso'on
 xšina'anə' la'anə' beṇə' byo
 o la'anə' no'olə, yedəso Spirit
 chia'anə' len lega'aque' par
 niç so'e xtiža'anə'.

¹⁹ Gona' par niç gaquə de'en cui
 nonə' le'i le'e yoban' na' lao
 yežlyon'.
 Gwlo'a yełə' guac chia'anə' len
 chen, len yi' na' len žen de'en
 naquə ca bejw.

²⁰ Cuich əgwse'eni' bgüižən',
 nach bio'onə' yeyaquən xna ca
 color çhe chen antslə ze'e əžin
 ža yida' de'e yoblə
 par çhoglaogua'an çhe
 yoguə'əloł beṇə' šə non' napə
 dolə', nadan' naca' Xanle.
 Gaquən to ža žialao xen,
 na' gwlo'a yełə' guac xen
 chia'anə'.

²¹ Na' gaquə de que notə'ətezə beṇə'
 yesə'əṇab goclen laogua',
 nada' naca' Xanle gona' par niç
 cui žjəya'aque' lao yi' gabil.
 Can' gwna Diozən' na' bzoj de'e
 profet Joelən' len, ben' be' xtižə'
 Diozən' cana'.

²² Na' le'e beṇə' Izrael gwlaž
 chia', legwzenag chia'. Ca naquə

Jeso'osən' ben' naquə beṇə'
 Nasaretən', Diozən' blo'ine' le'e
 de que naque' beṇə' zaque'e.
 Diozən' bene' par niç Jeso'osən'
 bene' miłagr na' bichlə de'e
 zaquə' yebanecho par ble'ile, can'
 nezczenə'. ²³ Lao yełə' neze
 çhe Diozən' bin' ze'e gaquə çhe
 Jeso'osən', bsi'e xneze par niç
 Jodən' benene' lao na'alən' na'
 beṇle par niç beṇə' mal ca'
 gwso'ote'ene' boso'ode'ene' le'e
 yag corozən'. ²⁴ Pero na' Diozən'
 bolis bosbane'ene' ladjo beṇə' guat
 ca', çhedə' bito gwzoi yełə' gotən'
 nabia'an le'. ²⁵ Quinga bzoj de'e Rei
 Dabin' xtižə' Jeso'osən' gan' nyoj
 Xtižə' Diozən' nan:

Nezda' de que Xana' Diozən' zoe'
 len nada' do tyempte
 na' chaclene' nada' par niç cui
 bi chžeba'.

²⁶ De'e na'anə' zoa' mbalaz na'
 cho'a dižə' can' chebeida'
 na' nezda' yolis yosbane' nada'
 ladjo beṇə' guat ca' catə'
 bagota'.

²⁷ Dioz chia' nezda' bito yocua'əno'
 nada' gan' ža' beṇə' guat ca',
 ni que go'lo latjə gožə' cuerp
 chia'anə',
 nadan' naca' Xi'inon' na' naquə
 la'aždaogua'anə' xi'ilažə'.

²⁸ Bablo'ido' nada' naquən' gona'
 par niç əbana' zejlicane
 na' leçgualə mbalaz soa'
 yedote de'en zoleno' nada'.

²⁹ Beṇə' Izrael, nezecho de que
 de'e xaxta'ocho Rei Dabin' gote' na'
 boso'ocuaše'ene'. Na' nombi'acho
 yo'lo de'en zo gan' boso'ocuaše'ene'.

³⁰ Na' de'e Rei Dabin' ža be'e dižə'
 can' bzejni'i Diozən' le' cana'. Gwne'

naquən segor can' ben Diozən'
lyebe de que to beṇə' galjə lao
dia che'enə' nabi'e Izraelən' can'
gwnabia' le'enə'. ³¹Diozən' bene'
par niç de'e Rei Dabin' gwnezene'
can' gaquə na' de'e na'anə' be'e dižə'
che Cristən' ben' babselə' Diozən'
par chaclene' nasyon chechon'.
Gwne' de que Cristən' yebane' na'
bito yega'ane' gan' ža' beṇə' guat
ca' na' nic gožə' cuerp che'enə'.
³²Na'a ža, Diozən' bolis bosbane'
Jeso'osən' ladjo beṇə' guat ca' na'
neto' naquəto' testigw de que beyas
bebane'enə'. ³³Na' Diozən' len yelə'
guac che'ene' bene' par niç beyep
Jeso'osən' gan' zoe'enə' na' chnabi'e
txen len le'. Na' Diozən' bnežjue'ene'
Spirit che'enə' can' bene' lyebe. Na'
Jeso'os na'anə' babene' miłagr nga
de'en babenele na' de'en bable'ile,
babene' par niç zedəso Spiritən'
len neto'. ³⁴Caguə de'e Rei Dabi na'
ben' beyep yoban', sino de'e Dabin'
bzoje' che Jeso'osən' gwne':

Ḳancho Diozən' gože' Ḳana'anə':
“Gwche'edo' cuita' nga nabi'acho
txen,

³⁵na' gona' par niç nitə' de'e ca'
chso'on contr le'
na' beṇə' contr chio' ca'
xni'onə'.”

³⁶Na' yoguə' chio'o beṇə' Izrael
cheyalə' nezecho de'en ngan' che
Jeso'osən' ben' betle bda'alene' le'e
yag corozən'. Diozən' gwleje'ene'
par niç naque' Ḳancho' na' naque'
Cristən', zeje dižə' ben' bsele'e par
chaclene' nasyon chechon'.

Can' gwna Bedən' gože' beṇə'
Izrael ca' zjənžaguən'. ³⁷Na'
catə' beṇə' ca' zjənžaguən'
gwse'enene' xtize'enə' de'e

juisy de'e gwsa'aque'ne' lo'o
la'ažda'oga'aque'enə', nach gwse'e
Bedən' na' apostol ca' yelə': —Beṇə'
gwlaž, žbin' cheyalə' gonto' ža?

³⁸Nach Bedən' gože' lega'aque': —
Cheyalə' yedinjele xtolə'əle ca' par
niç Diozən' yezilixene' chele na'
choale nis par yesə'əneze beṇə' de
que bachonlilažə'əle Jesocristən'.
Nach Diozən' gone' le'e Spirit
che'enə' son lo'o yichjla'ažda'olen'.
³⁹Diozən' gone' notə'ətezle Spirit
che'enə' can' none' lyebe, le'e na'
xi'ine' ca' na' notə'ətezə beṇə' zitə',
la' chnežjue'en yoguə' beṇə' chbeje'
par chsa'aque' xi'ine'.

⁴⁰Nach Bedən' be'elene' lega'aque'
dižə' zan, na' gwneyoine' lega'aque'
gože': —Leyechoj lao de'e malən'
de'en chso'onchgua beṇə' ca' cui
zjənonbia' Diozən'.

⁴¹Ca' goquən' beṇə' ca'
gwse'ejle' che dižə' de'en be'
Bedən' gosə'əchoe' nis. Na'
lao žanə' šona mil beṇə' ca'
gwsa'aque' txen len yeziquə'əchlə
beṇə' bachso'onlilažə'əcze' le'.
⁴²Yogue'e gwnitə'ətezə gwnite'e
gosə'ənaogüe' de'en boso'osed
boso'olo'i apostol ca' lega'aque' na'
gwsa'aque' tozə len yeziquə'əchlə
beṇə' gwsa'onlilažə' Jeso'osən'
na' gwse'ej gwsa'ogüe' txen na'
gwnitə'ətezə gwnite'e gwsa'one'
orasyonṇə' txen.

Can' gwsa'on beṇə' ca'
gwsa'onlilažə' Cristən' de'e neche

⁴³Na' yoguə'əzə beṇə'
besyə'əbanene' can' gwsa'on
apostol ca' miłagr zan len yelə'
guac che Diozən'. ⁴⁴Na' beṇə'

ca' bachso'onlilažə' Jesocristən' gwsa'aque' tozə na' gws'one' tozə yoguə'əlōl de'en zjədeine'. ⁴⁵Na' gws'ote'e byen čhega'aque'enə' na' bichlə de'e ca' zjədeine' na' mech de'en besə'əle'ine' čhein' gosə'əyise'en entr yoguə'əlōlga'aque' segon de'en besə'əyažje to toe'. ⁴⁶Na' tža tža besə'ədoḡə besə'əžague' yo'odao' əblaonə' na' leczə gws'e'ej gwsa'ogüe' txen liž to toga'aque' na' gwnite'e mbalaz na' besyə'əbeine' gws'one' txen. ⁴⁷Gwnitə'ətezə gwnite'e gws'elaogüe'e Diozən'. Na' gwsa'azlažə' beḡə' yeziquə'əchlə can' gws'one'enə'. Na' tža tža Xancho Diozən' bene' par nič gwyanch beḡə' ca' gws'one'lilažə' Jesocristən'.

Besyə'əyone' to beḡə' coj

3 Na' to ža Bedən' na' Juannə' ja'aque' yo'odao' əblaonə' do cheda šonə, or catə' chso'on beḡə' Izrael ca' orasyon segon costombr čhega'aque'enə'. ²Na' gwzo to beḡə' nxinj ni'enə' dezd goljtie' na' yoguə' ža gosə'əbec beḡə' le' cho'a puert čhe yo'oda'onə' puert de'en nzi' "De'e Xochē", par gwnabe' carida lao beḡə' ca' chja'ac yo'oda'onə'. ³Nach catə' besə'əžin Bedən' na' Juannə' yo'oda'onə' na' be'enə' nxinj ni'enə' bolgüiže' lega'aque' yoso'onežjue'ene' mech. ⁴Nach Bedən' na' Juannə' gosə'əbeze' na' bosə'əgüiachgüe'ene' na' Bedən' gože'ene': —Bgüia neto'.

⁵Na' be'enə' bene' xbab yoso'onežjue'ene' mechən'. ⁶Pero Bedən' gože'ene': —Bito bi mech čhia' de gḡə' le', pero de to de'e

gona' gaquəlena' le'. Por yeḡə' guac čhe Jesocristən' ben' naquə beḡə' Nasaretən' chona' mendad gwzoža' na' gwda.

⁷Nach Bedən' beḡe'e na' liča be'en bsože'ene', na' le'e gocte gwzeche' na' ni'e ca' le'e besyə'əyacten gual na' leczə ca' bečhj ni'e ca'. ⁸Na' catə' gocbe'ine' babesyə'əyac ni'e ca' gual bxite'e yeḡə' chebei čhe'enə'. Na' gwyo'e cha'ašil čhe yo'oda'onə' len lega'aque' chxite'e na' cho'elaogüe'e Diozən'. ⁹Na' beḡə' ca' ža' cha'ašilən' besə'əle'ine' can' chde' chxite'e na' cho'elaogüe'e Diozən'. ¹⁰Na' gwsa'acbe'ine' de que naque' ben' chbe' chḡəb carida yoguə' ža cho'a puert čhe yo'oda'onə' puert de'en nzi' "De'e Xochē", na' lechguale besyə'əbanene' de que babeyaque ni'enə'.

Bedən' be'e xtižə' Diozən' cha'ašil čhe yo'oda'onə'

¹¹Na' to cha'ašil čhe yo'oda'onə' nzi'in "Čhe de'e Salomonḡə'". Cha'ašil na' gwyey ben' beyaque ni'enə' len Bedən' na' Juannə'. Bito bsane' lega'aque', con beḡe'e na'aga'aque'enə', na' yoguə' beḡə' ca' ža' yo'oda'onə' besə'əžagsese' par jasə'əgüie'ene' čhedə' besyə'əbanchgüe'ine' de'en babeyaque be'enə'. ¹²Na' catə' Bedən' ble'ine' de que bazjəḡəž beḡə' zan gan' nite'enə' nach be'elene' lega'aque' dižə' gože' lega'aque': —Le'e beḡə' gwlaž čhia' beḡə' Izrael, chebanele can' babeyaque be'enga. De repent chaquele de que por yeḡə' guac čcheton' bento' par nič beyaque

be'enga o ša chaquele beyaquene' por ni che de'en chonchguato' can' chazlažə' Diozən', pero caguə ca'anə'. ¹³De'e xaxta'ocho Abraannə', Isaaquən' na' Jacobən' gwso'elaogüe'le tozə Diozən' ben' cho'ela'ocho, na' Dioz na'anə' bnežjue' yelə' bala'an xen che Xi'ine' Jeso'osən'. Pero le'e bdele Jeso'osən' lao na' jostis ca' par gwso'ote'ene' na' bžonle catə' Pilatən' gone'ene' əgwsane'ene'. ¹⁴Can' benle len Jeso'osən' la'anə'əczə naque' beṇə' la'aždao' xi'ilažə' juisy na' naque' le'ezelaogüe beṇə' güen. Nach gwṇable bosan Pilatən' to beṇə' güet beṇə' de ližyan' lguə'a Jeso'osən'. ¹⁵Na' ca naquə Jeso'osən' ben' əbxe yelə' mban zejlicanen', le'ena' betle pero na' Diozən' bolis bosbane'ene' ladjo beṇə' guat ca'. Neto' ble'ito'one' na' cho'eto' dižə' de que bebane' ladjo beṇə' guat ca'. ¹⁶Na' chle'ile benga cui goquə sa' na' nombi'alene', na' cheyałə' ənezele de que Diozən' beyone' ni'ena' chedə' chonlilažə'əto' Jeso'osən'. De'e yoblə nia' de que de'en chonlilažə'əto' Jeso'osən' de'e na'anə' Diozən' bene' par niç beyacšao' ni'a benga can' chle'ilen'.

¹⁷Beṇə' bišə' dao', nezdə' de que le'e na' beṇə' golə blao chele ca' betle Jeso'osən' laogüe de'en cui gwyejni'ile de que Dioz nan' bsele'ene'. ¹⁸Naque' Cristən' ben' gwlej Diozən' par gaquəlene' nasyon chechon'. Can' goquə goc complir de'e ca' ben Diozən' mendad boso'ozoj de'e profet ca' che Cristən' antslə ze'e sele'ene'. Gwso'e dižə' de que yoso'oçhi' yoso'osaquə' beṇə' le' na'

so'ote'ene'. ¹⁹Na'a ža leyoša' xbab chelen' na' le'e yedinje xtolə'əle ca' par niç Xancho Diozən' gwnitlaogüe'en na' par niç gone' ca sole mbalaz. ²⁰Nach Xancho Diozən' sele'e Jeso'osən' yežlyo nga yetlas ben' gwleje' gwlatte par naque' Cristən'. ²¹Pero chonən byen yega'an Jesocristən' yoban' xte catə' əžin ža gon Diozən' par niç yežlyon' yeyaquən de'e cobə. La' Diozən' bene' par niç de'e profet ca' beṇə' ca' gwleje' par gwsa'aque' lažə' ne'ena' na' gwso'e xtiže'ena' cana'ate boso'ozoj de que yeyaquən de'e cobə. ²²De'e Moizezən' be'elene' de'e xaxta'ocho ca' dižə' gože' lega'aque': "Xancho Diozən' sele'e yeto beṇə' lao dia chelen' par güe'elene' le'e xtiže'ena' can' bsele'e nada'. Che be'enan' gwzenagle bitə'ətezə əne'. ²³Na' Diozən' gone' par niç yesə'əbiayi' yoguə beṇə' ca' cui yoso'ozenag che be'ena' əsele'e." Can' gož de'e Moizezən' de'e xaxta'ocho ca'.

²⁴Le'egatezə ca' yoguə'əloł de'e profet ca' beṇə' ca' gwso'e xtižə' Diozən' cana' gwzolaozən' len de'e Samuelən' na' beṇə' ca' gwsa'ac gwdechlə gwso'e dižə' che tyemp nga zocho na'a na' che de'e ca' bachac na'a. ²⁵De'e profet ca' zžənaque' xaxta'ocho na' lyebe de'en ben Diozən' len de'e Abraannə' de que gone' güen len xi'in dia che'ena' naquən par chio'o. Gože' de'e Abraannə': "Por xi'in dia chio' beṇə' nitə' to to nasyon nite'e mbalaz." ²⁶Can' chac, Diozən' gwleje' Xi'inən' bsele'ene' por ni checho na' gone' par niç to tole sole mbalaz šə yedinjele xtolə'əle ca'.

**Bedən' na' Juannə' nite'e
lao beṇə' gwnabia' ca'**

4 Ne'e chso'elente Bedən' na' Juannə' beṇə' ca' dižə' catə' besə'əžin bałə bχox che beṇə' Izrael ca', na' beṇə' gwnabia' che yo'odao' əblao chega'aque'enə' na' beṇə' sadoso ca' beṇə' ca' cui chse'ejle'e de que yesyə'əban beṇə' guat ca'. ²Beṇə' sadoso ca' chəsə'əže'e de'en choso'osed choso'olo'i Bedən' na' Juannə' beṇə' ca' zjənžaguən', choso'ozejni'ine' lega'aque' de que gwžin ža catə' yesyə'əban beṇə' guat ca' chedə' beban Jeso'osən'. ³Na' beṇə' blaο ca' gosə'əzene' Bedən' len Juannə' na' gosə'əyixjue' lega'aque' ližyan' sin cui gwsa'ogüe' xya chega'aque' can' cheyałə', chedə' bachexjw že'enə' na' bito golə'əch so'onə' yełə' jostis chega'aque'enə' že'enə'. ⁴Na' ca naquə beṇə' ca' gwse'ene choe' Bedən' na' Juannə' xtižə' Diozən' zane' gwso'onlilaže'e Cristən', na' txen len beṇə' ca' bagwso'onlilaže'ene' antslə gwnitə' gueyə' mil beṇə' byo cui cuent no'olə.

⁵⁻⁶Na' beteyo beṇə' gwnabia' che beṇə' Izrael ca', beṇə' golə blaο ca' na' beṇə' ca' choso'osed choso'olo'i lei de'en bzoj de'e Moisezən' besə'ədopə besə'əžague' Jerosalennə' len Anasən' ben' naquəch bχox əblao na' len Caifasən' na' Juannə' na' Ljandr na' nochlə beṇə' ca' zjənaque' bišə' ljujež ben' naquəch bχox əblaon'. ⁷Nach gwso'one' mendad jəsə'əxi'e Bedən' na' Juannə' na' gosə'əṇabene' lega'aque': —čNon'

ben lsens chele par beyonle be'enə' nxiṇjən'? o čnon' ben mendad par beyonlene'?

⁸⁻⁹Na' ca naquə Spirit che Diozən' gwnabia'an yichjla'aždao' Bedən' nach benən par nič gože' beṇə' ca': —Le'e beṇə' gwnabia' na' beṇə' golə beṇə' blaο che Izraelən', chṇable nac goquən' beyonto' be'enə' nxiṇj ni'enə'. ¹⁰Yoguə'əle cheyałə' gwzenagle na' ənia' le'e, de que le'e betle Jesocristən' be'enə' naquə beṇə' Nasaret, bda'alene' to le'e yag coroz, pero Diozən' bolis bosbane'ene' ladjo beṇə' guat ca', na' Jesocrist nan' bene' yełə' guac beyaque bengə. ¹¹Jesocristən' naque' le'ezelaogüe beṇə' zaque'e, pero bito bzenagle che'. De'e na'anə' gwxaquə'əlebene' ca to yej de'en naquə le'ezelaogüe de'e güen na' le'e gwxaquə'əlebele ca beṇə' güen yo'o beṇə' jəsə'əčho'on yejən' de'e naquəch yej güen, pero yejən' banaquən yej squin nə'a. ¹²Tozə Jesocristən' guaquə yebeje' beṇə' xni'a de'e malən', na' notono nochlə zo doxen lao yežlyon' beṇə' gaquə yebej chio'o xni'a de'e malən' sino tozə Jesocristən'.

¹³Besyə'əbane beṇə' gwnabia' ca' can' boži'i Bedən' na' Juannə' xtižə'əga'aque'enə' sin cui besə'əžebe', len nacbia' zjənaque' beṇə' yixə' na' bito zjənsedteque'. Nach gwsa'acbe'ine' de que beṇə' ca' bito chesə'əžebe' chedə' bagosə'ədalene' Jeso'osən'. ¹⁴Na' de'en zecha ben' beyaque ni'enə' txen len Bedən' na' Juannə' bito besyə'əžele beṇə' gwnabia' ca' bi xya sa'ogüe' chega'aque'. ¹⁵Nach besyə'əbeje' apostol ca' fuerlə žlac

boso'oxi'e entr l̄juežjga'aque' nacl̄o so'one'. ¹⁶Na' beṇə' gwnabia' ca' gwse'e l̄juežjga'aque': —¿Bi goncho len beṇə' quinga? Yoguə' beṇə' ža' Jerosalen nga zjəṇezene' de que gwso'one' to miłagr xen na' bito gaquə ye'echo beṇə' de que bito gwso'one' miłagrən'. ¹⁷Letechozə goncho par ničh cui gasə' laljə dižə' de'en chso'ena'. De'e na'ana' cheyałə' ye'echo lega'aque' gatə' castigw gual čhega'aque' šə so'echē' xtižə' Jeso'osən'.

¹⁸Nach gwsa'axe' Bedən' na' Juannə' de'e yoblə na' gwse'e lega'aque' cuich so'e dižə' čhe Jeso'osən' na' cuich no yoso'osed yoso'olo'ine' čhe'. ¹⁹Nach Bedən' na' Juannə' bosyo'ožil'en gwse'e lega'aque': —Łegon xbab čhe de'e nga, ¿əchaquele chene'e Diozən' gwzenagto' čhele o šə chene'ene' gwzenagto' čhe'ena' ža? ²⁰Bito gaquə cuezəto' cuich güe'eto' dižə' čhe de'e ca' bable'ito' na' babeneto' čhe Jeso'osən'.

²¹⁻²²Na' de'e zan de'e gwse' beṇə' gwnabia' ca' lega'aque' par yoso'ošebe' lega'aque'. Pero na' bito besə'əželene' nacl̄o so'one' lega'aque' castigw čhedə' beṇə' zan chso'e yełə' choxcwlen čhe Diozən' de'en beyaque be'ena'. Mazəchlə čhoə izene' na' dezd goljtie' cui goquə se'e. Na' beṇə' gwnabia' ca' cui gwse'enene' yoso'oše'e beṇə' zan ca', de'e na'ana' bosyo'osane' Bedən' na' Juannə'.

Gosə'əṇabene' Diozən' gaquəlene' so'e xtižə'ena' sin cui yesə'əžebe'

²³Na' Bedən' len Juannə' catə' bosyo'osan beṇə' gwnabia'

ca' lega'aque' jəya'aque' gan' nitə' yeziquə'əchlə beṇə' ca' chso'onl̄ilažə' Cristən' na' gwso'elene' lega'aque' dižə' yoguə'əłol̄ can' əgwse' b̄xoz əblao ca' na' beṇə' golə blao ca' lega'aque'.

²⁴Na' beṇə' ca' catə' gwse'enene' dižə'ən tozə can' gwso'one' xbab len lega'aque' na' gwso'one' orasyonṇə' lao Xacho Diozən' gosə'əne': —Xanto' Dioz, len' beno' yoban' na' yežlyon' na' nisda'onə'. Len' beno' beṇəčh, bia ca' chsa'aš na' biquə'əchlə de'e zjəde, na' len' chnabi'o doxenl̄ə. ²⁵Na' Spirit čhio'onə' benən par ničh de'e Rei Dabin' bzenague' čhio' na' bzoje' dižə' quinga de'en nan:

Beṇə' ca' cui zjənaquə beṇə' Izrael chsa'ase' contr le' Xanto' Dioz, pero bitoczə gaquə can' chso'one' xbabən'.

²⁶Beṇə' gwnabia' čhe ṇasyon ca' na' čhe yež ca' txennə' zjənaque' chso'one' contr le' Xanto' Dioz,

na' contr Xi'ino' Cristən' ben' bselo'lo par gaquəlene' ṇasyon Izrael čheto' nga.

²⁷Na' lao' syoda ngan' besə'ədoba Rei Erodən' na' Ponsio Pilatən' na' beṇə' cui zjənaque' beṇə' Izrael, na' len beṇə' Izrael ca'. Na' yogue'e gwso'one' txen par gwso'ote' Xi'ino' Jeso'osən' ben' naquə beṇə' la'aždao' xi'ilažə' juisy, ben' gwlejo' par gaquəlene' ṇasyon čheto' nga.

²⁸Gwso'one' can' bsi'o xneze gaquə na' can' gwduxjui'lo cana'ate. ²⁹Na' ṇa'a ža Xanto', bgüia can' chso'on beṇə' gwnabia' ca' chse'enene' yoso'ošebe' neto' beṇə' güen žin

chío', na' goclen neto' par niçh cui žebto' güe'eto' xtižo'onə'. ³⁰Na' catə' güe'eto' xtižo'onə' blo'ešga yełə' guac che Xi'ino' Jeso'osən' beṇə' la'aždao' xi'ilažə' juisyən' ca de'en gaquə no miłagr, na' yesyə'əyaque no beṇə' chsa'acšene na' gaquə bichlə de'e yesyə'əbane beṇə'.

³¹Na' catə' beyož gwso'one' orasyonṇə' ca' Diozən' bene' par niçh gwxo' gan' zjəndopə zjənžague'enə' na' Spirit che'enə' bedəṇabia'achən yichjla'ažda'oga'aque'enə' na' goclenən lega'aque' par gwso'e xtiže'enə' sin cui besə'əžebe'.

Gwso'one' de'en zjəde che'ga'aque' tozə

³²Na' yoguə' beṇə' ca' gwso'onjilažə' Cristən' tozə can' goquə yichjla'ažda'oga'aque'enə'. Na' yoguə' bi de'en zjəde che'ga'aque'enə' gwso'one'en tozə na' notono gwna: “Chia' de'e nga”, o “Chia' de'e na'”, la' naquən che yoguə'əga'aque'. ³³Na' apostol ca' gwnitə'ətezə gwnite'e bosə'ozejni'ine' beṇə' de que Jeso'osən' bebane' ladjo beṇə' guat ca'. Na' Diozən' goclenchgüe' lega'aque' len bi de'en gwso'one' na' bene' par niçh beṇə' yeziquə'əchlə gwsa'apəchgüe' lega'aque' respet. ³⁴Can' goquə bito bi bi goquə falt bi de'en besə'əyažje beṇə' ca' gwso'onjilažə' Cristən', chedə' beṇə' ca' gotə' yežlyo che'ga'aque' o ližga'aque' tgüejə gwso'otəga'aque'en. ³⁵Na' mech de'en besə'əle'ine' che to ton bosə'onežjue'en apostol ca' na' apostol ca' gosə'əyise'en len beṇə'

ca' yełə' con noe' byažjene'en.

³⁶Can' ben to beṇə' Čhipre beṇə' le Jwse. Naque' beṇə' goljə lao dia che de'e Lebin' na' apostol ca' bosə'əsi'ene' Bernabe, zejen dižə' ben' chtipe' lažə'əcho. ³⁷Jwse na'anə' bete'e to yežlyo che'enə' na' mech de'en ble'ine' cheinə' bnežjue'en apostol ca'.

De'e mal de'en ben Ananias na' Safira

5 Na' zo to beṇə' le Ananias na' no'ol che'enə' Safira, na' Ananiasən' bete'e to yežlyo che'enə'. ²Pero na' bosə'oxi'e entr lega'acze' yoso'oxoayague' apostol ca' yoo'onežjue' to partzə mech de'en besə'əle'ine' cheinə' na' se'e lega'aque' de que doxenəṇṇə'. Nach gwyej Ananiasən' na' bnežjue' mechən'. ³Nach Bedən' gože'ene': —Ananias, žbixchen' bzenago' che gwxiye'enə' par chacdo' əxoayago' Spirit che Diozən', nao' neto' de que choṇo' doxen mechən' de'en ble'ido' che yežlyon' len bagwlo'oša'ole to partən' par cuinlen'? ⁴Chio' yežlyon' catə' cuinə' goto'on, na' chio' mechən' de'en ble'ido' catə' beto'on na' zaco'o par beno' bi che'endo' len len. De'e malən' benle ca de'en goquəle əxoayagle len de'en benle neto'. Caguə contr neto'onə' babenle de'en benlažə'əle sino contr Dioz na'anə'.

⁵Nach Ananiasən' catə' benene' xtižə' Bedən' to bgüixze' na' gote'. Na' yoguə' beṇə' ca' gwse'enene' dižə' can' goquən' lechguale besə'əžebe'. ⁶Na' besə'əžin beṇə' xcuidə' ca' gan' bgüixə de'e Ananiasən' na' bosyə'əçhele' cuerp

che'lenə' to lachə' na' besyə'əyo'ene'
gan' bosu'ocuaše'ene'.

⁷Na' gwde do šon or gote' bžin
no'ol che'lenə' na' gwyo'e yo'onə'
sin cui nezene' šə bin' bagoc che
de'e be'en che'lenə'. ⁸Na' Bedən'
gože'ene': —Ca naquə yežlyon'
de'en betə'əlen' čəleine' to
ca'atə'ətən' ble'ile chein' ža?

Na' Safiran' gože'ene': —To
ca'atə'ətən'.

⁹Nach Bedən' gože' no'olən':
—čBixchen' goco' tozə len be'en
čhio'onə' chaquele gonle Diozən'
prueb šə leine' can' ne' bito
əxoayagcho? Cho'a puert nga
zjəzechə be'nə' ca' baboso'ocuašə'
be'en čhio'onə' na' na'a so'e le'.

¹⁰Na' le'e bgüixte Safiran' lao
Bedən' na' gote'. Na' catə' gwso'o
be'nə' xcuidə' ca' lo'o yo'onə'
besə'əle'ine' bagote' nach gwso'ene'
jəsə'əcuaše'ene' cuit de'e be'en
che'lenə'. ¹¹Na' yoguə be'nə' ca'
chso'onlilažə' Cristən' besə'əžebe'
can' goquən' na' leczə besə'əžeb
yeziquə'əchlə be'nə' gwse'ene dižə'
can' goquən'.

Gwso'one' de'e zan miłagr

¹²Na' apostol ca' gwso'one'
de'e zan miłagr entr be'nə' ca'
ža' Jerosalennə'. Na' be'nə' ca'
chso'onlilažə' Xancho Jesocristən'
chəsə'ədopə chəsə'əžague' txen
cha'ašil che yo'odao' əblaonə'
gan' nzi' “Čhe Salomonnə”.

¹³Na' yeziquə'əchlə be'nə' ca'
ža' Jerosalennə' lechgualə
gwsa'apəga'aque'ene' respet,
la'anə'əczə besə'əžebe' par
yesə'əžague' txen len lega'aque'.

¹⁴Pero na' zane' gwso'onlilaže'e

Xancho' na' besə'əžague' txen, zan
be'nə' byo na' no'olə. ¹⁵Na' catə' no
be'nə' gwsa'acšene gosə'əyixjue'
lega'aque' tnezən' do lao cam o
do lao yagla' gosə'əbeze' catə' te
Bedən' na' gwse'lenene' nite'e gan'
yesə'əchele' bχen che Bedən' par
ničh yesyə'əyaquene' šə bi yižgüen'
chse'ine'. ¹⁶Na' be'nə' ca' ža' yež
ca' zjəchi' galə'əzə Jerosalennə'
ja'aque' Jerosalennə' zjənche'e
be'nə' ca' cha'acšene na' be'nə'
ca' zjəyo'o zjəyaz de'e xio' ca'.
Na' por yelə' guac che Diozən'
apostol ca' gwso'one' par ničh
besyə'əyaque be'nə' ca' gwsa'acšene
na' besyə'əbeje' de'e xio' ca' zjəyo'o
yichjla'aždao' be'nə'.

Boso'olagzejə boso'olagzide'

Bedən' len Juannə'

¹⁷Nach ben' naquəch bχoz əblao
na' yeziquə'əchlə be'nə' sadoseo
ca' be'nə' ca' cui chse'ejle'e
de que yesyə'əban be'nə' guat
ca', besə'əgue'ine' apostol ca'.
¹⁸Na' gosə'əzene' lega'aque' na'
gosə'əyixjue' lega'aque' ližyan'.
¹⁹Na' to angl be'nə' za' gan' zo
Xancho Diozən' bžine' ližyan' še'ela
na' bsaljue' puert ca' na' bebeje'
lega'aque'. ²⁰Na' gože' lega'aque'
žja'aqueche' yo'odao' əblaonə'
na' so'eche' dižə' len be'nə' ca'
chəsə'əžaguən' naquən' so'one' par
yesə'əzi'e yelə' mban zejlicanen'.
²¹Nach de'en gwse'lenene' can' gož
anglən' lega'aque', ja'aque' yo'odao'
əblaonə' catə' gwy'e'eni'inə' na'
boso'osed boso'olo'ine' be'nə' ca'
zjənžaguən'.

Na' ben' naquəch bχoz əblao txen
len be'nə' golə blao ca' chəsə'ənabia'

nasyon Izraelən' besə'ədobē' par gwso'one' jontən' nach gwso'one' mendad žjəsə'əxi'e apostol ca' gan' zjədiē' ližyan'. ²²Pero catə' besə'əžin xə'ag yo'odao' ca' ližyan' caguə no apostol ca' nla'. Na' jəya'aque' lao beṇə' gwnabia' ca' jəsyə'ədixjui'e. ²³Chse'e beṇə' ca': —Nyeyjw chech ližyan' na' soldad ca' nite'e cho'a puertən' chsa'ape'en pero catə' bsaljwto' puertən' caguə no apostol ca' ža' lo'o ližyan'.

²⁴Na' ben' naquəch bχoz əblao na' beṇə' gwnabia' che soldad ca' chsa'apə yo'oda'onə', na' bχoz golə blao ca' catə' gwse'enene' rsonṇə' besyə'əbanene' na' gwsa'acžejlaze'e bi zeje ca de'en bagoquən'. ²⁵Na' lao chsa'acžejlaze'enə' bžin to beṇə' gože' lega'aque' de que apostol ca' beṇə' ca' gosə'əyixjue' ližyan' že'e cha'ašil che yo'odao' əblaonə' choso'osed choso'olo'ine'.

²⁶Nach beṇə' gwnabia' che soldad gop ca' gwyeye' len xə'ag yo'odao' ca' jəsyə'əxi'e apostol ca' dižə' šao'. Bito gwso'one' znia len lega'aque' chedə' besə'əžebe' beṇə' ca' choso'ozenag xtižə' apostol ca' šə yoso'ošize'e lega'aque' yej. ²⁷Na' catə' besə'əžin apostol ca' lao beṇə' gwnabia' ca' beṇə' ca' chso'on jontən' nach ben' naquəch bχoz əblao gože' lega'aque': ²⁸— Bač bento' mendad cui güe'ele dižə' che Jeso'osən' na' cuich əgwsed əgwlo'ile beṇə' che le'enə', na' mazəchlə babe'elenle yoguə' beṇə' Jerosalen ca' xtiže'enə'. Na' bachosbaguə'əle neto' che de'en gwso'ote'ene'.

²⁹Nach Bedən' na' apostol ca' yelə' gwse'e le': —Naquəchən

de'e žialao xench gwzenagto' che Diozən' cle ca che beṇə'achən'.

³⁰Le'e betle Jeso'osən' bda'alene' to le'e yag coroz pero Dioz ben' cho'ela'ocho na' ben' be'elao' de'e xaxta'ocho ca' bolis bosbane'ene' ladjo beṇə' guat ca'. ³¹Na' na'a Diozən' babnežjue'ene' yelə' bala'an xen na' yelə' gwnabia' xen par ničh chnabi'e na' chebeje' beṇə' xni'a de'e malən'. Na' le'enə' chene'ene' gaquəlene' yoguə' chio'o beṇə' Izrael par ničh yedinjecho xtolə'əchon' na' yezil'ixene' checho. ³²Neto' nezeto' can' ben Diozən' len Jeso'osən' na' cho'eto' dižə' chei, na' leczə Spirit che Diozən' nezczen na' cho'en dižə' chei na' Diozən' babsele'e Spirit che'enə' zon lo'o yichjla'aždao' beṇə' ca' choso'ozenag che'.

³³Na' lechguəle besə'əža'a beṇə' gwnabia' ca' catə' gwse'enene' can' gož Bedən' lega'aque' na' gwse'enene' so'ote' apostol ca'.

³⁴Pero na' lao jontən' zo to beṇə' fariseo beṇə' le Gamaliel. Chsed chlo'ine' beṇə' lei de'en bzoj de'e Moisezən' na' gwsa'apəchgua beṇə' le' respet. Na' Gamalielən' gwzeche' lao jontən' na' bene' mendad yesə'əchoj apostol ca' fuerlə žlac güe'elene' beṇə' ca' ža'anə' dižə'.

³⁵Nach gože' beṇə' ca' ža'anə': — Beṇə' gwlaž, cheyalə' gongaxjcho xbab nac goncho len beṇə' quinga par ničh goncho de'en naquə de'e sin'. ³⁶Le'e yosa'alažə' can' goquə catə' bchoj ben' le Teudas gwne' de que naque' beṇə' zaque'e. Na' do tap gueyoa beṇə' boso'ozenag che' na' gwsa'aque'ne' txen. Pero na' bžin ža gwso'ot beṇə' le' na'

besyə'əyasəlas beṇə' ca' gwsa'aque' le' txen, caguə bi goquəch so'one'.
³⁷Nach gwdechlə to beṇə' Galilea ben' le Jodas bchoje' ca tyempən' bosu'oguale'e yiš balə beṇə' ža' to to yež, na' beṇə' zan gwsa'aque'ne' txen na' leczə bžin ža gwsu'ote'ene' na' beṇə' ca' gwsa'aque' le' txen leczə besyə'əyasəlase'.³⁸Na' de'e na'anə' chonə' le'e consejw nga, ljoye' beṇə' quinga, bito bi gonecho lega'aque'. La' šə de'en choso'osed choso'olo'ine'enə' naquən che lega'acze' gwžin ža catə' yenitən.³⁹Na' šə de'en choso'osed choso'olo'ine'enə' naquən che Diozən', bito bi gaquə goncho par cui gasəlasən. Cheyalə' gapcho cuidad par ničh cui tiləlencho Diozən'.

⁴⁰Na' gwsa'azlažə' beṇə' gwnabia' ca' can' gož Gamalielən' lega'aque'. Nach gwsa'axe' apostol ca' na' gosə'əyine' lega'aque' na' gwsu'one' mendad cuich no yosu'osed yosu'olo'ine' che Jesu'osən' batə'ətezəchlə. Nach bosu'osane' lega'aque'.⁴¹Na' ca naquə apostol ca' catə' besyə'əchoje' gan' gotə' jontən' chesyə'əbeine' de que Diozən' bsi'e xneze bosu'ochi' bosu'osaquə' beṇə' lega'aque' por ni che de'en choso'osed choso'olo'ine' che Jesu'osən'.⁴²Na' yoguə' ža bosu'osed bosu'olo'iche apostol ca' che Jesocristən' do liž beṇə' na' do catə' chja'aque' yo'odao' əblaonə'.

Beṇə' ca' chsu'onlilažə' Cristən' gosə'əbeje' gažə beṇə' par gwsa'aque' comisyon chega'aque'

6 Na' ca tyempən' zda chanch beṇə' ca' chsu'onlilažə'

Jesocristən' na' beṇə' ca' chsu'e dižə' griego gwzolao chəsə'əže'eše'e chedə' no'olə gozeb ca' entr lega'aque' bito chəsə'əzi'e lebe len no'olə gozeb ca' entr beṇə' ca' chsu'e dižə' ebreo catə' chəsə'əyise' de'en chse'ej chsa'o to toga'aque'.²Nach apostol ca' šižin bosu'otobe' yeziquə'əchlə beṇə' ca' chsu'onlilažə' Jesocristən' na' gwse'e lega'aque': —Bito naquən güen par neto' cuzəto' cuich əgwsed əgwlo'ito' beṇə' xtižə' Diozən' par ničh chisto' de'en əse'ej əsa'o beṇə'.³De'e na'anə' beṇə' bišə', lecuej gažə beṇə' entr le'e, beṇə' chnabia' Spirit che Diozən' yichjla'ažda'oga'aque'enə', beṇə' zjənaquə beṇə' sin' na' beṇə' chsu'on de'e güennə', na' le'e gon lao na'aga'aque' yesə'əyise' de'en əse'ej əsa'o beṇə' ca'.⁴Na' neto' sotezə soto' gonto' orasyonnə' na' əgwsed əgwlo'ito' beṇə' xtižə' Diozən'.

⁵Na' gwsa'azlažə' yoguə' beṇə' ca' gwsu'one' can' gwse' apostol ca' lega'aque', na' gosə'əbeje' to beṇə' le Esteban, beṇə' chonlilažə'əchgua Diozən' na' chnabi'achgua Spirit che Diozən' yichjla'aždaogüe'enə'. Na' leczə gosə'əbeje' Lip na' Procoro na' Nicanor na' Timon, na' Parmenas na' Nicolas beṇə' Antioquia, beṇə' ben cuine' beṇə' Izrael.⁶Na' bosu'ozoe' lega'aque' lao apostol ca' par ničh apostol ca' gwsu'one' orasyon chega'aque' na' bosu'oxoa na'aga'aque'enə' yichj beṇə' ca' par gwsu'o lao na'aga'aque'enə' žinnə' de'en so'one'enə'.

⁷Na' beṇə' zanch gwse'enene' xtižə' Xancho Jesocristən',

na' zan beṇə' Jerosalennə'
 gwso'onlilaže'ene' na' leczə
 zan b̄xoz ca' bos'ozenague'
 na' gwse'ejle'e xtiže'ena' de'en
 bos'oosed bos'olo'ine'.

Gosə'əzene' Estebannə'

⁸Na' ca naquə Estebannə'
 gwzochgua yeḷə' guac che Diozən'
 len le' na' Diozən' goclenchgüe' le'.
 De'e na'anə' bene' miḷagr na' bichlə
 de'e zaquə' yesyə'əbane beṇə' lao
 beṇə' ca' ža' Jerosalennə'. ⁹Na' zo
 to yo'oda'onə' de'en chəsə'əne'
 "Yo'odao' che Beṇə' ca' Gwsa'ac
 Esclabos". Beṇə' ca' chəsə'ədopə
 chəsə'əžag na' za'aque' Sirene
 na' Alejandria, na' Silisia na'
 Asia, na' balə beṇə' ca' gwzolao
 gwsa'acyože' Estebannə'. ¹⁰Pero na'
 bito besyə'əželene' nac yosyo'oži'e
 xtižə' Estebannə' chedə' Spirit che
 Diozən' bnežjon le' yeḷə' sin' na'
 bzejni'in le' bin' gwne'. ¹¹Nach
 gosə'əgo'oyele'e to chopə beṇə'
 par bos'o'oxoayague' gosə'əne' de
 que Estebannə' babžia bnite'e de'e
 Moisezən' ben' bzoj lei che beṇə'
 Izrael ca' na' leczə gosə'əne' de que
 babžia bnite'e Diozən'. ¹²Na' beṇə'
 ca' gwsa'acyožə Estebannə' bos'ota
 bos'one' beṇə' lao syodan' na'
 beṇə' golə blao che beṇə' Izrael ca'
 na' beṇə' ca' choso'osed choso'olo'i
 lei de'en bzoj de'e Moisezən'. Na'
 ja'acdoe' gan' zo Estebannə' na'
 gwso'oxe'ene' na' gosə'əche'ene'
 gan' ža' beṇə' ca' chəsə'ənabia'
 Izraelən'. ¹³Nach besyə'əyilje' beṇə'
 soe' dižə' güenlažə' beṇə' gosə'əne'
 che': —Benga cuiczə žizə zoe'
 chžia chnite'e yo'odao' əblao nga
 na' lei de'en bzoj de'e Moisezən'.

¹⁴Babeneto' ne' de que Jeso'os
 beṇə' Nasaretən' yochinje' yo'odao'
 əblaonə' na' yoše'e costombr
 checho ca' de'en ben de'e Moisezən'
 mendad naocho.

¹⁵Na' beṇə' gwnabia' ca' na'
 notə'ətezəchlə beṇə' ca' zjəchi' gan'
 chso'one' yeḷə' jostisən' besə'əgüie'
 cho'alao Estebannə' na' besə'əle'ine'
 chactitən ca cho'alao angl.

Choe' Estebannə' dižə'

7 Nach ben' naquəch b̄xoz
 əblaonə' gože' Estebannə':
 —İEnaquən ca nga chəsə'əna beṇə'
 quinga?

²Nach Estebannə' gože'
 lega'aque': —Le'e beṇə' golə na'
 le'e beṇə' xcuidə', legwzenag
 chia' len to chopə de'e ənia' le'e.
 Diozən' ben' naquə le'ezelaogüe
 beṇə' zaque'e bloe' laogüe' de'e
 xaxta'ocho Abraannə' catə'an
 gwzoe' Mesopotamian' antslə
 ze'e žjəsoe' Arannə'. ³Na' Diozən'
 gože'ene': "Bchoj lažə'onə' na' ladjo
 beṇə' family chio' na' gwyej jəso'
 latjə gan' gwlo'ida' le'." ⁴Nach
 de'e Abraannə' bchoje' gan' ža'
 beṇə' Caldea ca' na' jəsoe' Arannə'.
 Na' bžin ža got de'e xe'lenə' na'
 gwdechlə Diozən' gwche'e de'e
 Abraannə' nga gan' zocho. ⁵Diozən'
 bito bnežjue' de'e Abraannə'
 yežlyonə' gaquən che', ni to pedas
 da'ozən', sino bene' lyebe de que
 gaquən che beṇə' ca' ze'e za'ac
 lao dia che'lenə' catə' bagote',
 la'anə'əczə cui no xi'ine' ne'e so
 catə'an gož Diozən' le' ca'. ⁶Nach
 Diozən' leczə gože'ene' de que xi'in
 dia che'lenə' žjəso'ənite'e laž beṇə'
 zitə' tap gueyoa iz gan' əsa'aque'

esclabos na' yesə'əžaglaochgüe'.
 7Nach Diozən' gože'ene': "Nada'
 gwnežjua' castigw che nasyonnə'
 gan' so'one' xi'in dia chio' ca'
 esclabos na' gona' ca yesyə'əchoj
 xi'in dia chio'onə' na' da'aque'
 əso'elaogüe'e nada' nga." 8Nach
 Diozən' bene' lyebe len de'e
 Abraannə' de que gone' güen len
 xi'in dia che'enə'. Na' bene' mendad
 so Abraannə' to señy de'en ne'
 sirconsision, le' na' len beñə' byo
 ca' za'ac lao dia che'enə' par gacbia'
 de que chse'ejle'e che lyebe de'en
 bene'enə'. De'e na'anə' catə' goljə
 xi'ine' Isaaquən' bzo'ebə' señyən' to
 xmanzebo', na' leczə can' ben de'e
 Isaaquən' catə' goljə xi'ine' Jacobən'.
 Na' ca'aczə ben de'e Jacobən' len
 de'e xi'ine' ca' šižinnə' beñə' ca'
 gwsa'ac šižin dia che chio'o beñə'
 Izrael.

9Na' xi'in de'e Jacobən' be'en le
 Jwse, beñə' biše'e ca' gwsa'acxi'ine'
 le' na' gwsə'ote'ene' gosə'əzi' beñə'
 Egipto ca' le'. Pero Diozən' gwzoe'
 len Jwsen'. 10Na' goclene'ene' na'
 bebeje'ene' lao yoguə'əloj de'en
 bžaglaogüe'enə'. Na' Diozən' bene'
 par nič de'e Rei Faraonnə' ben'
 chnabia' Egipton' bebeine' le' na'
 gwleje' le' par goque' gobernador
 che Egipton' na' Faraonnə' bzo'ene'
 bgüia bye' ližen'.

11Na' gwche' to bgüin doxen
 Egipton' na' leczə can' goquə
 Canaannə' na' de'e xaxta'ocho ca'
 bito besə'əželene' de'e əsa'ogüe'
 na' besə'əžaglaochgüe'. 12Pero na'
 bžin ža bene de'e Jacobən' rsonnə'
 de trigw Egipton' na' bsele'e de'e
 xaxta'ocho ca' tš'i' jəsə'əxi'en. 13Na'
 bečhop ši'i ja'aque' catə' ben Jwsen'

ca besyə'əyombia' beñə' biše'e
 ca' le', na' gwneze Faraonnə' ca
 zjənaquə family che Jwsen'. 14Na'
 Jwsen' bene' mendad žjəsə'əxi'e
 xaga'aque' Jacobən' na' yoguə'əloj
 bišə' lježeje' ca', naquə ca do
 gyonšino'e. 15Can' goquə gwyej
 Jacobən' Egipton' na' Egipto na'
 gote', na' leczə na' gwsa'at xi'ine'
 ca' beñə' ca' zjənaquə xaxta'ocho.
 16Na' gwdechlə besyə'əyo'e
 cuerp chega'aque'enə' na'
 jəsə'əcuasə'ene' to lo'o bloj ba gan'
 nzi' Siquem, to yežlyo de'en gwxi'
 Abraannə' de'en gwsə'otə' xi'in
 Amor beñə' Siquem.

17Na' catə' bazon əžin tyemp
 əgwnežjo Diozən' lega'aque'
 yežlyon' can' bene' lyebe len de'e
 Abraannə', bazda chan beñə' Izrael
 ca' ža' laž beñə' Egipto ca'. 18Na'
 ca' chac beža' rei che Egipton'
 na' rei cobən' bito gwnezene'
 can' goquəlen Jwsen' nasyon
 Egipton'. 19Na' rei nga gwdiłjlaže'e
 bin' əbde'ine' par bene' mal len
 de'e xaxta'ocho beñə' Izrael ca',
 na' bene' mendad žjəsə'əcho'on
 xi'ingaque'enə' par nič yenit
 dianə'. 20Na' ca tyempən' goljə de'e
 Moizezən' na' bebei Diozən' le' na'
 xaxne'enə' bosyo'oscha'ogüe' le'
 šonə bio'. 21Pero na' bžin ža benən
 byen jəsə'əcho'one'ebə', na' xi'in
 rein' to no'olə beželene'ebə' na'
 beyə'ebə' liže'enə' boscha'ogüe'ebə'
 ca xi'ine'. 22Ca' goquən' bsed de'e
 Moizezən' tcho'a tšao' yelə' sin' che
 beñə' Egipto ca', na' bene' de'e
 zaque'e na' be'e dižə' de'e zaque'e.

23Na' čhoa ize de'e Moizezən'
 catə' gwnan žjəlane'e beñə' Izrael
 gwlaž che' ca'. 24Na' jəle'ine' to

benə' Egipton' chchi' chsaque'e to
 benə' Izraelən', na' goclene' benə'
 Izraelən' na' bete' benə' Egipton'.
²⁵De'e Moizezən' bene' xbab
 se'ejni'i benə' Izrael gwlaž che'
 ca' de que Diozən' gaquəlene'ene'
 par yosle' lega'aque' lao na' benə'
 Egipto ca', pero na' bito gwse'ejni'i
 benə' Izrael ca'. ²⁶Na' beteyo
 gosə'ədiḷə chopə benə' Izrael
 ca' entr lega'acze'. Na' bžin de'e
 Moizezən' goquene' gone' par niç
 yenite'e binḷo, na' gože' lega'aque':
 "¿Bixçhen' chdiḷəlen ljuəžjle ca' entr
 benə' gwlažze?" ²⁷Nach ben' napə
 doḷə'ənə' bžigue'e de'e Moizezən'
 ca'alə gože'ene': "¿No gwna le'
 gaco' benə' gwnabia' par gono' yeḷə'
 jostis çheto'onə'? ²⁸¿Elezə che'endo'
 goto' nada' can' beto' benə' Egipton'
 nejen'?" ²⁹⁻³⁰Na' cata' bene de'e
 Moizezən' can' gož be'ənə' le', nach
 bxonje' jəsoe' çhoa iz gan' nzi'
 Madian la'anə'əczə naque' benə'
 zita' len benə' ca'. Na' bšagne'e na'
 na' gwnitə' chopə xi'ine'.

Na' goc çhoa iz zoe'ənə' catə'
 bloe' lao to angl le' latjə dašən'
 gaḷə'əzə ya'a Sinai. Yo'o anglən' to
 lo'o yi' bel chdoljən to lo'o xis yešə'.
³¹Na' catə' ble'i de'e Moizezən' can'
 chaquən' bebanene', nach bgüigue'e
 yelatə' par ble'iša'ogüe'ene'
 na' benene' cholgüiž Xancho
 Diozən' le' che'ene': ³²"Nada'
 naca' Dioz na' de'e xaxta'ogo'o
 Abraannə', Isaaquən' na' Jacobən'
 gwso'elaogüe'e nada'." De'e
 Moizezən' bžebe', caguə cheyaxjene'
 əggüie'. ³³Na' gož Xançon' le':
 "Gwleçhj xelo'onə' par gapo' nada'
 respet la' latjə gan' zecha'onə'
 naquən chia'. ³⁴Nada' ble'ida' yeḷə'

yašə' yeḷə' zi'inə' chde nasyon chia'
 Izraelən' Egipton' na' babenda' can'
 chso'onyašə'əga'aque'. De'e na'anə'
 gaquəlenga'aca'ane'. Da niç əseḷa'a
 le' Egipton'."

³⁵Diozən' gože'ene' ca' la'anə'əczə
 antslə benə' Izrael ca' cui gosə'əzi'e
 che' na' gwse'ene': "¿No gwna
 le' gaco' benə' gwnabia' par gono'
 yeḷə' jostis çheto'?" Diozən' bseḷe'e
 de'e Moizezən' par gwnabi'e
 de'e xaxta'ocho ca' na' par niç
 bebeje' lega'aque' lao na' benə'
 Egipto ca', na' angl che Diozən'
 ben' gwyo'o lo'o yi' belən' gwzoe'
 goclene'ene'. ³⁶Na' de'e Moizezən'
 bebeje' lega'aque' Egipton' bene'
 zan miḷagr na' bichlə de'e zaquə'
 yebanecho Egipton', na' nisdəo'
 Exnan' na' latjə dašən' lao çhoa
 iz. ³⁷Na' de'e Moizezən' na'anə' gože'
 de'e xaxta'ocho ca': "Xancho
 Diozən' seḷe'e yeto benə' lao dia
 çhele par güe'elene' le'e xtiže'enə'
 can' bseḷe'e nada'. Che be'enan'
 əgwzenagle." ³⁸De'e Moizezən'
 gwzoe' len de'e xaxta'ocho ca' latjə
 dašən'. Na' anglən' be'elene' le'
 dižə' lao ya'a Sinain' gože' le' dižə'
 de'e zaquə' əgwzenagcho çhei na'
 de'e cui te çhei. Na' de'e Moizezən'
 bzejni'ine'en de'e xaxta'ocho ca'
 zjəndopə zjənzag gaḷə'əzə ya'anə'.
 na' Moizezən' bzoje' dižə'ənə' par
 chio'o.

³⁹Pero na' de'e xaxta'ocho ca' bito
 boso'ozenague' çhe de'e Moizezən',
 boso'ozo'ene' ca'alə. Gwse'enene'
 žjəya'aque' Egipton'. ⁴⁰Na' lao zda
 de'e Moizezən' lao ya'a Sinain',
 gwse'e benə' biše'e Ronə': "Ben
 lgua'a lsaquə' de'en šejni'alažə'əcho,
 de'e yesə'əbialao lao chio'o tnezən'.

La' ca naquə Moisezən' ben' bebej chio'o Egipton' cuili bin' bagoc che'." ⁴¹Nach gwso'one' to me'e go'on dao' de or na' gwso'ote' no bia yixə' par gwso'elaogü'e'eb na' gwnite'e chesyə'əbeine' len de'en gwso'one' len ni'a na'aga'aque'enə'. ⁴²De'e na'anə' Diozən' gwlejjichje' nasyon Izraelən' na' be'e latjə gwse'ejni'alaže'e bgüižən', bio'onə' na' beljw ca'. Na' nyoj de'en gwna Diozən' can' gwso'one' nan:

Le'e benə' Izrael, caguə nadan' be'ela'ole catə'an betle bia yixə' latjə dažən' lao choa iz.

⁴³Benle no lgua'a lsaquə'an gwyejñi'alažə'əle, na' bi'ale yo'o de lachə'an gan' gwyejñi'alažə'əle lgua'a lsaquə' de'en ne' Moloc, na' bi'ale beljon' gwyejñi'alažə'əle de'en nzi' Renfan.

Na' de'en bagwlejjichjle nada' de'e na'anə' cueja' le'e gan' zolen' na' sel'a'a le'e zitə' gan' nzi' Babilonia.

⁴⁴Na' žlac chaše' latjə dažən' de'e xaxta'ocho ca' gwso'one' to yo'o de lachə' gan' ža' yej ta'a ca' gan' nyoj lei chega'aque'enə'. Na' gwso'one'en con can' gož Diozən' de'e Moisezən' na' con can' blo'ine' le'. ⁴⁵De'e xaxta'ocho ca' boso'osa'ate' yo'o de'e lachə' chega'aque'enə' na' yej ta'a ca' gan' nyoj lei chechonə' con ga ja'aque', gwzolaozən tyemp che de'e Moisezən' na' gwzelaon tyemp che de'e Rei Dabin'. Na' gwde got de'e Moisezən' de'e Josuen' gwche'e lega'aque' yežlyon' de'en ben Diozən' lyebe gwnežjue' lega'aque', na' Diozən' bene' benə'

ca' ža' yež ca' lao na'aga'aque' catə' gosə'ədiləlene' lega'aque'.

⁴⁶Na' Diozən' bebeine' de'e Rei Dabin', na' de'e Dabin' gone'ene' gone' to yo'odao' par Diozən', Dioz ben' leczə gwyejñi'alažə' de'e Jacobən' cana'ate. ⁴⁷Pero na' Diozən' bito be'e latjə gon de'e Dabin' yo'oda'onə', sino de'e xi'ine' Salomonñə' bene'en. ⁴⁸Na' bito ənacho de que Diozən' ben' chnabia' doxenlə zoe' do lo'o yo'o de'e chon benə'chən', sino chac can' gwna Diozən' de'en bzoj to profet benə' be' xtiže'enə' cana' nan:

⁴⁹Nada' zoa' yoban' chnabia' na' guaquə gona' par nich gaquə con bin' che'enda' lao yežlyon'. ĺEna' chaquele gonle to liža'anə' ža'?

Nada' bito chyazjda' yo'o gan' gona' dezcanz.

⁵⁰Nada' bena' yoguə'əte de'e zjəde.

⁵¹De'en cui chzenagle, de'en cui chejle'ele lo'o la'ažda'olen' naquə'chgualə benə' žod can' gwsa'ac de'e xaxta'ocho ca'. Cuiczə chzenagle che Spirit che Diozən'.

⁵²De'e xaxta'ocho ca' leczə boso'o'chi' boso'osaque'e de'e profet ca' benə' ca' gwso'e xtižə' Diozən' cana' na' gwso'ote' lega'aque' catə'an gwso'e dižə' can' selə' Diozən' Xi'ine'enə' ben' naquə le'ezelaogü'e benə' güen. Na' catə' bide'enə' le'e əbdelene' lao na' benə' ca' gwso'ote'ene'.

⁵³La'anə'əczə nombi'ale lein de'en bnežjw angl ca' de'e Moisezən' cana', bitoczə chzenagle chei.

Gwso'ote' Estebannə'

⁵⁴Na' catə' Estebannə' gože' lega'aque' ca' lechgualə

besə'əloque' xte gwsa'oxojə
leyga'aque'enə'. ⁵⁵Pero na'
Estebannə' chnabi'achgua Spirit
che Diozən' le', bcos laogü'e'en
chgüiachgü'e' yobalən' na' ble'ine'
yelə' chey che'eni' che Diozən' na'
ble'ine' zecha Jeso'osən' cuit Diozən'
chnabi'e txen len le'. ⁵⁶Nach
Estebannə' gwne': —Le'e ggüiašč
nla'axejə yoban' na' nla' zecha
Jeso'osən' ben' goljə beñach cuit
Diozən' chnabi'e txen len le'.

⁵⁷Nach beñə' ca' zjənžaguən'
chso'osya'adie' na' boso'oseyjuw
nagga'aque'enə' nach tšil'izə
ja'acdoe' gan' ze' Estebannə'.

⁵⁸Nach gosə'əbeje' Estebannə'
fuerlə syodan' na' boso'ošiče'ene'
yej. Na' beñə' ca' boso'ošičə le'
yejən' boso'onežjo xaga'aque'
de'en zjənchele'enə' to beñə' güego'
beñə' le Saul par nič gwdape'en.

⁵⁹Na' žlac choso'ošiče'e Estebannə'
yejən', Estebannə' bene' orasyonnə'
gwne': —Xana' Jeso'os, bezi' nada'
yoban'.

⁶⁰Nach bzo xibe' lao yon' na'
gwne' zižjo gwne': —Xana' bito
gwnežjo' castigw che beñə' quinga
de'en bagwso'onene' nada'.

Na' beyož gwne' ca', gote'.

**Saulən' blagzejə blagzide' beñə'
ca' chso'onlilažə' Jesocristən'**

8 ¹⁻²Na' beñə' ca' chso'onlilažə'
Jesocristən' Jerosalennə'
jəsə'əcuasə'e de'e Esteban', na'
gosə'əbežchgü'e' che'.

Na' ca naquə Saulən' ža,
gwyazlažə'e de'en gwso'ote' de'e
Estebannə'. Na' gwde gwso'ote'
de'e Estebannə' beñə' blao ca'
gosə'əzolaogü'e' boso'olagzejə

boso'olagzide' beñə' ca' chəsə'ədopə
chəsə'əžag chso'elaogü'e'e
Jesocristən' Jerosalennə', na' zan
beñə' ca' chso'elao' Jesocristən'
besə'əxonje' ja'aque' do Jodean', do
Samarian', pero bito len apostol
ca'. ³Na' Saulən' gwzolaogü'e'
cheje' liž to to beñə' ca' chso'elao'
Jesocristən' chjəxobe' no beñə' byo
na' no no'olə par chche'e lega'aque'
ližyan'.

**Beñə' Samaria ca' gwse'enene' dižə'
güen dižə' cobə che Jesocristən'**

⁴Pero na' beñə' ca' chso'elao'
Jesocristən' lao besə'əxonje'
ja'aque' doxenlə jəsə'ədixju'i'e xtižə'
Jesocristən'. ⁵Na' to beñə' le Lip
beñə' lecəə chonlilažə' Jesocristən'
bžine' to syoda ga mbane Samarian'
na' be'e dižə' che Jesocristən'. ⁶Na'
bene' miłagr na' catə' besə'əle'ine'
miłagrən' de'en bene' len
lega'aque' beñə' zan besə'ədobə
boso'ozenague' che'. ⁷Bebeje'
de'e xio' ca' zjəyo'o zjəyaz lo'o
yichjla'aždao' beñə' zan, na' catə'
besyə'əchojən' chso'osya'adi'an. Na'
zan beñə' nat to part güejə cuerp
chega'aque'enə' beyone' na' beyone'
no beñə' coj. ⁸Na' lechgualə
besyə'əbei beñə' ca' ža' syodan'.

⁹Na' lao' syodan' zo to beñə'
gožə' beñə' le Simon. De'e zan de'e
bene' antslə de'e besyə'əbane beñə'
Samaria ca', bxoayague' lega'aque'
gože' de que naque' beñə' zaque'e.
¹⁰Na' žlac bene' de'e ca' yoguə'
beñə' lao' syodan' boso'ozenague'
che' tcho'a tšao', beñə' gol ca' na'
xte no bi'i xcuidə' na' gosə'əne' che':
—Lele bengan' nse'e yelə' guac che
Diozən'.

¹¹Zan iz boso'ozenagteze' che' chedə' bentontene' yichjla'ažda'oga'aque'enə' len yelə' goža' che'enə'. ¹²Pero catə' Lipən' gwdixjuile dižə' cobə che Jesocristən' len lega'aque' na' bzejni'ine' lega'aque' can' nabia' Diozən' notə'ətezə beṇə' soe' latjə, na' gwse'ejle'e che', na' gosə'əchoe' nis, beṇə' byo na' no'olə. ¹³Na' lenczə Simonṇə' gwyejle'e che', na' gwchoe' nis na' goque' tozə len Lipən' gwdalene' le', na' bebanene' ca naquə miḷagr ca' de'en chon Lipən' na' yeziquə'əchlə de'e zaquə' yebanczecho.

¹⁴Nach apostol ca' nitə' Jerosalennə' gwse'enene' de que beṇə' Samaria ca' bachoso'ozenague' xtižə' Diozən', nach boso'osele'e Bedən' len Juannə' Samaritan'. ¹⁵⁻¹⁶Na' catə' besə'əžine'enə' gwso'one' orasyonṇə' par niçh so Spirit che Diozən' lo'o yichjla'aždao' beṇə' Samaria ca', chedə' ca orən' bitonə' son lo'o la'ažda'oga'aque'enə' la'anə'əczə bagosə'əcho'e nisən' gosə'əne' so'onlilaže'e Jeso'osən'. ¹⁷Nach boso'oḁoa na' apostol ca' yichjga'aque'enə' par gwzo Spiritən' lo'o yichjla'ažda'oga'aque'enə'.

¹⁸Na' ble'i Simonṇə' can' chso'on apostol ca' choso'oḁoa ne'en yichj beṇə' par chzo Spiritən' len lega'aque', na' bšabene' lega'aque' mech. ¹⁹Gože' lega'aque': —Legon par niçh nada' gaquə xoə na'anə' yichj beṇə' na' so Spiritən' len lega'aque' can' chonle.

²⁰Nach Bedən' gože'ene': —Cuiayi'ilenə' xmecho'onə' de'en chonlizo' xbabən' de que guac

si'lo yelə' chnabia' che Diozən' len mech. ²¹Bito zaco'lo par gono' ca naquə de'e nga chonto' chedə' yichjla'ažda'ogo'onə' naquən mal lao Diozən'. ²²De'en cheyalə' gono', bediṇje ca naquə de'e malən' chono' na' gwnab goclen lao Diozən' par niçh yezi'ixene' chio' ca naquə xbabən' yo'lo lo'o yichjla'ažda'ogo'onə'. ²³Nacbia' chnabia' de'e malən' le' de'en yo'lo lo'o yichjla'ažda'ogo'onə' na' ngo'on le' nez malən' gan' cuiayi'o.

²⁴Nach Simonṇə' boži'en gože' le': —Lenab goclen lao Xanchon' par nada' niçh ni to de'e nga baçh gwnao' cui gaquəšga chia'.

²⁵Na' lao zjəya'ac Bedən' len Juannə' Jerosalennə' gwso'eche' xtižə' Diozən' len beṇə' ža' yež zan gan' mbane Samaritan' na' gwso'e dižə' can' bagoclen Diozən' lega'aque'.

Lipən' na' beṇə' Ethiopian'

²⁶Nach Xancho Diozən' bsele'e to angl par gože' Lipən': —Gwyej gan' xoa nez de'en chetj Jerosalennə' na' chden latjə dašən' par yež de'en nzi' Gasa. ²⁷⁻²⁸Nach Lipən' gwlo'e nezən' na' lao zde'enə' ble'ine' to beṇə' Etiopia zeyo'e to lo'o carret zeze'e gwyeye' Jerosalennə' je'elaogüe'e Diozən'. Le' naque' to beṇə' eunoco na' naque' tesorer che no'olə gwnabia' che beṇə' Etiopia ca' no'olən' le' Candase, na' yo'ote lao na' tesorerən' yoguə'əloḷte byen che no'olə gwnabia'anə'. Na' lao zeyo'e lo'o carretən' chlabe' libr de'en bzoj de'e profet Isaiazən' ben' be' xtižə' Diozən' cana'. ²⁹Nach Spirit che Diozən' gožən Lipən': —Jəyexen carretən' na' gwyejlene' txen.

³⁰Nach gwyejdoch Lipən' par jəyexene' carretən' na' benene' chlab ben' lībr de'en bzoj de'e profet Isaiazən'. Nach gože'ene': —¿Echejni'ido' de'en chlabo'onə'?

³¹Na' tesorerən' boži'en gože' Lipən': —¿Nacxa gaquə šejni'ida'anə'? la' caguə no nla' no əgwzejni'ine'en nada'anə'.

Nach gotə'əyoine' Lipən' par niç gwloə Lipən' gwche'elene'ene'.

³²Na' part de'en chlabe'enə' nyojən' nan:

Ca to xilə' bia nxobə beṇə' par gote'eb,
na' ca to xilə' dao' bia cui
chosya'a catə' chšibe'eb,
can' gone', bito bi əṇe' catə'ən
yesə'əzi'ichiže'ene'.

³³Na' yesə'əque'e yelə' bala'aṇ che'enə'.

Na' bito so'one' yelə' jostis che'
can' cheyalə' gaquən.
Na' tant beṇə' mal ša' ca
tyempən',
so'ote'ene' la'aṇə'əczə bito bi
de'e mal none'.

³⁴Nach tesorerən' gože' Lipən': — Benšga goclen gwna nada' no chein' na profetən' ca', ¿əche cuine'en ne' ca' o šə che beṇə' yoblə'?

³⁵Nach Lipən' gwzolaogüe' bzejni'ine' bi zejen part gan' chlab tesorerən' na' leczə gož Lipən' le' che dižə' güen dižə' cobə che Jeso'osən'. ³⁶Na' ca' chac besə'əžine' ga žia nis, nach tesorerən' gože' Lipən': —Nga žia nis. ¿Ecabi gaquə choa' nisən' na'a'?

³⁷Nach Lipən' gože'ene': —Šə chejli'o che Jesocristən' do yichj do lažo'o, gwaquə cho' nisən'.

Nach gwne': —Chejli'a de que Jesocristən' naque' Xi'īn Diozən'.

³⁸Nach bene' mendad bcuezə ben' chsa' carretən' len, nach betj Lipən' len tesorerən' jəsə'əžo'e lo'o nisən' par niç Lipən' bcho'ene' nis. ³⁹Na' catə' besyə'əchoje' lo'o nisən', Spirit che Diozən' le'e beche'ete Lipən' ga yoblə, na' bitoch ble'i tesorerən' le'. Na' mbalaz beza' tesorerən' beyo'e lo'o carretən'. ⁴⁰Nach Lipən' bžine' yež de'en nzi' Asoto na' gwzolaogüe' gwdiçjui'e dižə' güen dižə' cobə che Jesocristən' to to yež de'e zjəchi' galə'əzə xte bžinte' Sesarean'.

Diozən' bocobe'

yichjla'aždao' Saulən'

9 Na' Saulən' con chdacze' cho'e dižə' can' chene'ene' gote' beṇə' ca' chso'onjilažə' Xancho Jesocristən' na' chdacze' cheyiljlaže'e naclə gone' gote' lega'aque'. Na' de'e na'anə' gwyeje' lao beṇə' gwnabia' che bxoç che nasyon Izraelən'. ²Na' Saulən' gwṇabene' beṇə' gwnabia'anə' to yiš de'e goxe'e yoso'olab beṇə' ža' to to yo'odao' ca' nitə' Damascon' na' güe'en dižə' əṇan de que nape' yelə' gwnabia' par sene' beṇə' ca' bachso'onjilažə' Jesocristən' na' gwcheje' lega'aque' par əche'e lega'aque' Jerosalennə', la'anə' beṇə' byo o no'olə. ³Na' bnežjue'ene' yišən' nach gwlo'e nezən' na' bazon əžine' Damascon' catə' to de repentzə to be'eni' de'e za' yoban' gwyeçhən le'. ⁴Na' bgüixə' lao yon'. Na' lao de'enə' benene' che' to beṇə' le': —Saul, ¿bixchen' nlagzeje nlagzido' nada'?

⁵Nach Saulən' boži'en gože':
—¿No le' Señor?

Nach be'ena' gože'ene': —Nada' Jeso'osən' nlagzeje nlagzido'. Na' de'en chono' contr nada', chone zi' cuino' can' chac che to go'on bia'an chlibə lao ya la de'en zo lao garrošən'.

⁶Na' do chaž do chžebze' gože':
—Xana' Jeso'os, ¿bin' che'endo' gona'?

Nach Xanchon' gože'ene': —Beyas na' gweyē syoda Damascon' na' to beṇə' əne' le' de'en cheyałə' gono'.

⁷Na' beṇə' ca' žag Saulən' benit bečoł goc lo'o yichjla'aždaoga'aque'enə' de'e tant besə'əžebe' de'en goquən' na' de'en gwse'enene' xnen' na' cui no besə'əle'ine'. ⁸Nach beyas Saulən', pero catə' bexa jelaogüe'enə' con cuich ble'ine'. Na' beṇə' ca' nžague'enə' gws'o'oxe'e ne'ena' gosə'əche'ene' Damascon'. ⁹Na' šonə ža gwzoe' sin cui ble'ine' na' bito güe'ej gwdaogüe'.

¹⁰Na' zo to beṇə' chonlilažə' Xancho Jesocristən' Damascon' beṇə' le Ananias, na' Ananiasən' ble'idaogüe'ene' Xanchon'. Na' Xanchon' gože'ene': —Ananias.

Na' boži'en gože': —Nga zoa' Xana'.

¹¹Nach Xanchon' gože'ene': —Gwzoža' na' gweyē liž Jodas de'en zo lao lqueyən' de'en nzi' “De'e Licha”, na' nabo' to beṇə' le Saul beṇə' Tarso. Bachone' orasyon. ¹²Na' babena' par ble'idaogüe'ene' le' gwyo'o yo'o gan' zoe'enə' na' bxoə na'onə' jela'ogüe'enə' par nič yele'ine'.

¹³Nach Ananiasən' boži'en gože':
—Xana', babenda' beṇə' zan chso'e

xtižə' benga ca naquə de'e mal juisyən' babene' Jerosalennə' len beṇə' ca' bagwlejo' par zjənaque' lažə' na'onə'. ¹⁴Na' chəsə'əne' ze'e nga noxe'e yiš che bxoə əblao ca' par sene' yoguə'əloł neto' chonto' orasyon chołgüižto' le'.

¹⁵Nach Xancho Jesocristən' gože' Ananiasən': —Gweyē, la' bagwleja' Saulən' par nič šeje' entr beṇə' Izrael ca' na' beṇə' ca' cui zjənaquə beṇə' Izrael na' do lao rei par əgwzejni'ine' lega'aque' chia' nada'. ¹⁶Na' gwlo'ida'ane' ca naquə de'e yašə' de'e zi' de'e gaquə che' de'en əgwzenague' chia'.

¹⁷Nach Ananiasən' gweyeje' gan' zo Saulən' na' gwyo'e lo'o yo'onə' na' bxoə ne'ena' jelao Saulən' gože'ene': —Saul dao', Xancho Jeso'osən' ben' əbloe' laogüe' le' tnez gan' za'onə' babsəle'e nada' par zedəlanə'a le' par nič yele'ido' na' yedəṇabia' Spirit che Diozən' le'.

¹⁸Nach le'e besyə'əyinjte de'e ca' ža' jelaogüe' ca' zjənaquən ca no yid bdi'ej na' le'e bele'iteine'. Nach le'e gwzoža'ate' par gweyeje' gan' gwchoe' nisən'. ¹⁹Na' gwdechlə beyaogüe' na' beyaclaže'e. Na' bega'ane' Damascon' yeto čopə ža len beṇə' ca' chso'onlilažə' Xanchon'.

Saulən' be'e xtižə' Diozən' Damascon'

²⁰Na' lğüegwzə gwzoloə gweyeje' to to yo'odao' par be'e dižə' che Jeso'osən' de que naque' Xi'in Diozən'. ²¹Na' yoguə' beṇə' ca' chse'enene' dižə' de'en be'ena' chesyə'əbanene' na' chse' lježjga'aque': —¿Ecaguə bengan' chda choṇit chołane' beṇə' ca'

chso'on orasyonḡa' lao Jeso'osən'
Jerosalennḡa'? na' łacaguə par
na'aczən' bide' nga ḡa'a, par
əgwčheje' beḡə' ca' na' žjue'e
lega'aque' lao bχox əblao ca'?

²²Pero na' Saulən' tza tza
goquəch be'e dižə' len yełə' chnabia'
che Diozən' na' Diozən' goclene'ene'
par be'e dižə' che Jeso'osən' clar
de que naque' ben' bsełə' Diozən'
par chaclene' beḡachən', na' beḡə'
Izrael ca' ža' Damascon' bito
besə'əželene' bin' yesə'əne' chedə'
gwsa'acbe'ine' de que de'en che'e
lega'aque' naquən de'e li.

**Saulən' bito goque' lao na'
beḡə' Izrael contr che' ca'**

²³Na' catə' bagoc sša cho'elen
Saulən' beḡə' Damasco ca' xtižə'
Jesocristən' nach boso'oxia beḡə'
Izrael ca' so'ote' Saulən'. ²⁴Na'
gosə'ənite'e chsa'ape' to to cho'a
puert che ze'enə' de'en nyechj
syodan' par yesə'əzene' Saulən'
so'ote'ene' batə'ətezə yechoje' pero
na' Saulən' gocbe'ine' ca naquən'
bazjəchi'inaogüe'ene'. ²⁵Nach
beḡə' ca' chso'onłilaza' Jesocristən'
besyə'əletje'ene' le'e ze'enə' še'elə
besyə'əgüe'ene' to lo'o žomə cuent
goc bechoje' lao' syodan'.

Gwyej Saulən' Jerosalennḡa'

²⁶Na' catə' bežin Saulən'
Jerosalennḡa' gone'ene' lene' beḡə'
ca' chso'onłilaza' Jesocristən'
na', pero yoguə'əłole' besə'əžebe'
le', bito gwse'ejle'e šə de'e li
bachonłilaze'e Jesocristən'. ²⁷Nach
Bernaben' gwche'e Saulən' ja'aque'
gan' ža' apostol ca' na' be'elene'
lega'aque' dižə' can' goquə che

Saulən' lao ngüe'e nezən' zde'
Damascon' gože' lega'aque' de
que Xancho Jeso'osən' be'elene'
Saulən' dižə'. Na' leczə gož
Bernaben' lega'aque' de que
Saulən' babe'e xtižə' Jeso'osən'
Damascon' sin cui chžebe'. ²⁸Nach
apostol ca' gwse'ejle'e can' goc che
Saulən', nach gwzolao gw dalen
Saulən' beḡə' ca' chso'onłilaza'
Jesocristən' Jerosalennḡa'. ²⁹Na' sin
cui bi chaž chžebe' gwzolaogüe'
chzejni'ine' beḡə' Izrael ca' dižə'
che Xancho Jeso'osən'. Na' be'e
dižə' len beḡə' ca' chsa'ac por dižə'
griego, bzejni'ine' lega'aque' xtižə'
Diozən' clar, pero na' lega'aque'
gwse'enczene' so'ote'ene'. ³⁰Na'
gwsa'acbe'i beḡə' ca' chso'onłilaza'
Jesocristən' Jerosalennḡa' de
que beḡə' ca' bazjəchi'inaogüe'
so'ote'ene', nach gosə'əche'ene'
ja'aque' syoda Sesarean' na'
bosyo'osele'ene' par syoda Tarson'.

³¹Na' ca naquə beḡə' ca'
chəsə'ədopə chəsə'əžague'
chso'elaogüe'e Jesocristən' doxenłə
Jodean', Galilean' na' Samaritan'
gosə'ənite'e binło, notoch no no
boso'ochi' boso'osaguə' lega'aque',
na' gwyejəch gwso'onłilaza'əche'
Xancho Jeso'osən' na'
boso'ozenague' che' con bin'
bzejni'ine' lega'aque'. Na' Spirit che
Diozən' btipəchan lažə'aga'aque' na'
benən par gwyanga'aque'.

Beyaque ben' le Eneas

³²Ca naquə Bedən' cheje' to
to yež gan' ža' beḡə' ca' bagwlej
Diozən' par zjənaque' lažə' ne'enə'
par chjəlanə'e lega'aque', na' to ža
gwyejə' jəlanə'e beḡə' ca' ža' Lida.

³³Na' yež Lidan' jti'e to beṇə' le' Eneas, beṇə' bachac xon' iz die' camən' chedə' nat to part cuerp che'enə'. ³⁴Nach gož Bedən' le': —Eneas, Jesocristən' cheyone' le'. Gwyas na' btob xcamo'onə'.

Nach le'e gwyaste be'enə'. ³⁵Na' yoguə'əloḷ beṇə' ža' Lidan' na' beṇə' ža' yež de'en nzi' Saron besə'əle'ine' be'enə' babeyaquene', na' gosə'əbejyichje' costombr chega'aque' de'en zjənaogüe' par gwso'onlilaže'e Xancho Jesocristən'.

**Dorcasan' bebane' ladjo
beṇə' guat ca'**

³⁶Na' ca tyemp na' to syoda de'en nzi' Jope zo to no'olə le Tabita na' leczə le' Dorcas. Na' chonlilaže'e Jesocristən' na' zotezə zoe' chone' de'e güen, chaclene' no beṇə' yašə' beṇə' chyažj chchine. ³⁷Pero na' gocšene Dorcasən' na' gottechgüe' na' besyə'əguazje'ene' na' beyož na' gosə'əxo'ene' lo'o yo'o de'en naquə chop cuia. ³⁸Na' gaḷə'əzə chega'an yež Lidan' len Jopen' na' beṇə' ca' chso'elao' Jesocristən' Jopen' gosə'əneze'ene' de que Bedən' zoe' Lidan'. Nach bosə'osele'e chopə beṇə' jse'etə'əyoine' Bedən' gwse'ene': —Benšga goclen yo'o len neto' na'atec na'a.

³⁹Nach Bedən' le'e gwza'ate' gwyeye' len beṇə' ca', na' catə' besə'əžine' Jopen' gosə'əche'ene' lo'o yo'o gan' xoa beṇə' guatən' na' le'e gosə'əbiguə'əte yoguə' no'olə gozeb ca' laogüe'enə' chəsə'əbeže' choso'olo'ine' le' lachə' de'en ben de'e Dorcasən' lao bguane', no bestid na' no camis. ⁴⁰Nach Bedən' gwleje' yoguə'əloḷ beṇə' ca' chy'o'olə

na' bzo xibe' bene' orasyon. Na' beyechje' chgüie' cuerp che no'olən' na' gože'ene': —Tabita, gwyas.

Nach le'e beṇə'ate jelao de'e Dorcasən' chgüie' Bedən' na' le'e bebe'ete'. ⁴¹Nach Bedən' beṇə' ne'enə' bosəže'ene' nach goxe' no'olə gozeb ca' na' yeziquə'əchlə beṇə' ca' zjənaque' lažə' na' Diozən' na' blo'ine' lega'aque' de que babeban Dorcasən'. ⁴²Na' yoguə'əloḷ beṇə' Jopen' gwse'enene' rson can' goquən', na' beṇə' zanch gwso'onlilaže'e Xancho Jesocristən'. ⁴³Na' Bedən' bega'ane' Jopen' zan ža, gwzoe' liž to beṇə' le Simon, beṇə' gocol yid.

Bedən' na' Cornelion'

10 Na' Sesarea na' zo to beṇə' le Cornelio, naque' capitan che to gueyoa soldad, na' zjənzi'e "Beṇə' Italia". ²La'anə'əczə Cornelion' cui naque' beṇə' Izrael, txen len family che' ca' chso'elaogüe'e Diozən' na' Cornelion' zotezə zoe' chape' Diozən' respet na' chaclenteze' beṇə' yašə' beṇə' chyažj chchine, na' chontezə chone' orasyon lao Diozən'. ³Na' goc che' to ža do cheda šonə ble'idaogüe'ene' to angl che Diozən' gwyo'e gan' zo'enə' na' anglən' gože'ene': —Cornelio.

⁴Nach Cornelion' chgüiachgüe' lao anglən' na' do chžebe' gože'ene': —İBixan' ža Xana'?

Nach gož anglən' le': —Diozən' neze'ene' can' zotezə zo' chono' orasyon na' chnežjo' de'en chəsə'əyažje beṇə' yašə', na' Diozən' chene'ene' gaquəlene' le'. ⁵De'e nga gonon' na'a, bselə' beṇə' žjəsə'əxi'e

to beṇə' zo Jopen' beṇə' le Simon na' leczə le Bed. ⁶Zoe' liž to beṇə' gocol yid na' be'ena' leczə lie' Simon, na' liž ben' zon cho'a nisda'onə'. Na' Simon Bedən' əṇe' le' bin' cheyałə' gono'.

⁷Catə' beza' anglən' Cornelion' goxe' čhopə mos che' ca' na' to soldad beṇə' chaclen le', na' soldadən' leczə cho'elaogü'e Diozən'. ⁸Na' Cornelion' bzejni'ine' lega'aque' yoguə'əłolte can' goquən' nach bsele'e lega'aque' Jopen'. Na' gosə'əgü'e nezən' əzja'aque'.

⁹Na' beteyon' gałə'əzə bazja'aque' par yesə'əžine' lao' syoda Jopen' catə' Bedən' gwlo'e yichjo'o che yo'o gan' zo'ena' ca do gobiž par jene' orasyon'. ¹⁰⁻¹¹Na' lao chone' orasyonṇə' gwdonchgü'e xte gone'ene' gaogü'e lğüegwzə. Na' žlac chac de'en gaogü'e'ena' ble'idaogü'e'ene' le'e yoban' chetj ca to lachə' xen na' nchej dap squinten na' chetjən par lao yon'. ¹²Na' lo'inə' zjəža' yoguə' claste bia yixə' ža' yežlyon', bia žia tap ni'a ne'i na' bia zjənxobə le'i lao yon', na' len bia žia xile'e bia chaš le'e yoban'. ¹³Nach benene' gož Diozən' le': —Gwyas Bed na' bet bia ca' gwdao.

¹⁴Nach Bedən' gože'ene': —Bito gaoga'aca'ab Xana'. Ni šlinzə cuinə' gaogua' bia zban ca' zjənac ca' na' bia cui de lsens len lei cheto'onə' gaoto'.

¹⁵Nach Diozən' gože' le' de'e əgwchope: —Bian' bač gwnia' gaogo' bito əṇao' de que bia əzbanga'acquən'.

¹⁶De'e gwyon lase gož Diozən' le' ca' nach begüe lachə'ən le'e yoban'.

¹⁷Žlac chacžejlažə' Bedən' bi zejen

ca naquə de'en ble'idaogü'e'ene'ena' besə'əžin beṇə' ca' əbselə' Cornelion' cho'a puert che Simon gocol yidən' bagosə'əṇabe' gan' zo liže'ena'. ¹⁸Nach zižjo gosə'əṇabe' šə le na' zo to beṇə' leczə le' Simon Bed. ¹⁹Pero Bedən' nechone' xbab che de'en ble'idaogü'e'ene' catə'əczlə gož Spirit che Diozən' le': —Šonə beṇə' chəsyə'əyilje' le'. ²⁰Gwzoža' na' beyetj gwyejlenga'aque' na' bito gaquəžejlažə'o la'aṇə'əczə cui zjənaque' beṇə' Izrael la' nada' əbselə'əga'aca'ane'ena'.

²¹Nach Bedən' beyetje' jəšague' beṇə' ca' əbselə' Cornelion' nach gože' lega'aque': —Nga zoa', nadan' Simon Bedən'. ¿Bin' cheyilje nada'?

²²Nach gwse' beṇə' ca' le': —To capitan beṇə' le Cornelio əbselə'e neto'. Le' zdacze' chone' de'e güen na' cho'elaogü'e' Diozən', na' yoguə'əłol beṇə' Izrael ca' chso'e xtiže'e de que naque' beṇə' güen. To angl che Diozən' gože' le' deṇabe' šejo' liže'ena' nič əgwzenague' čhio' šə bin' yo'one'.

²³Nach gwlo'o Bedən' lega'aque' yo'o na' besyə'əga'anlene' le' tže'. Nach beteyon' Bedən' gwyase' gwyejlene' lega'aque' na' gwche' to čhopə beṇə' Jopen' beṇə' chso'onjilažə' Jesocristən'.

²⁴Na' ža əgwchop žei besə'əžine' Sesarean'. Na' Cornelion' bač ntobe' bišə ljuježje' na' beṇə' ca' nžaguəche' migw, baže'e liže'ena' chesə'əbeze'. ²⁵Na' catə' bžin Bedən' liž Cornelion' le'e bchojte Cornelion' bšague'ene' na' bzo xibe' laogü'e'ena' be'elaogü'e'ene'. ²⁶Na' Bedən' bosə'ože'ene' gože'ene': —Bezoža'. Leczə beṇə'ch nada'.

²⁷Na' ñe'e cho'elene' le' diž'ə̀ən ca' gwyo'e lo'o yo'on na' ble'ine' beṇə' zan baža' lo'o yo'onə'. ²⁸Nach gože' lega'aque': —Le'e ñezcele de que lei che neto' beṇə' Izrael nan de que bito cheyałə' šo'oto' liž beṇə' cui zjənaquə beṇə' Izrael na' nan bito cheyałə' gonto' txen len le'e cui nacle beṇə' Izrael. Pero bač bzejni'i Diozən' nada' de que ni tozə beṇə' cui cheyałə' gona' xbab che' de que naque' beṇə' zban par šo'a liže'enə'. ²⁹De'e na'anə' catə' bsełə'əle beṇə' ca' bedəsə'əxi' nada' bito goquəžejlaža'a šə naclə gona' sino babida' do laža'a na' na'a che'enda' ənezda' žbin' gwnio' nada'?

³⁰Nach Cornelion' gože'ene': —Na'a chac tap ža leczə do cheda šonə zoa' sin cui bi naogua', na' chona' orasyon liža' nga, catə'əczla ble'ida' to beṇə' byo laogua'anə' nyaze' to lachə' de'e chey che'eni'. ³¹Nach gože' nada': “Cornelio, ca naquə orasyon čio'onə' chono', bač bzenag Diozən' len na' ñezene' chnežjo' de'e chyažj chčhine beṇə' yašə'. ³²Bsełə' to čhopə beṇə' žjəsə'əxi'e to beṇə' zo Jopen' beṇə' le Simon Bed. Zoe' liž to beṇə' leczə le Simon, to beṇə' gocol yid. Liž beṇə' gocol yidən' zon gałə'əzə cho'a nisdə'onə'. Na' catə' la' Bedən' ližo' nga güe'elene' le' dižə'.” ³³Nachən' le'e bsełə'ətia' beṇə' ca' par bedə'əsə'əxi'e le', na' choxcwłentio' de'en bač bido'. Na' ñezce Diozən' de que yoguə'əto' nitə'əto' əgwzenagto' yoguə'əłolte de'en baben Diozən' mendad əṇao'.

Bedən' be'e dižə' liž Cornelion'

³⁴Nach Bedən' gwzolaogüe' be'e dižə'əṇ gwne': —De'e li bač ñezda'

notono nła' beṇə' əṇacho nzo Diozən' le' to šla'azə. ³⁵Sino que gatə'ətezə beṇə' ñasyon con beṇə' chso'elao' Diozən' do yičj do lažə'əga'aque' na' chso'one' de'e güen, Diozən' chebeine' lega'aque'. ³⁶Diozən' bsele'e Jesocristən' par naque' Xan yoguə'əłol beṇə', na' bsele'ene' entr neto' beṇə' Izrael, na' gwđixjue'ine' neto' de que guaquə soto' binlo len le' šə gonlilažə'əto' Xi'ine' Jesocristən'. ³⁷Ñezcele can' goquə Galilean' na' doxen Jodean'. De'e Juanna' gwđixjui'e xtižə' Diozən' na' bčhoe' beṇə' nis. Na' gwdechlə Jeso'os beṇə' Nasaretən' gwđixjui'e xtižə' Diozən'. ³⁸Diozən' gwleje' Jeso'osən' par chaclene' chio'o beṇə' na' be'ene' Spirit che'enə' na' yełə' chnabia'. Na' gwda Jeso'osən' bene' de'e güen na' beyone' yoguə'əłol beṇə' ca' chsaquə'əzi' gwxiye'enə', čhedə' Diozən' zoe' len le'. ³⁹Neto' ñezeto' na' cho'eto' dižə' ca naquə yoguə' de'e güenə' de'e ben Jeso'osən' na' de'en bsd blo'ine' Jodean' na' Jerosalennə', na' leczə ble'ito' can' gwso'ote'ene' bosə'ode'ene' to le'e yag coroz. ⁴⁰Pero na' Diozən' bolis bosbane'ene' ladjo beṇə' guat ca' beyon ža na' ben Diozən' par nič Jeso'osən' blo'e laogüe' neto'. ⁴¹Caguə yoguə'əłol beṇə' besə'əle'ine' Jeso'osən' catə'əṇ bebane' ladjo beṇə' guat ca', pero Diozən' gwleje' neto' par cho'eto' xtiže'enə' na' bene' par nič ble'ito'one'. Na' neto' güe'ej gwdaolento'one' txen gwde bebane' ladjo beṇə' guat ca'. ⁴²Na' Jeso'osən' bene' mendad čixjue'ito' beṇə' na' de que Diozən' əbzoe' le' par əčhoglaogüe'en che yoguə'əłol

benə' šə non' napə dolə', benə' ca' zjəmban na' benə' ca' bagwsa'at, na' neto' cho'eto' dižə' de que can' gone'. ⁴³Na' libr ca' de'en boso'ozoj yoguə' profet ca' benə' ca' gwso'e xtižə' Diozən' cana'ate zjənyojən chesə'ənan de que notə'ətezə benə' so'onlilažə' Jesocristən' Diozən' yezil'ixene' xtolə'əga'aque'enə'.

**Spirit che Diozən' gwyo'on
lo'o yichjla'aždao' baļə benə'
cui zjənaquə benə' Izrael**

⁴⁴Ne'e cho'ete Bedən' dižə'an ca' catə' Spirit che Diozən' gwyo'on lo'o yichjla'aždao' yoguə' benə' ca' choso'ozenag dižə' de'en cho'enə'. ⁴⁵Na' benə' Izrael ca' chso'onlilažə' Jesocristən', benə' ca' žag Bedən' catə'an besə'əžine' liž Cornelion', besyə'əbanene' de que Spirit che Diozən' gwyo'on lo'o yichjla'aždao' benə' ca' cui zjənaquə benə' Izrael. ⁴⁶Gwsa'acbe'ine' gwyo'o Spirit che Diozən' lo'o yichjla'aždao' benə' ca' ža' liž Cornelion' chedə' gwso'elaogüe'e Diozən' na' gwso'e gwde gwdeļə dižə' de'en cui gwse'ejni'ine'. ⁴⁷Nach Bedən' gože' benə' Izrael ca' žague': —Bito bi de de'e gwžon yesə'əchoa benə' quinga nisən', la' nacbia' bazo Spirit che Diozən' len lega'aque' can' zon len chio'o.

⁴⁸Nach Bedən' bene' mendad gosə'əchoe' nis par gosə'əneze benə' de que chso'onlilažə'e Jesocristən'. Na' gwsa'atə'əyoine' le' par bega'ane' yeto chopə ža.

**Bedən' gože' benə' Jerosalen
ca' can' goquən'**

11 Na' apostol ca' na' yeziquə'əchlə benə' ca' ža'

Jodean' benə' ca' chso'onlilažə' Jesocristən' gwse'ene' de que lecəə len benə' ca' cui zjənaquə benə' Izrael bachso'one čega'aque' xtižə' Diozən'. ²Nach Bedən' beze'e beyeje' Jerosalenə' gan' nitə' benə' Izrael ca' chso'onlilažə' Jesocristən' na' gwsa'acyože' le'. ³Gwse'ene': —čBixchen' bagwyejo' gan' ža' benə' ca' cui zjənaquə benə' Izrael na' jtaolenga'aco'one'? Malən' babeno'.

⁴Nach Bedən' gwzolaogüe' be'elene' lega'aque' dižə'an tcho'a tšao' ca naquən' goquə che', gože': ⁵—Lao zoa' lao' syoda Jopen' chona' orasyon Diozən' bene' par nič ble'idaogüe'eda' ca to lachə' xen nchej dapte squinei ca' chetjən le'e yoban' za'an gan' zo'anə'. ⁶Na' bgüiayanə'an na' ble'ida' lo'inə' ža'an bia yixə' ca' chaš yežlyon' bia žia tap ni'a ne'i, na' ble'ida' bia zjənxobə le'i lao yo, na' bia žia xile'e bia chaš le'e yoban' na' baļə bia ca' zjənacob bia əznia. ⁷Na' benda' gwna Diozən' nada': “Gwyas Bed, na' bet bia ca' gwdao.” ⁸Nach božia'an gwnia': “Xana', bito gaoga'aca'ab. Ni šlinzə cuiņə' gaogua' bia zban ca' zjənac ca' chedə' cui de lsens len lei cheto'onə'.” ⁹Na' de'e əgwchop lase Diozən' gwne': “Bian' bač gwnia' gaogo' bito əņao' de que zjənacob bia zban.” ¹⁰Šon š'i' gože' nada' ca' nach begüe lachə'an le'e yoban'. ¹¹Ze'e beyož ble'idaogüe'eda' de'enə' catə' bla'ac šonə benə' byo gan' zoa'anə' benə' za'ac Sesarean'. ¹²Na' Spirit che Diozən' bzejni'in nada' de que cheyaļə ša'alenga'aca'ane' sin cui gaquəžejlaža'a, na' gwčhi'a benə' bišə'əcho quinga xop gwyejto, na'

bžinto' Sesarean' liž ben' le Cornelio.

¹³Nach Cornelion' be'elene' neto' dižə' can' blo'e lao to angl le' liže'ene' na' anglən' gože'ene': "Bselə' beņə' əžja'ac syoda Jopen' žžəsə'əxi'e to beņə' le Simon Bed. ¹⁴Be'ena' əne' le' na' family čho' nac gonle par nič yechojle xni'a de'e malən'." ¹⁵Nach catə' bžina' liž Cornelion' gwzolaogua' bi'a dižə'ən len lega'aque', na' Spirit che Diozən' bedəson lo'o yichjla'ažda'oga'aque'ena' can' babedəson len chio'o. ¹⁶Nach jsa'alaza'a xtižə' Xancho Jesocristən' can' gwne': "De'e zaque'ena' can' ben Juannə' bchoe' beņə' nis, pero de'e zaquə'əche' gac chele ca de'en yedəso Spirit che Diozən' lo'o yichjla'ažda'olen' nabia'an le'e." ¹⁷Na' ca naquən' baben Diozən' par nič zo Spirit che'ena' lo'o yichjla'aždaoga'aque'ena' can' babene' len chio'o, nacia' zon len notə'ətezcho chonlilažə'əcho Xancho Jesocristən'. Na' inoxa naca' nada'anə' par gwžona' gon Diozən' de'en chene'ene' gone'?"

¹⁸Na' ca beyož bosə'ozenague' xtižə' Bedən' bitoch bi bi gosə'əne' contr Bedən' de'en gwyje' liž Cornelion', sino gwso'e yelə' choxwlen che Diozən', gosə'əne': —Na'a nezecho de que lecəə len beņə' ca' cui zjənaquə beņə' Izrael chazlažə' Diozən' yesy'ədinjene' xtolə'əga'aque'ena' nič əgwnežjue' yelə' mban zejlicane chega'aque'.

**Beņə' ca' chso'elao' Jesocristən'
Antioquian' gan' mbane Siria**

¹⁹Na' gwde gwso'ot beņə' blao che beņə' Izrael ca' Estebannə'

gosə'əzolaoga'aque' bosə'oči' bosə'osaquə'əchgüe' yeziquə'əchlə beņə' ca' chso'onlilažə' Jesocristən' nach beņə' ca' chso'onlilažə'ene' gwsa'asəläse', bale' ja'aque' do Fenisia, do Čhipre na' do Antioquia ga mbane Siria. Na' lao chesə'əde'ena' bosə'osed bosə'olo'ine' con beņə' zjənaquə beņə' Izrael xtižə' Jesə'osən', bito bosə'osed bosə'olo'ine'en beņə' ca' cui zjənaquə beņə' Izrael. ²⁰Pero na' to čhopə beņə' Čhipre na' beņə' Sirene beņə' chso'onlilažə' Jesocristən' catə' lecəə besə'əxonje' ja'aque' Antioquian', na' na' gosə'əzolaogüe' gosə'əyixjue'ine' beņə' ca' cui zjənaquə beņə' Izrael dižə' güen dižə' cobə che Xancho Jesocristən'. ²¹Na' Xancho' goclene' lega'aque' len yelə' guac che'ena' na' beņə' zan gosə'əbejyichje' costombr chega'aque' de'en zjənaogüe' na' gwso'onlilažə'e Xancho'.

²²Na' catə' gwse'ene beņə' ca' chso'onlilažə' Jesocristən' Jerosalennə' ca naquən' bachac Antioquian', nach bosə'ose'e Bernaben' par gwyje' Antioquian'.

²³Na' catə' bžin Bernaben' Antioquian' ble'ine' de que de'e li bagoclenchgua Diozən' beņə' ca', na' lechgualə bebeine'. Nach gwneyoine' lega'aque' nitə'ətezə nitelə yosə'ozenague' che Xancho' do yichj do lažə'əga'aque'. ²⁴Bernaben' naque' to beņə' güen, na' chonlilažə'əchgüe' Jesocristən' na' Spirit che Diozən' chnabia'an yichjla'aždaogüe'ena'. Na' de'e na'anə' zanch beņə' Antioquian' gwso'onlilažə'e Jesocristən'.

²⁵Gwde na' Bernaben' gwze'e zde' Tarson' par jəyedilje' Saulən',

nach catə' beželene' le', gwche'ene'
Antioquian'. ²⁶Na' gosə'anite'e
Antioquian' tğüiz gwsə'one'
txen len beṇə' ca' chəsə'ədopə
chəsə'əžag chso'elao' Jesocristən'
na' bosə'osed bosə'olo'ine' beṇə'
zanch. Na' Antioquia na'atequən'
gwzoloa bosə'osi'e beṇə' ca'
chso'onlilažə' Jesocristən' beṇə'
cristian chedə' choso'ozenague' che
Cristən'.

²⁷Lao nitə' Bernaben' na'
Saulən' Antioquian' besə'əžin
bałə beṇə' Jerosalen beṇə'
chsa'aš choso'ozenene' de'en
bagož Diozən' lega'aque'. ²⁸Na'
entr beṇə' ca' besə'əžinnə' to
beṇə' le Agabo gwzeche' lao
beṇə' ca' zjəndopə zjənzag
chso'elao' Jesocristən' be'e
dižə' can' babzejni'i Spirit che
Diozən' le' de que doxenlə
yežlyon' gatə' to bgüin juisy.
Na' catə' bžin ža gwnabia' ben'
le Claudio doxen gan' mbane
Roma, cana' goc bgüinnə' can'
gwna Agabon'. ²⁹Nach beṇə' ca'
chəsə'ədopə chəsə'əžag chso'elao'
Jesocristən' Antioquian'
bosə'oxi'e yesə'ətobe' mech par
niç yosə'əsele'en əsa'aclene'
beṇə' ljezejga'aque' ca' chso'elao'
Jesocristən' gan' mbane Jodean'.
Na' bosə'oxi'e de que to toe'
yosə'onežjue' segon ja'acquə'ətə'
de'e gaquə yosə'onežjue'. ³⁰Na'
gwsə'one' can' bosə'oxi'ena'
nach bosə'osele'e Saulən'
len Bernaben' Jodean' par
jəsə'ənežjue' mechən' beṇə' ca'
zjənaque' comisyon che beṇə'
ca' chso'onlilažə' Jesocristən'
Jerosalennə'.

Gwsə'ote' Jacobən' na'
gosə'əyixjue' Bedən' ližyan'

12 Na' ca tyempən' Rei
Erodən' bene' contr beṇə'
ca' chso'onlilažə' Jesocristən' na'
bene' mendad gosə'əzene' bałə'
na' bosə'oçhi' bosə'osaque'e
lega'aque'. ²Nach bene' mendad
gwsə'ote' Jacob beṇə' bišə' Juannə'
gosə'əçogue' yene'en len spad. ³Na'
gocbe'i Rei Erodən' chesyə'əbei
beṇə' Izrael ca' de'en bene' mendad
gwsə'ote' Jacobən', nach bene'
mendad gosə'əzene' Bedən' catə'
bžin tyemp che lni pascon', lnin'
catə'an chsa'ogüe' yetxtil de'en
cui bi xne'i nçhiçə. ⁴Nach Erodən'
gwdixjue' Bedən' ližyan' na' bsele'e
ši'into soldad beṇə' gwsa'ape'
ližyan', tap güeje' do ža do yel.
Erodən' bene' xbab cueje'ene'
ližyan' te lni pascon' par gone' yelə'
jostis che' lao lcue' na' so'ote'ene'.
⁵Soldad ca' gwsa'apə'əçhgüe' Bedən'
lao die' ližyan', pero na' ca naquə
beṇə' ca' chso'onlilažə' Jesocristən'
gwsə'onchgüe' orasyon lao Diozən'
par Bedən'.

Diozən' bebeje' Bedən' ližyan'

⁶Na' to že' ca gwxezə ngüia
Erodən' cueje' Bedən' ližyan' par
so'ote'ene', Bedən' de' chtase' ladjo
çhopə soldad na' ncheje' çhopə
gden, na' leczə nitə'əte soldad beṇə'
chsa'ape' cho'a puert che ližyan'.
⁷Catə'əczla to de repentzə to angl
beṇə' bselə' Xancho Diozən' bžine'
lo'o ližyan' gan' de Bedən', na'
gwy'e'eni'ichgua lo'o ližyan'. Anglən'
bte' cuit le'e Bedən' bosbane'ene'
gože'ene': —Na'atec na'a gwyas.

Na' lao or na' le'e besyə'əyēz̄te gden̄ə' z̄jənchej na' Bedən'. ⁸Nach gož anglən' le': —Bego'o doby chio'onə' na' bolej xelo'on.

Nach ben Bedən' ca'. Nach goze' anglən' le': —Bechelə xadon chio'onə' na' beyo'o len nada'.

⁹Nach bechoj Bedən' zenaogü'e'ene', pero bito gocbe'ine' šə de'e li angl nan' chon ca' len le', con goquene' šə chle'ida'ogü'e'ene'.

¹⁰Beyož besyə'əd̄ie' chop cuente gan' nitə' soldad ca' chsa'ape' ližyan', besyə'əžine' gan' zo puert saguannə' de'en naquə de ya gan' chəsə'əchoje' par chja'aque' lao syodan', con to gwłazə puertən' byaljon par nič besyə'əchoje', na' ca to cuadr babesə'aque' nach anglən' bocua'aŋe' Bedən' toze'.

¹¹Cana'ach gocbe'i Bedən' de que de'e li babechoje' ližyan', nach gwne': —Bacheyacbe'ida' de'e liczə Xana' Diozən' babsele'e angl che'ena' par bosle' nada' lao na' Erodən' na' lao de'e ca' chsa'aque beŋə' Izrael gwłaz chia' ca' so'one' len nada'.

¹²Na' ŋechonte Bedən' xbabən' ca' gwze'e gwyeje' liž Maria xna' Juan ben' leczə le Marcos. Na' liž Maria na' zjəndopə zjənžag beŋə' zan chso'one' orasyon. ¹³Nach bsiže' cho'a puert saguannə' na' le'e bchojte to bi'i no'olə le Rode par jəgüiabo' no de'ena'. ¹⁴Na' catə' bžimbo' par əsaljwbo' puertən' beyombia'abo' ši'i Bedən' na' de'e tant bebeibo' bito bsaljwbo' puertən' sino beyejdobo' gan' ža' beŋə' ca' jəyeyežbo' lega'aque' de que Bed nan' zecha cho'a puertən'.

¹⁵Nach beŋə' ca' gwse'e: —ĉEcaguə chac tonto'onə'?

Pero lebo' gwzoczbo' segor de que le'ena'. Nach lega'aque' gwse'ebo' de que to angl beŋə' chapə chye' Bed na'anə'.

¹⁶Pero Bedən' ŋe'e chsižcze' cho'a puertən'. Nach ja'aque' par bososaljue'. Catə'əczla besə'əle'ine' de que le'ena' besyə'əbanene' xte juisy. ¹⁷Nach Bedən' bene' seņy len ne'ena' par nič gwnite'e žizə bosozenague' be'e dižə' can' goquə bebej Xancho Diozən' le' ližyan'. Nach leczə gože' lega'aque' de que cheyałə' yesə'əzenene' Jacobən' na' yeziquə'əchlə beŋə' ljuežjga'aque' ca' can' bagoquən'. Nach beze'e zjəyede' ga yoblə.

¹⁸Nach catə' gwye'eni'inə' yełə' goban juisy gwnite' soldad ca' na' gwso'echgüe' dižə' gosə'əne' bixaczxa goquə len Bed na'anə'. ¹⁹Na' ca naquə Rei Erodən', bene' mendad jəsyə'əd̄ilje' Bedən' na' gwŋabene' soldad gop ca' nac goquən' bele'. Pero soldad ca' bitobirson bosonežjue'. Nach bene' mendad gwso'ote' soldad ca'. Nach gwza' Erodən' Jodean' par jzeo' Sesarean'.

Got Rei Erodən'

²⁰Erodən' ža, chža'achgüe' beŋə' Tiro na' beŋə' Sidon ca'. Beŋə' ca' besə'əyaz̄jene' yesə'əzi'e de'en əse'ej əsa'ogüe' gan' chnabia' Erodən'. De'e na'anə' bosocodə ljuežj beŋə' Tiron' na' beŋə' Sidon ca' par jəsə'ənežjue' Blaston' to regal, ben' naquə lao ne'i liž Erodən' nach Blaston' gwne' fabor lega'aque' lao rein'. Gwso'one' ca' par nič bzenag rein' čhega'aque' catə' ja'aque' laogüe'ena' jəsə'əŋabe'

yesyə'ənite'e binlo len le'. ²¹Nach Rei Erodən' b'zie' bia' to ža əgwto'be' lega'aque' par əgwzoe' lban laoga'aque'enə'. Na' catə' b'žin žan' rein' gwyaze' xalane'e de'en naquə xoche de'en chaze' catə' chone' yelə' jostisən' nach gwchil'e xišne'e gan' chnabi'e na' bzoe' lban lao beṇə' ca' že'e ža'anə'. ²²Nach beṇə' ca' gwsə'osye'e gosə'əne': —Diozən' cho'e dižə' caguə beṇə'chən'.

²³Na' lao or na' bselə' Xancho Diozən' to angl par ničh bene' ca gocšene rein' gwžia bel' bia lo'o le'enə' na' gote'. Goc che' ca' chedə' be'e latjə gwsə'elao' beṇə' le' lgu'a'əso'elao'gü'e Diozən'.

²⁴Pero ca naquə xtižə' Xancho Jesocristən' gosə' gwla'ljəchən na' beṇə' zanch gwse'ejle'e chein'.

²⁵Na' Bernaben' len Saulən' beyož gwsə'one' yoguə' de'en naquə so'one' Jerosalennə' nach besa'aque' jəya'aque' Antioquian'. Na' gosə'əche'e to beṇə' le Juan na' lete' Marcos.

**Bernaben' na' Saulən'
ja'aque' jəsə'ədixjui'e xtižə'
Jesocristən' yež zitə'**

13 Na' entr beṇə' ca' chəsə'ədopə chəsə'əžag chso'elao'gü'e Jesocristən' Antioquian' zjəlen beṇə' chəsə'əzenene' beṇə' yoblə bi de'e che'e Diozən' lega'aque', na' zjəlen beṇə' choso'osed choso'olo'ine' xtižə' Diozən'. Na' lega'aque' Bernaben', na' Simon ben' zjənsi'e Negr, na' Losio beṇə' Sirene, na' Saul, na' Manaen. Na' Manaennə' bgolə gwcha'ogü'e txen len Rei Erodən' ben' gwnabia' Galilean'.

²Na' to ža cui bi zjəne'ej zjənao beṇə' ca' chso'onlilažə' Jesocristən', zjəndopə zjənžague' chso'one' orasyonṇə'. Catə'əczla gož Spirit che Diozən' lega'aque': —Lecuej Bernaben' len Saulən' par so'one' xšina'anə' con gatə'ətežə selə'əga'aca'ane'. ³Nach beṇə' ca' gwsə'onche' orasyonṇə' sin cui zjəne'ej zjənaogü'e, nach bosə'o'xoə na'aga'aque'enə' yičhj Saulən' len yičhj Bernaben'. Gwsə'one' ca' par gosə'əgü'e xšin Diozən' lao na' Bernaben' len Saulən'. Gwde na' bosə'ozeine' lega'aque' dižə'.

**Apostol ca' gwsə'e xtižə'
Jesocristən' Čhipre**

⁴Nach Spirit che Diozən' bselə'əen Bernaben' len Saulən' yež gan' nzi' Seleusia. Na' na' gwsə'e lo'o barcon' par besə'əžine' Čhipre. Na' Čhipren' naquən to isla de'en chi' lo'o nisdə'onə'. ⁵Besə'əžine' yežən' nzi' Salamina gan' mbane Čhipren' na' gosə'əzolaogü'e gosə'əyixjui'e xtižə' Diozən' lo'o yo'oda' che beṇə' Izrael ca'. Na' zjənche'e Juan ben' leczə le Marcos par chaclene' lega'aque'. ⁶Na' ca' gwsə'aše' gosə'ədie' doxen Čhipren' par besə'əžine' gan' ne' Pafos. Na' Pafos na' jəsə'ədie' to beṇə' goža' le' Barjesos. Naque' beṇə' Izrael na' chxoayague' ne' de que chzenene' bi de'en che' Diozən' le'. ⁷Barjesosən' naque' migw che gobernador ben' le Sergio Paulo. Sergio Paulən' naque' to beṇə' chejni'ichgüei. Na' le' goxe' Bernaben' na' Saulən' chedə' gone'ene' yoso'ozenene' le' xtižə' Diozən'. ⁸Na' Barjesosən' leczə nzi'

yeto le Elimas, zejen dižə' beṇə'
goža'. Le' gone'ene' cui šejle' Sergio
Paulən' xtižə' Bernaben' na' Saulən'.
Nach bžone' par cui yoso'osed
yoso'olo'i beṇə' ca' xtižə' Diozən'.

⁹Na' ca naquə Spirit che Diozən'
chnabia'achguan yichjla'aždao'
Saulən', ben' leczə le Pab, nach bcos
laogüen' bgüiachgüe' Elimasən'.

¹⁰Nach gože'ene': —Naco' xi'in
gwxiye'enə' yelə' goxoayag chio'onə'
na' yelə' beṇə' mal chio'onə'. Bito
chazlažo'o bitə'atezə de'e güennə'
na' bito chbezo' can' chžono'
yesə'ənao beṇə' dižə' li che Xantə'
Diozən'. ¹¹De'e na'anə' Xantə'
Diozən' gone' castigw chio' na'
əcholo' to tyemp, cui gaquə le'ido'
be'eni'inə'.

Nach le'e əgwchołte', gwde ca
to bejw lo'o jelaogüe'enə', nach
gwzolaogüe' chgan chtobe' cheyilje'
no goxə' ne'enə' par yegüe'ene'
nez. ¹²Gobernadorən' ble'ine' can'
goquən' na' gwyejle'e xtižə' Xancho
Jesocristən', na' bebanchgüeine'
can' nanə'.

**Pabən' na' Bernaben' ja'aque'
Antioquia gan' mbane Pisidia**

¹³Nach Pabən' len beṇə' ca'
nžague'enə' besa'aque' Pafosən'
gwso'e lo'o barcon' par besə'əžine'
gan' nzi' Perge distrit che Panfilia.
Na' Juan ben' leczə chse'e Marcos
gwlejjyichje' lega'aque' beyeje'
Jerosalennə'. ¹⁴Na' Pabən' len
Bernaben' gwsa'aque' Pergen' na'
besə'əžine' Antioquian' distrit
che Pisidia. Na' catə' bžin ža
dezcanzən' ja'aque' yo'oda'onə' na'
jesə'əchi'enə'. ¹⁵Na' ca beyož bguab
libr gan' nyoj lei che Diozən' na'

de'en boso'ozoj de'e profet beṇə'
ca' gwso'e xtižə' Diozən' cana',
beṇə' ca' zjənaquə gwnabia' che
yo'oda'onə' boso'osele'e to beṇə'
gan' chi' Pabən' len Bernaben' na'
gože' lega'aque': —Beṇə' bišə' šə de
bi dižə' chene'ele güe'ele əneyoile
beṇə' quinga, guaquə ənalən n'a.

¹⁶Nach gwzoža' Pabən' na' bene'
señy len ne'enə' par ničh nite'e žizə
yoso'ozenague', nach gwzolaogüe'
gwne': —Le'e beṇə' Izrael na'
notə'atezəchle chaple Diozən'
respet, le'e gwzenag. ¹⁷Ca naquə
Diozən' ben' cho'elao' chio'o beṇə'
Izrael gwleje' de'e xaxta'ocho ca'
par bene' lega'aque' to nasyon xen
catə'ən ne'e nite'e zjənaque' beṇə'
zitə' Egipton', pero bžin ža bebej
Diozən' lega'aque' Egipton' len
yelə' guac che'enə'. ¹⁸Na' ca čhoa
iz bguo'o bchejlaže'e len lega'aque'
žlac gwsa'aše' latjə dašən'. ¹⁹Diozən'
bonitlaogüe' gažə nasyon gan' ne'
Canaan par ničh bnežjue' de'e
xaxta'ocho ca' yežlyon'. ²⁰Diozən'
bene' ca gosə'əde tgüejə tgüejə
beṇə' gwnabia' ca' gwso'on yelə'
jostis čhega'aque'enə' lao tap
gueyoa šiyon iz, xte bžinte tyemp
che de'e profet Samuelən' ben'
be' xtižə' Diozən' cana'. ²¹Nach
gosə'ənabe' so to rei par nabi'e
lega'aque' na' Diozən' bnežjue'
lega'aque' Rei Saulən' par gwnabi'e
čhoa iz. Saulən' goque' xi'in ben'
gwle Sis, beṇə' goljə lao dia che
Benjamin. ²²Gwde na' Diozən'
bocui'iže'e Saulən' nach bzoe' Rei
Dabin' xi'in Jese par gwnabi'e.
Na' Diozən' gwne' che Rei Dabin':
“Bač ble'ida' Dabi xi'in Jesen',
yichjla'aždaogüe'enə' naquən tozə

len yichjla'aždaogua'anə'. Le' gone' yoguə'əloj can' che'enda'anə'."

²³Nach lao dia che Rei Dabin' gwlej Diozən' Jeso'osən' na' bene' par niçh chac yebeje' chio'o beṇə' Izrael xni'a de'e malən' can' bene' lyebe. ²⁴Antslə ze'e solao əgwsed əgwlo'i Jeso'osən', de'e Juannə' gwidxjui'e lao yoguə' beṇə' Izrael ca' de que cheyalə' yesyə'ədinjene' xtolə'əga'aque'enə' na' yesə'əchoe' nis. ²⁵Na' catə' bžin ža beyož ben de'e Juannə' yoguə'əloj de'en yo'o lao ne'e gone', gože' beṇə' ca': "Nada' bito naca' ben' chonle xbab naca'. Caguə nada'anə' ben' chbezle par gaquəlene' nasyon chechon'. Ze'e za' be'ena' na' de'e tant zaquə'əche' ca nada' xte bito zaca'a par lechja' xele'enə'."

²⁶Beṇə' bišə', chio'o naccho xi'in dia che de'e Abraannə' na' entr chio'o nitə' yebałə beṇə' chsa'apə Diozən' respet la'anə'əczə cui zjənaque' beṇə' Izrael. Par chio'onə' bsełə' Diozən' dižə' can' gonlilažə'əcho Jeso'osən' par yebeje' chio'o xni'a de'e malən'. ²⁷Beṇə' Jerosalen ca' na' beṇə' gwnabia' chega'aque' ca' bito gwsa'acbe'ine' de que Diozən' bsele'e Jeso'osən'. Bito gwse'ejni'ine' de que che Jeso'os nan' boso'ozoj de'e profet ca' beṇə' ca' gwsə'e xtižə' Diozən' cana' le'e libr ca' choso'olabe' lo'o yo'odao' ca' yoguə' ža dezcanz. Na' de'en gosə'əchoglaogüie'en gwsə'ote' Jeso'osən' goc complir can' nyojən. ²⁸Sin cui bi xtolə' Jeso'osən' gotə', gosə'əṇabene' Pilatən' gone' mendad so'ote'ene'. ²⁹Beyož gwsə'one' complir yoguə'əlojte segon can' nyoj Xtižə'

Diozən' gaquə che', besə'əžin beṇə' bosyo'oletje'ene' le'e yag corozən' na' bosə'əcuasə'ene'. ³⁰Pero na' Diozən' bolis bosbane'ene' ladjo beṇə' guat ca'. ³¹Na' nitə' beṇə' ca' əja'aclen Jeso'osən' Galilean' par Jerosalennə' na' beyož bebane' ladjo beṇə' guat ca' gwdalene' lega'aque' zan ža. Na' lega'aque'enə' chso'elene' beṇə' dižə' de que de'e li mbancze'enə'.

³²De'e na'anə' leczə neto' chyixjue'ito' le'e dižə' güen dižə' cobə che Jeso'osən' par niçh ənezele de que bach goc complir lyebe de'en ben Diozən' len de'e xaxta'ocho ca'. ³³Na' chio'o naccho xi'in dia chega'aque'enə' nezecho baben Diozən' complir lyebe de'en bene' len lega'aque' ca de'en bolis bosbane' Jeso'osən'. Goc can' nyojən' le'e Salmo əgwchopen' nan: "Le' naco' xi'ina'. Neža babena' par niçh solao nabi'o len nada'." ³⁴Na' nyojəchczə Xtižə' Diozən' ga yoblə nan: "Gona' güen len le'e can' bena' lyebe len de'e Rei Dabin'." Na' de'en nan ca' zejen de que Diozən' gwne' yolis yosbane' Jeso'osən' ladjo beṇə' guat ca' na' bitoch güe'e latjə gat Jeso'osən' de'e yoblə. ³⁵Le'egatezə ca' yeto part yoblə che Salmosən' nan: "Nezda' bito go'o latjə gožə' cuerp chia'anə', nada' naca' xi'ino' na' naquə la'aždaogua'anə' xi'ilažə' juisy." ³⁶Žlac bguan de'e Rei Dabin' ža, goclene' de'e xaxta'ocho ca' con can' gone'e Diozən', na' catə' gote' boso'ocuasə'ene' ga bazjəngasə' de'e xaxta'ocho ca' bagwsa'at, na' gožə' cuerp che'enə'. De'e na'anə' nezecho de que caguə nyoj Salmosən' che cuine'en. ³⁷Jeso'osən'

ben' bolis bosban Diozən', le'enə'
 cui gožə' cuerp che'enə'. ³⁸Na'
 cheyalə' ənezele beṇə' bišə',
 Jeso'osən' ben' cho'a dižə' chei
 chezi'ixene' xtolə' beṇə' ca'
 chso'onlilažə' le'. ³⁹Bito chac nitlao
 xtolə' chio'o beṇəch por ni che
 choncho bi de'en na lei de'en bzoj
 de'e Moizezən', pero notə'ətezcho šə
 chonlilažə'acho Jesocristən', Diozən'
 chnitlaogüe' xtolə'acho ca'. ⁴⁰Le'e
 gapə cuidad par cui gac chele can'
 bosə'ozoj de'e profet ca' beṇə' ca'
 gwso'e xtižə' Diozən' cana' gan'
 nan:

⁴¹Le'e gon xbab, le'e chonle borl,
 gwžin ža cuiayi'ile por ni che
 de'e cui chejle'ele.

Le'e yebane, chedə' nada'

Dioz ze'e gona' de'e zaquə'
 yebanele tyemp nga zole na'a,
 na' bito šejle'ele la'anə'əczə' šə
 no əṇa le'e can' gaquən'.

Can' gwna Pabən' bzejni'ine' beṇə'
 ca' ža' lo'o yo'oda'onə'.

⁴²Beyož bzejni'i Pabən' beṇə'
 Izrael ca' nach besyə'achoje'
 lo'o yo'oda'onə'. Beṇə' ca' cui
 gwsa'alje' beṇə' Izrael sino
 gwso'on cuinga'aque' beṇə' Izrael
 gwsa'atə'əyoine' Pabən' len
 Bernaben' par əžja'aque' de'e
 yoblə yežag xman ža dezcanzən'
 žžəsə'əzejni'ine' lega'aque' de'e yoblə.

⁴³Beṇə' zan beṇə' Izrael ca' na' beṇə'
 zan beṇə' bagwso'on cuinga'aque'
 beṇə' Izrael gwse'ejle' de'en
 choso'osed choso'olo'i Pabən' len
 Bernaben' catə'an besyə'əžəše'. Na'
 Pabən' len Bernaben' gosə'aneyo'ine'
 lega'aque' par nič nitə'ətezə nite'e
 so'onlilažə'e Jesocristən' ben' bsele'
 Diozən' par chaclene' chio'o.

⁴⁴Na' catə' bežag xman ža
 dezcanzən', casi yoguə'əloł
 beṇə' lao' syodan' besə'əžag
 par bosə'ozenague' xtižə'
 Diozən'. ⁴⁵Pero beṇə' Izrael ca'
 cui chso'onlilažə' Jesocristən'
 besə'əle'ine' catec beṇə' zannə'
 nžag na' gwsa'acxi'ine', nach
 gosə'ənelaogüe' contr Pabən' na'
 gwso'onle'ega'aque' che dižə'an
 chzejni'i Pabən'. ⁴⁶Nach Pabən'
 len Bernaben' sin cui chəsə'əžebe'
 gwse'e beṇə' ca': —Babento'
 complir can' gone'e Diozən'
 babzejni'ito' zgua'atec le'e nacle
 beṇə' Izrael xtiže'enə'. Pero na'
 de'en cui chene'ele əgwzenagle
 ža, zeje dižə' de que bito chene'ele
 gatə' yelə' mban zejlicane chelen'
 na' de'e na'anə' əgwzejni'ito'on
 beṇə' ca' cui zjənaquə beṇə'
 Izrael. ⁴⁷Xanto' Diozən' bačh bene'
 mendad gonto' can' nyojən nan:

Bačh nzoa' le'e par co'ole be'eni'
 chia'anə' lo'o yichjla'aždao'
 beṇə' ca' cui zjənaquə beṇə'
 Izrael

par nič beṇə' ca' ža' doxenlə
 yežlyon' əsa'acbe'ine' naclən
 so'one'

nič yesyə'achoje' xni'a de'e
 malən'.

⁴⁸Na' beṇə' ca' cui zjənaquə
 beṇə' Izrael beyož gwse'ene'ene'
 gwne' ca' besyə'əbeine' nach
 gosə'əne' güenchguacən' naquə
 xtižə' Diozən'. Nach yoguə' beṇə'
 ca' bagwlej Diozən' par gatə' yelə'
 mban zejlicane chega'aque'enə'
 gwso'onlilažə'e Jesocristən'. ⁴⁹Ca'
 goquə gosə' gwlaljə xtižə' Xancho
 Jesocristən' doxen distritən'.

⁵⁰Pero na' beṇə' Izrael ca' cui

gwso'onlilažə' Jesocristən' bosota
 bosone' beṇə' blao che syodan'
 na' no'olə əblao ca' zjənaochgua
 costombr che beṇə' Izrael ca'
 par niç bosyo'olague' Pabən'
 len Bernaben' na' besyə'əbeje'
 lega'aque' fuer syodan' na' distritən'.
⁵¹Nach Pabən' len Bernaben'
 bososi'ins ni'aga'aque' par
 bežib bište yon' de'en žiannə'.
 Gwso'one' ca' par bosolo'e de
 que bito zjənapə' dolə' de'en cui
 chse'ene beṇə' ca' yoso'ozenague'
 che Diozən', nach besa'aque'
 jəya'aque' gan' ne' Iconio. ⁵²Pero
 beṇə' ca' chso'onlilažə' Jesocristən'
 gwnitə'əchguacze' mbalaz, na'
 Spirit che Diozən' gwnabia'an yichjl
 a'ažda'oga'aque'enə'.

**Pabən' na' Bernaben'
 besə'əžine' Iconion'**

14 Na' goquən' besə'əžin Pabən'
 len Bernaben' Iconion' na'
 ja'aque' yo'odao' che beṇə' Izrael
 ca' par gwso'e xtižə' Jesocristən'
 len beṇə' ca'. Na' Spirit che Diozən'
 goclenən lega'aque' par gwso'e
 dižə'ən, na' beṇə' zan beṇə' Izrael
 ca' gwso'onlilaže'e Jesocristən' na'
 leczə zan beṇə' cui zjənaquə beṇə'
 Izrael gwso'onlilaže'ene'. ²Pero
 beṇə' Izrael ca' cui gwso'onlilažə'
 gosə'əgo'oyele'e beṇə' ca' cui
 zjənaquə beṇə' Izrael par niç
 gwso'one' xbab mal contr Pabən'
 len Bernaben'. ³Na' ca naquə beṇə'
 zan bagwso'onlilažə' Jesocristən'
 Iconion', Pabən' len Bernaben'
 besyə'əga'ane' sša syoda Iconion'
 par gwso'ecze' xtižə' Xancho
 Jesocristən' sin cui besə'əžebe'.
 Na' Xancho Jesocristən' goclene'

lega'aque' len yelə' guac che'enə'
 par niç gwso'one' miłagr na'
 bichlə de'e besyə'əbane beṇə' niç
 ca' gwsa'acbeine' de que dižə' lin'
 chsoe' Pabən' len Bernaben' na' de
 que lechguale nži'ilažə' Xancho
 Jesocristən' benəçən'. ⁴Na' beṇə'
 ca' ža' lao' syodan' gwsa'aque'
 çhoplə. Bałe' gosə'əde'e beṇə' Izrael
 ca' na' bałe' gosə'əde'e apostol
 Pabən' len Bernaben'. ⁵Nach yoguə'
 beṇə' ca' cui gwsa'azlažə' can'
 choso'osed choso'olo'i apostol ca',
 beṇə' Izrael ca' na' beṇə' ca' cui
 zjənaquə beṇə' Izrael, gosə'anite'e
 yelə' goxia' len jostis ca' par so'one'
 contr Pabən' len Bernaben' na'
 yoso'ošize'e lega'aque' yej. ⁶Pero
 ca naquə Pabən' len Bernaben'
 gwsa'acbeine' can' bazjəngüia beṇə'
 ca' so'one' len lega'aque', nach
 besyə'əsa'aque' jəya'aque' gan' ne'
 Listra na' Derbe, na' yeziquə'əchlə
 yež ca' gan' mbane Licaonia. ⁷Na'
 bosozentezene' dižə' cobə che
 Jesocristən' gatə'ətezə ja'aque'.

**Boso'ošize'e Pabən' yej
 lao zoe' Listran'**

⁸Na' Listra na' jəsyə'ədie' to
 beṇə' nxinje' dezd goljte', con cui
 bi bi fuers balor əgwsa'ate'e ni'e ca'
 par se'e. ⁹Na' chi'iteze' chzenague'
 choe' Pabən' dižə'anə'. Nach Pabən'
 bgüie'ene' na' gocbe'ine' chejle'
 be'enə' de que Diozən' nape' yelə'
 guac par gone' ca gaquə se'e.
¹⁰Nach Pabən' bolgüiže'ene' clar
 gože'ene': —Gwzoža'.

Nach le'e gwzoža'ate be'enə'
 na' gwzolao chde'. ¹¹Beṇə' zan
 ca' ža'anə' choso'ogüie' can' ben
 Pabən' na' gosə'anə' dižə' Licaonia:

—Bach gwse'etj Xancho ca' chejni'alažə'əcho gan' zocho nga na' lega'aque'en zjənaque' ca beṇach.

¹²Na' gosə'əne' de que Bernaben' naque' xanga'aque' Jopiter ben' chse'ejni'alaže'e, na' de que Pabən' naque' xanga'aque' ben' nzi' Mercurio chedə' len' choe' dižə'.

¹³Na' yo'odao' gan' zo xanga'aque' Jopiter ben' chse'ejni'alaže'e zon catezə chso'e lao' syodan'. Nach bχox che Jopiterən' gwze'e nche'e go'on ca' na' bazjənone'eb xoche len yej. Nach bχoxən' len beṇə' ca' ža'anə' besə'əžine' gan' nitə' apostol ca' gwse'enene' so'ote' go'on ca' par se'ejni'alaže'e lega'aque'.

¹⁴⁻¹⁵Pero apostol Bernaben' len Pabən' catə' gwsa'acbel'ine' can' so'on beṇə' ca', gosə'əcheze' xaga'aque'enə' chedə' bito gwse'enene' so'on beṇə' lao' syodan' ca'. Gwse'ebe' ladjo beṇə' ca' gwse'e lega'aque' zižjo: —Beṇə' bito gonle ca'. Leczə beṇach neto'. Za'ato' par chyixjue'ito' le'e de que cheyalə' gwša' yichjla'ažda'olen' na' cuejyichjle costombr quinga de'en naole la' lega'aque'n bito bi zjəzaquə'ən. Cuejyichjga'aclen niç güe'ela'ole Diozən' ben' zo zejlicane, ben' ben yoban', yežlyon', nisda'onə', beṇach, bia ca' chsa'aš, na' bitə'ətezə de'en chle'icho le'e yoban', lao yežlyon' na' lo'o nis. ¹⁶Ca' naquə tyemp ca' de'en bagosə'əde, Diozən' gwdape' yełə' chxenlažə' ca' de'en gosə'əda beṇə' gwža' to to nasyon gwso'one' con can' gwse'enene'. ¹⁷Pero Diozən' syempr zocze' chone' güen len yoguə'əloł beṇachən' par niç yesə'ənezene' de que zocze' naque'

Dioz. Le'enə' chone' par niç chac yejon' niç ca' chac de'en chazcho, na' chatə' de'en che'ej chaocho par niç socho mbalaz.

¹⁸Na' la'anə'əczə gwse' Pabən' len Bernaben' beṇə' Listra ca' de'enə', canə gosə'əzoine' par niç cui gwso'ot beṇə' ca' go'on ca' par se'ejni'alaže'e lega'aque'.

¹⁹Ca' chac xonj beṇə' Izrael beṇə' nitə' Iconio na' Antioquian' gan' mbane Pisidia, besə'əžine' Listran', nach gosə'əgo'oyełe'e beṇə' Listra ca' par gwsa'aque' txen boso'ošize'e Pabən' yej. Na' gwsa'aquene' šə bach gwso'ote'ene' nach gosə'əxobe'ene' fuerlə syodan'.

²⁰Pero beṇə' ca' chso'onlilažə' Jesocristən' jəsə'ədobe' gan' de'enə' nach beyase' na' beyeje' lao syodan' de'e yoblə. Nach beteyo beza' Pabən' len Bernaben' par jəya'aque' Derben'.

²¹Na' lecčə gosə'əyixjui'e dižə' güen dižə' cobə che Jesocristən' lao' syoda Derben' na' beṇə' zan gwso'onlilaže'e Jesocristən'. Gwde na' besyə'asa'aque' jəsyə'aque' Listran', Iconion' na' Antioquian' de'e yoblə. ²²Na' to to syoda ca' gan' jəya'aque'enə' boso'otipe' lažə' beṇə' ca' chso'onlilažə' Jesocristən' na' gosə'əneyoine' lega'aque' par niç nitə'ətezə nite'e so'onlilaže'e Jesocristən'. Na' lecčə bzejni'ine' lega'aque' de que notə'ətezcho šə chene'echo ṇabia' Diozən' chio'o, de'e zan de'e gaquə de'e çhi' saquə'əcho. ²³Na' to to yež can' besyə'ədie'enə' gosə'əbeje' beṇə' golə beṇə' blao par boso'ogüia boso'oye' beṇə' ca' chəsə'ədotpə chəsə'əžag chso'elaogüe'e Jesocristən'. Na' Pabən'

len Bernaben' ze'e yesa'aque' to to yež gws'o'one' orasyonnə' txe'n len beṇə' ca' chəsə'ədopə chəsə'əžaguən' sin cui gwsa'ogüe', gosə'əṇabe' lao Xancho Jesocristən' gaquəlene' yoguə' beṇə' ca' baçh chso'onlilaže'ene'.

**Pabən' na' Bernaben' jəya'aque'
Antioquian' gan' mbane Siria**

²⁴Gwde na' besa'ac Pabən' len Bernaben' na' besyə'ədie' distrit che Pisidia par besə'əžine' distrit che Panfilia. ²⁵Na' gosə'əyixjui'e dižə' che Jesocristən' yež de'en nzi' Perge gan' mbane Panfilian'. Beyož na' gwsa'aque' ja'aque' gan' ne' Atalia. ²⁶Na' Atalian' besa'aque' besyə'əyo'e lo'o barcw par besyə'əžine' Antioquian' gan' mbane Sirian' gan' gwsa'aque'. Na' ca naquə beṇə' Antioquia ca' lega'aque' gosə'əṇabene' Diozən' gaquəlene' Pabən' len Bernaben' par žjse'ene' xšin Diozən' catə' cuiṇə' əsa'aque' žja'aque' yež ca' par žjse'ene' xšin Diozən' de'en babeyož gws'o'one' n'a. ²⁷Na' catə' besyə'əžin Pabən' len Bernaben' Antioquian', bosyo'otobe' beṇə' ca' chso'elao' Jesocristən' nach gwsə'e dižə' yoguə'əloj can' goquəlen Diozən' lega'aque' žlac jəsə'ədise' dižə' güen dižə' cobə che Jesocristən' na' can' ben Diozən' par niçh beṇə' ca' cui zjənaquə beṇə' Izrael gws'o'onlilaže'e Jesocristən'. ²⁸Sša besyə'əga'ane' gosə'ənite'e len beṇə' ca' chso'onlilaže' Jesocristən' Antioquian'.

**Apostol ca' bosə'oxi'e len beṇə'
Jerosalen ca' naclə cheyałə' so'on
beṇə' catə' so'onlilaže'e Jesocristən'**

15 Ca tyempən' to çhopə beṇə' gwsa'ac Jodean' besə'əžine'

Antioquian' na' gosə'əzolaogüe' bosə'osed bosə'olo'ine' beṇə' ca' chso'onlilaže' Jesocristən' de que cheyałə' yesə'əzoe' señy de'en ne' sirconsisionnə' can' na lei de'en bzoj de'e Moizezən' par niçh cui žjəya'aque' lao yi' gabilən'. ²Pero Pabən' len Bernaben' gwsa'acyože' beṇə' Jodea ca' de'en choso'osed choso'olo'ine' ca'. Nach beṇə' Antioquia ca' beṇə' ca' bachso'onlilaže' Jesocristən' gosə'əçhoglaogüe'en de que Pabən' len Bernaben' na' len yeto çhopə beṇə' ljeužjga'aque' ca' əžja'aque' Jerosalennə' par žjəsyə'ənite'e yełə' goxi'a len apostol ca' na' beṇə' golə blao che beṇə' chso'onlilaže' Jesocristən' Jerosalennə' naclə cheyałə' so'one' che de'en choso'osed choso'olo'i beṇə' ca'.

³Nach beṇə' ca' chəsə'ədopə chəsə'əžag chso'elaogüe'e Jesocristən' bosə'osele'e lega'aque' əžja'aque' Jerosalennə'. Na' gosə'ədie' Fenisia na' Samaria na' gwsə'elene' beṇə' ca' chso'onlilaže' Jesocristən' dižə' de que ca naquə beṇə' ca' cui zjənaquə beṇə' Izrael baboso'oša' yichjla'azda'oga'aque'enə' par choso'ozenague' che Diozən'. Nach beṇə' Fenisia ca' na' beṇə' Samaria ca' besyə'əbeichgüeine'.

⁴Na' catə' besə'əžin Pabən' len Bernaben' Jerosalennə' beṇə' ca' chəsə'ədopə chəsə'əžag chso'elao' Jesocristən' nach beṇə' golə beṇə' blao çhega'aque' ca' na' apostol ca' besə'əžaglaoga'aque'ene' choso'oguape' lega'aque' diox. Nach Pabən' len Bernaben' gwse'e lega'aque' yoguə'əloj can' bagoclen

Diozən' lega'aque'. ⁵Na' bałə beṇə' ca' chso'onlilažə' Jesocristən' zjənaque' beṇə' fariseo nach gosə'əzože'e gosə'əne': —Ca naquə beṇə' ca' chso'onlilažə' Jesocristən', cheyałə' nitə'əga'aque' señy de'en ne' sirconsisionṇə' na' cheyałə' so'one' can' na lei de'en bzoj de'e Moisezən' la'anə'əczə cui zjənaque' beṇə' Izrael.

⁶Nach besə'ədobə apostol ca' na' beṇə' golə blao ca' par boso'oxi'e naclə gaquəczən'. ⁷Sša bagoc chso'e dižə' catə'əczla gwzoža' Bedən' gože' lega'aque': —Beṇə' bišə', le'e nezczele de que cana'ate gwlej Diozən' nada' par jətixjui'a dižə' güen dižə' cobə che Jesocristən' len beṇə' ca' cui zjənaquə beṇə' Izrael niç gwso'onlilaže'ene'.

⁸Na' ca naquə Diozən' ža, nombi'e yichjla'aždao' yoguə'əłolte beṇə'. Na' de'en bsele'e Spirit che'enə' zon lo'o yichjla'aždao' bałə beṇə' cui zjənaquə beṇə' Izrael can' zon lo'o yichjla'aždao' chio'o, blo'ine' chio'o de que chazlaže'e can' chso'onlilaže'e Jesocristən'.

⁹Na' bito nacho de que nža' bene' len chio'o na' nža' chone' len lega'aque', sino beya'a beyibcze' la'aždaoga'aque'enə' catə'ən gosə'əzolaogüe' chso'onlilaže'e Jesocristən'. ¹⁰Na' ža, žbixchen' cui chejle'ele che de'en bagož Diozən' nada'? žBixchen' chonlene' prueb šə leine' can' ne'enə'? Chene'ele gonle byen yesə'ənao beṇə' ca' cui zjənaquə beṇə' Izrael costombr checho ca'. Tant zdebə zjənaquən xte ni chio'o na' ni xaxta'ocho ca' cui goquə so'one' yoguə'əłol can' nanṇə'. ¹¹De'e na'anə' bito naquən

güen ye'ega'acchone' yesə'ənaogüe' costombr ca', chedə' cuin Xancho Jeso'osən' babene' par niç cui žjəya'aque' lao yi' gabilən' laogüe de'en nži'ilaže'e lega'aque' ca'aczən' babene' len chio'o, na' bito nacho de que zaquə'əcho par bene' ca' len yoguə'əłolcho.

¹²Nach yoguə' beṇə' ca' ndopə nžaguən' gwnite'e žizə par boso'ozenague' gwsoe' Bernaben' len Pabən' dižə' ca naquə ben Diozən' par niç gwso'one' miłagr na' yeziquə'əchlə de'e zaquə' yebanecho entr beṇə' ca' cui zjənaquə beṇə' Izrael. ¹³Na' catə' beyož gwsoe' Bernaben' len Pabən' dižə'ənə', lao ne'e nitə' beṇə' ca' žizə gwzoža' Jacobən' gože' lega'aque': —Beṇə' bišə' le'e gwzenag dižə' nga gua'a. ¹⁴Simon Bedən' baçh be'e dižə' can' babloe' Diozən' yełə' guac che'enə' len beṇə' ca' cui zjənaquə beṇə' Izrael na' can' bagwleje' bałə' par chso'elaogüe'ene'. ¹⁵Na' de'en chon Diozən' ca' chotiłən de'e ca' boso'ozoj profet ca' beṇə' ca' gwso'e xtižə' Diozən' cana' can' na de'e nga:

¹⁶Te na' yida' de'e yoblə na' gona' par niç nabia' xi'in dia che de'e Rei Dabin',

la'anə'əczə na'a cui no xi'in dia che'enə' chesə'ənabia' na' gona' par niç socze' nabi'e.

¹⁷Na' zan beṇə' ca' cui zjənaquə beṇə' Izrael so'onlilaže'e nada' Xanga'aque'.

Beṇə' ca' ža' yoguə' nasyonṇə' so'ombi'e nada', con noga'aque'enə' gwleja' par so'ombi'e nada'.

¹⁸ Can' gwna Xancho Diozən', ben' chzejni'i chio'o can' gaquə dezd ža gwlasda'ote.

¹⁹ Na' laogüe de'en nyoj Xtiže'enə' nan ca', nada' əchnia' le'e de que cabi cheyałə' gonecho beṇə' ca' cui zjənaquə beṇə' Izrael bichlə zed, beṇə' ca' bagosə'əbejyichj costombr čhega'aque'enə' de'en gosə'ənaogüe' par chso'onlilaž'e Diozən'. ²⁰ Con gwzojga'acchone' ye'ega'acchone' de que bito sa'ogüe' no yełə' guao de'en chəsə'əne' naquən che lgu'a' lsaquə'ən chse'ejni'alažə' beṇə', na' bito sa'ogüe' bia ca' chso'ote' choso'ošoquə' do lba'abən', na' bito sa'ogüe' chen čhega'acobən'. Na' bito yesə'əzolene' no'olə cui naquə no'ol čhega'aque' na' nic no'ol ca' yesə'əzolene' beṇə' cui naquə be'en čhega'aque'. ²¹ Dezd gwłalte nitə' beṇə' to to syodan' choso'ozejni'ine' can' na lei de'en bzoj de'e Moisezən', na' choso'olabe'en lo'o yo'odao' əblao čhechon' yoguə' ža dezcanz. De'e na'anə' cheyałə' goncho mendad so'on beṇə' ca' cui zjənaquə beṇə' Izrael ca cui əsa'aque beṇə' ca' chəsə'ənao de'en na lein' de que malən' chso'on beṇə' ca'.

²² Na' apostol ca' len beṇə' golə blao ca' na' yeziquə'əchlə beṇə' ca' chəsə'ədopə chəsə'əžag chso'elaogüe'e Jesocristən' gwsa'azlaže'e can' gwna Jacobən', na' boso'oxi'e əchoj čhopə beṇə' entr lega'aque' par əžja'aclene' Pabən' len Bernaben' Antioquian'. Nach gosə'əbeje' Jodas Barsabasən' na' Silasən' beṇə' zjənaquə beṇə' blao entr beṇə' ca' chso'onlilažə' Jesocristən' Jerosalenṇə'. ²³ Na'

boso'ozoje' to cart de'e gwso'oxə' beṇə' ca' na' le'e cartən' gwse'e lega'aque':

“Neto' apostol, na' beṇə' golə blao, na' nochlə neto' chonlilažə'əto' Jesocristən' chguapto' le'e diox, le'e nacle beṇə' ljuəžjto' chonlilažə'əchone', le'e nitə'əle Antioquian' na' do gan' mbane Siria na' Silisia. ²⁴ Bagwṇezeto' de que to čhopə beṇə' besə'əchoj entr neto' babla'aque' gan' nitə'əlen' chso'one' šejlažə'əle len dižə'ən baboso'očixə boso'oṇize' yichjla'azda'olen' chəsə'əne' de que cheyałə' sole señy de'en ne' sirconsisionṇə' na' gonle yoguə'əloł can' na lei de'en bzoj de'e Moisezən'. Bito nezeto'onə' gwsa'aque' na' caguə mendad čheto'onə' bedəsə'əyeže' le'e ca'. ²⁵ Topə txen naquəto' gwyazlažə'əto' gwlejtə' čhopə beṇə' quinga chselə'əga'actə'one' gan' nitə'əlen' len apostol ca' chacchgüeito' čhei Bernaben' na' Pabən'. ²⁶ La' lega'aque' baboso'osanlažə' yełə' mban čhega'aque'enə' par chso'one' xšin Xancho Jesocristən'. ²⁷ Chselə'əto' Jodasən' na' Silasən' na' lega'aque' yoso'ozejni'ine' le'e dižə' cho'a che yoguə' de'en nato' le'e cart nga. ²⁸ Chazlažə'əto' de'en babzejni'i Spirit che Diozən' neto' de'en ənato' cui gonle, na' de'e ca' chonən byen cui gonle zjənaquə tapzən. ²⁹ Bitə cheyałə' gaole yełə' guao de'en chəsə'əne' che lgu'a' lsaquə'ən chse'ejni'alažə' beṇə'. Na' bito gaole bia ca' chso'ote' choso'ošoquə' do lba'abən'. Na' bito gaole chen čhega'acobən'. Na' bito solenle no'olə cui naquə no'ol čhele

na' nic no'olən' solene' beṇə' cui naquə be'en che'. Šə bito chonle de'e quinga chonto' mendad cui gonle, güennə' gonle šə ca'. De'e na'azən' chzojto' le'e cart nga."

³⁰Nach boso'ozei beṇə' ca' chso'onlilažə' Jesocristən' apostol ca' na' beṇə' ca' yečhopə dižə' nach gwsa'aque' əzja'aque' Antioquian'. Na' catə' besə'əžine' Antioquian' bosyo'otobe' yoguə' beṇə' ca' chso'onlilažə' Jesocristən' na' bosonežjue' lega'aque' cartən' zjənoxe'lenə' par boso'olabe'en. ³¹Na' beyož boso'olabe' cartən' besyə'əbeine' ca naquə consejw de'en nyoj le'inə'. ³²Na' ca naquə Jodasən' na' Silasən' leczə choso'ozenene' beṇə' bi de'en bagož Diozən' lega'aque'. Nach gwso'elene' beṇə' Antioquia ca' dižə' na' bosyo'otipe' lažə'əga'aque' par nič nıtə'ətezə nıte'e so'onlilažə'e Jesocristən'. ³³Zan ža gwnite'e Antioquian' na' catə' bžin ža par yesa'aque' žjəya'aque' gan' nitə' beṇə' ca' bosyo'osele' lega'aque', beṇə' Antioquia ca' bosyo'ozeine' lega'aque' dižə' gwse'e de que to šao' to güen yesyə'əžine'. ³⁴Pero na' ca naquə Silasən' gwčhoglažə'e yega'ane' na'azə. ³⁵Nach leczə Pabən' len Bernaben' gwnıtə'əcze' Antioquia na'azə, na' txen len zan beṇə' Antioquia ca' bosyo'osed bosyo'olə'ine' beṇə' xtižə' Diozən' na' bosyo'ozejni'ine' lega'aque' bi zejen.

Pabən' gwyeye' de'e yoblə gan' bajətxjui'e xtižə' Diozən'

³⁶Na' catə' bagwde to tyemp Pabən' gože' Bernaben': —Šejcho yoguə'əloj syoda ca' gan' bačh

jtixjue'echo xtižə' Xancho Jesocristən' par zjəyecho nac chsa'ac beṇə' ca' chso'onlilažə'əənə'. ³⁷Nach Bernaben' goclazə'e yesə'əche'e Juan ben' leczə le' Marcos. ³⁸Pero Pabən' bene' xbab bito naquən güen yesə'əche'ene', čhedə' Juan Marcosən' gwlejyichje' lega'aque' Panfilian', bito bega'anlene' lega'aque' par so'one' xšin Diozən'. ³⁹Na' gotə' to bžaş gual entr Pabən' na' Bernaben' xte gosə'əbejyichj ljuəžjga'aque'. Bernaben' gwze'e gwče'e Marcosən' gwso'e to lo'o barcw par ja'aque' Čhipren'. ⁴⁰Nach Pabən' gwze'e gwče'e Silasən', na' beṇə' ca' chso'onlilažə' Jesocristən' Antioquian' gosə'ənabe' lao Xancho Diozən' gaquəlene' Pabən' na' Silasən' gatə'ətezə žja'aque'. ⁴¹Nach Pabən' len Silasən' gosə'ədie' Sirian' na' Silisian' par bosyo'otipe' lažə' beṇə' ca' chso'onlilažə' Jesocristən' to to yež.

Temtion' gwzolaogüe' chonlene' Pabən' len Silasən' xšin Diozən'

16 Na' catə' Pabən' na' Silasən' besə'əžine' Derben' na' gosə'ədie' par besə'əžine' Listran'. Na' Listra na' zo to beṇə' chonlilažə' Jesocristən' na' le' Temtio. Xna' Temtion' naque' beṇə' Izrael na' chonlilažə'e Jesocristən', na' xe'lenə' naque' beṇə' griego. ²Na' beṇə' ca' chso'onlilažə' Jesocristən' Listran' na' Iconion' gwso'e xtižə' Temtion' de que zocze' chone' güen. ³Nach Pabən' gwnabe' šejlen Temtion' lega'aque', nach gwčhi'ene' gan' bosyo'ozo'ene' señy de'en ne' sirconsision par nič gwsa'azlažə'

beṇə' Izrael ca' ža'anə' əche'ene' gone' xšin Diozən'. Bzo'ene' señyən' chedə' la' yogue'e zjənezene' de que x'e'ene' bito naque' beṇə' Izrael. ⁴Nach gwsa'aque' zja'aque' to to syoda na' chəsə'əyixjue'ine' beṇə' ca' chso'onlilažə' Jesocristən' noquə'ənnə' cui cheyalə' so'one' can' gosə'əchoglaō apostol ca' na' beṇə' golə blao che beṇə' ca' chso'onlilažə' Jesocristən' Jerosalennə'. ⁵Nach beṇə' ca' chəsə'ədopə chəsə'əžag chso'elaogüe'e Jesocristən' gwnitə'ətezə gwnite'e gwsə'onlilažə'əche' Jesocristən' na' gwyanche' tža tža.

**Pabən' ble'idaogüe'ene' to
beṇə' Masedonia chatə'əyoine'
le' šeje' laže'ene'**

⁶Ca naquə Spirit che Diozən' bito be'en latjə šej Pabən' na' Silasən' na' Temtion' Asian' žjəsə'ədixjui'e xtižə' Diozən', de'e na'anə' ja'aque' Frigia na' Galasia. ⁷Na' besə'əžine' galə'əzə gan' mbane Misia. Na' gwsa'aclačə'e əžja'aque' gan' nzi' Bitinia, pero leczə bito be'e Spiritən' latjə əžja'aque'ene'. ⁸Nach gosə'ədie' Misian' xte besə'əžinte' gan' nzi' Troas. ⁹Na' že' na' Pabən' ble'idaogüe'ene' zecha to beṇə' byo beṇə' Masedonia laogüe'ene' na' be'ene' gotə'əyoine' le' gože'ene': "Yo'o Masedonian' par gaquəleno' neto'." ¹⁰Nach bsi'ini'a cheto' par gwza'ato' gweyjtə' Masedonian' la' gweyjni'ito' de que Diozən' chene'ene' žjezeneto' beṇə' ca' dižə' güen dižə' cobə che Jesocristən', na' nada' Locas gwy'alena' Pabən' len Silasən' na' Temtion'.

Pabən' na' Silasən' ja'aque' Filiposən'

¹¹Troas na' gwza'ato' gwyo'oto' lo'o barcon' zdato' licha par galən' ne' Samotrasia, nach beteyo bžinto' gan' nzi' Neapolis. ¹²Nach Neapolis na' gwza'ato' par bžinto' gan' ne' Filipos gan' mbane Masedonian'. Filiposən' naquən to syoda blao gan' ža' beṇə' Roma. Na' gwzoto' na' to čopə ža. ¹³Na' catə' bžin ža dezcanzən' bchojto' fuerlə syodan' par gweyjtə' cho'a yaon' gan' chja'aque' chjse'ene' orasyonnə', nach gwche'eto' par be'elento' no'ol ca' bazjənžaguən' dižə' güen dižə' cobə che Jesocristən'. ¹⁴Na' entr no'ol ca' choso'ozenaguən' len to beṇə' le Lidia. Naque' beṇə' syoda Tiatira na' chote'e lachə' fin de color morad. Lidian' cho'elaogüe'e Diozən' na' Xancho Diozən' bene' par nič gone'ene' bzenague' tcho'a tšao' ca naquə dižə' de'en be' Pabən'. ¹⁵Na' le'e gwchoate' nis len familj che' ca'. Nach gwdenə' gotə'əyoine' neto' gwne': —Šə de'e liczə chejle'ele de que chonlilažə'a Xancho Jesocristən', le'e šo'o yega'anle liža'anə'.

Nach gweyjtə' jəyega'antə' liže'ene' chedə' bencze' byen.

¹⁶Na' goquən to žlas lao zdato' gan' chac orasyonnə' bežagto' to no'ol güego' no'olə yo'o yaz de'e xio' lo'o yičhja'ažda'obo'onə' na' chonən par nič chac chneya'abo', na' gan xen chombo' par xambo' ca' de'en chneya'abo'. ¹⁷Nach bedənaobo' neto' nžagto' Pabən' chosya'abo' nabo': —Beṇə' quinga zjənaque' beṇə' güen xšin Diozən' ben' chnabia' doxenlə. Na'

lega'aque' choso'olo'ine' naquən'
cheyalə' goncho par niç cui
yeyejcho lao yi' gabilən'.

¹⁸Zan ža gwnaobo' neto' nabo' ca'
xte bžin ža goque Pabən' zed nach
gwyechje' gože' de'e xio'onə': —Por
yelə' guac che Jesocristən' chona'
mendad yechojo' lo'o yichjla'aždao'
bi'i nga.

Nach le'e bechojten.

¹⁹Catə' gwsa'acbe'i xambo'onə'
cuich bi gan so'one' len lebo' nach
gosə'əzene' Pabən' len Silasən'
na' jso'e lega'aque' gan' ža' beṇə'
gwnabia' ca' galə'əzə gan' chac
ya'a. ²⁰Nach catə' besə'əžinlene'
lega'aque' lao beṇə' gwnabia' ca'
nach gwse'e: —Beṇə' Izrael quinga
chsa'aše' chəsə'əbeque' de'e zed
lao' syoda nga. ²¹Na' choso'olo'ine'
costombr de'e cabi cheyalə' nao
neto' naquəto' beṇə' Roma.

²²Na' beṇə' ca' ža' lao
ya'anə' lecəzə gwsa'ase' contr
Pabən' len Silasən', nach beṇə'
gwnabia' ca' gwso'one' mendad
gosə'əlechje' xaga'aque'enə' par
gosə'əyine' lega'aque' xis. ²³Beyož
gosə'əyinchgüe' lega'aque', nach
boso'ože'ene' ližyan' nach
gwse'e ben' chapə ližyan' de que
gapəchgüe' ciudad len lega'aque'.
²⁴Catə' gwse'e ben' chapə ližyan' ca'
nach be'enə' bže'e lega'aque' lo'o
cuart ližyan' de'en zo le'ezelaogüe'
gan' naquə bižə'əte na' bchide'e
ni'aga'aque'enə' len yag sep.

²⁵Na' do chelyanə' Pabən' len
Silasən' nite'e chso'one' orasyon na'
chso'ole' no imno chso'elaogüe'e
Diozən' na' pres ca' yeziquə'əchlə
choso'ozenague'. ²⁶Na' to de
repentə gwxo'ochgua, na'

bse'esə'əchguan lan yo'o ližyan'
xte bsaljən yoguə' puert ca'. Nach
yoguə' pres ca' ža'anə' beṇə' ca'
zjənchej gdenṇə' besyə'əyež gdenṇə'
na'aga'aque'enə' nach yag sepən'
bosanən ni'aga'aque'enə'. ²⁷Nach
ben' chapə ližyan' bebanene' na'
ble'ine' zjənyaljo puert ca' nach le'e
goljte' spad che'enə' goclaže'e yeyot
cuine', goquene' bach besyə'əxonj
pres ca'anə'. ²⁸Nach bisya'a Pabən'
gože'ene': —Bito bi gone cuino'.
Nga zoczə yoguə'əto'.

²⁹Nach ben' chapə ližyan'
gwnabe' to yi' nach gwyo'odoe'
zjəgüie' gan' de Pabən' len Silasən'
na' do chalə' chxize' bzo xiben'
laoga'aque'enə'. ³⁰Na' le'e bebejte'
lega'aque' ližyan' nach gože'
lega'aque': —İBi cheyalə' gona' par
niç cui yeya'a lao yi' gabilən'?

³¹Nach gwse'ene': —Benlilažə'
Xanto' Jeso'osən' le' na' family
chio' na' gone' ca cui yeyejle lao yi'
gabilən'.

³²Nach le'e gwzolaote Pabən' len
Silasən' gwso'elene' be'enə' na'
family che' ca' xtiža' Xanchon'.

³³Nach lao or na'atezə be'enə'
gwdibe' lao güe' che Pabən' na'
che Silasən'. Nach bosə'əcho'e
be'enə' nis len family che' ca'.

³⁴Nach gwche'e Pabən' len Silasən'
liže'enə' par bye'ej bguaogüe'
lega'aque'. Na' do family be'enə'
besyə'əbeichgüeine' de'en
bachso'onlilaže'e Jesocristən'.

³⁵Catə' gwye'eni'inə' beṇə'
gwnabia' ca' boso'osele'e polsia
par jse'eže' ben' chapə ližyan' de
que yosane' beṇə' ca' žjəya'aque'.

³⁶Nach gož be'enə' chapə ližyan'
Pabən': —Ca naquə beṇə' gwnabia'

ca' bach boso'osele'e rson yosana' le'e. Na' baguaquə žjəya'acle to šao' to güen.

³⁷Nach Pabən' gože' polsia ca': —Bagosə'əyine' neto' lao lcue' sin cui gwsə'one' yełə' jostis šə bi nonto'onə', len naquəto' beṇə' nasyon Roma. ¿Ena' nā'a chse'lenene' yosyo'osane' neto' žizizəna'? Da'ac cuinga'aque' desye'ełeje' neto'.

³⁸Nach polsia ca' jesyə'əyeže' beṇə' gwnabia' ca' can' gož Pabən' lega'aque'. Na' beṇə' ca' besə'əžebchgüe' catə' gosə'ənezenē' de que Pabən' na' Silasən' zjənaque' beṇə' nasyon Roma.

³⁹Nach ja'ac beṇə' gwnabia' ca' gan' zjəde Pabən' na' Silasən' jəsyə'əye'lexene' lega'aque' na' besyə'əbeje' lega'aque' dižə' šao' nach gwsa'atə'əyoine' lega'aque' yesa'aque' syodan'. ⁴⁰Catə' bechoj Pabən' len Silasən' ližyan' nach ja'aque' liž Lidian' de'e yoblə par jesye'etipe' lažə' beṇə' ca' chso'onlilažə' Jesocristən', nach besa'aque'.

**Beṇə' mal ca' boso'ota
boso'one' beṇə' Tesalonica
ca' so'one' contr apostol ca'**

17 Catə' besyə'əsa'ac Pabən' len Silasən' besyə'ədide' gan' ne' Anfipolis na' Apolonia. Na' le'e besyə'əžinte' to syoda de'en nzi' Tesalonica ga zo to yo'odao' ga chja'ac beṇə' Izrael ca'. ²Na' Pabən' ca' costombr checze' gwyeje' lo'o yo'oda'onə' na' lao šonə' ža dezcanz ca' bzejni'ine' lega'aque' xtižə' Diozən'. ³Bzejni'ine' lega'aque' de que Xtižə' Diozən' de'en boso'ozoj

de'e profet ca' beṇə' ca' gwsə'e xtižə' Diozən' cana' cho'en dižə' che Cristən' nan de que yoso'oči' yoso'osaquə' beṇə' le' na' so'ote'ene' na' techlə yeyas yebane' ladjo beṇə' guat ca'. Nach leczə gože' lega'aque': —Jeso'osən' ben' cho'a dižə' chei, le'lenə' Cristən' ben' bselə' Diozən' par chaclene' chio'o.

⁴Beyož be'e dižə'əna' zan beṇə' Izrael ca' gwsə'ejle'e che' na' gwsa'aque' txen len Pabən' na' Silasən', na' zan beṇə' griego beṇə' gwsə'elao' Diozən' na' zan no'olə bla' leczə gwsə'ejle'e che'. ⁵Pero na' beṇə' Izrael ca' cui gwsə'ejle'e xtižə' Diozən' gwsa'acxi'ine' Pabən' len Silasən' nach boso'otobe' xonj beṇə' mal chsa'aš lao lqueyən' na' txen zjənaque' boso'ota boso'one' beṇə' ca' ža' lao' syodan'. Nach ja'acyalcze' liž ben' le Jason chəsyə'əyilje' Pabən' len Silasən' par yesə'əche'e lega'aque' na' so'one' lega'aque' lao na' beṇə' syodan'. ⁶Pero catə' besə'əžine'lenə' notono Pabən' len Silasən' nitə'əna'. Nach gosə'əxobe' Jasonə' lene' yeto chopə beṇə' ca' chso'onlilažə' Jesocristən' jso'e lega'aque' lao beṇə' ca' chəsə'ənabia' syodan'. Na' catə' besə'əžine' lao beṇə' gwnabia' ca' gwse'e lega'aque' zižjo: —Ca' naquə beṇə' quinga chsa'aše' chəsə'əbeque' de'e zed doxenlə na' nā'a babla'aque' gan' nga zocho nga. ⁷Na' Jason ni babgüialaogüe' lega'aque' liže'lenə', na' yogue'e chso'one' contr lei che Rei Sesar de'en naocho na' chəsə'əne' de que zo yeto rei beṇə' le Jeso'os.

⁸Besə'əža'achgua beṇə' lao' syodan' na' beṇə' gwnabia'

chega'aque' ca' catə' gwse'enene'
can' chəsə'əna beṇə' ca'. ⁹Nach
Jasonṇə' len beṇə' ljuežje'
ca' bosə'ožie' mech par nič
bosyo'osan beṇə' gwnabia' ca'
lega'aque'.

Pabən' na' Silasən' ja'aque' Berean'

¹⁰Nach beṇə' ca' chso'onlilažə'
Jesocrstən' Iğüegwzə lao že' na'
bosyo'ose'e Pabən' len Silasən'
par jəya'aque' gan' ne' Berea. Na'
catə' besyə'əžine'enə' ja'aque' lo'o
yo'odao' che beṇə' Izrael ca'. ¹¹Beṇə'
Berea ca' zjənaquəche' beṇə' šao'
cle ca beṇə' Tesalonica ca' na'
besyə'əbeine' bosə'ozenague' xtižə'
Jesocrstən' de'en bosə'ozejni'i
Pabən' len Silasən' lega'aque',
na' tža tža besyə'əyilje' gan'
nyoj de'e ca' bosə'ozejni'ine'
par nič gosə'ənezene' šə le
can' nan. ¹²Na' zanga'aque'
gwso'onlilažə'e Jesocrstən', na'
leczə zan beṇə' griego ca' na' zan
no'olə blao. ¹³Nach beṇə' Izrael
ca' ža' Tesalonican' beṇə' ca'
cui chso'onlilažə' Jesocrstən',
gwse'enene' rson de que Pabən'
len Silasən' banite'e Berean'
choso'ozenene' xtižə' Diozən'. Nach
gwsa'aque' ja'aque' Berean' par
jəsə'əta jəsə'əne' beṇə' lao' syodan'.
¹⁴Pero beṇə' ca' chso'onlilažə'
Jesocrstən' Berean' le'e
bosə'osa'ate' Pabən' gwyeje' cho'a
nisdə'onə' pero na' besyə'əga'an
Silasən' len Temtion'. ¹⁵Na' beṇə'
ca' gosə'əgo'o lao ne'e jso'e Pabən'
syoda Atenas de'en chi' gan' nzi'
Gresia. Na' catə' besa'aque'enə'
Pabən' bene' mendad əžja'ac Silasən'
len Temtion' Iğüegwzə gan' zoe'enə'.

Pabən' bsd blo'ine' beṇə' Atenas ca'

¹⁶Na' lao zoe' Atenasən' chbeze'
beṇə' ca', cuili biczən' chaque
yichjla'aždaogüe'enə' chgüie'
catequən' že'e ža' Iguə'a lsaquən'
chse'ejni'alažə' beṇə' Atenas
ca'. ¹⁷De'e na'anə' bzejni'ine'
beṇə' Izrael ca' lo'o yo'odao'
chega'aque'enə' len yeziquə'əchlə
beṇə' ca' chso'onlilažə' Diozən'.
Na' leczə yoguə' ža gwyeje' gan'
chac ya'a par je'e xtižə' Diozən'
len beṇə' ca' ža'anə'. ¹⁸Na' beṇə'
ca' bazjənao de'en choso'osed
choso'olo'i epicoreo ca' na' estoico
ca' gosə'əzolaogüe' gwso'elene'
Pabən' dižə'. Nach bałe' gosə'əne':
—čBi nga əṇa de'e güe' dižə' nga
chio'o?

Nach yebałe' gosə'əne': —
Zedəzenljeine' chio'o che yeto
čhopə beṇə' cobən' šejni'alažə'əcho.

Gosə'əne' ca' chedə' Pabən'
bzejni'ine' lega'aque' dižə' che
Jeso'osən' na' bzejni'ine' lega'aque'
can' beban Jeso'osən' ladjo beṇə'
guat ca'. ¹⁹Nach gosə'əche'e
Pabən' to latjə gan' ne' Areopago
gan' chesə'ədobe' par chso'e
consejw na' catə' besə'əžine'enə'
nach gwse'ene': —Chene'eto'
əgwzejni'ido' neto' bi de'e cobən'
chsed chlo'ido'. ²⁰La' dižə' de'e
cuiczə ne'e yeneton' cho'o, na'
chene'eto' ənezeto' bi zejṇṇə'.

²¹Na' ca costombr che beṇə'
Atenas ca' na' che beṇə' zitə' ca' ža'
Atenasən' con chaše' no güe' dižə' o
gozenag dižə' šə bi de'e cobə de'e
de.

²²Nach Pabən' gwzeche'
gwcholo'ga'aque'enə' gan' ne'

Areopagon' na' gože' lega'aque': —
Le'e beṇə' Atenas, chacbe'ida' de
que chejñi'alažə'əchgwale lɣua'a
lsaquə' ca'. ²³Catə' gwɗia' tnezən'
ble'ida' latjə gan' nitə' de'e ca'
chejñi'alažə'əlen'. Na' entr latj ca'
gan' nitə' de'e ca' chejñi'alažə'əlen'
ble'ida' to latjə gan' nyojən nan:
“Par Xancho be'enə' cui no nombia”.

Ca naquə be'enə' chejñi'alažə'əle
sin cui nombi'alene' che be'ena'anə'
əchyixjue'ida' le'e.

²⁴Dioz ben' ben yežlyon' na'
yoguə'əte de'e de laogüen', len'
chnabi'e yoban' na' yežlyon'. Bito
zoe' do lo'o yo'o de'e ben beṇəchən'
par se'ejñi'alažə'e le'. ²⁵Bito de
de'e ənacho gon beṇəchən' par
gaquəlene' Diozən' žalə' na'aclə bi
chyažjene'. Dioz na'anə' cho'e yełə'
mban che yoguə'əłə beṇə', chgüe'e
lega'aque' biš na' cho'e lega'aque'
yoguə'əte de'e zjənap'e.

²⁶Na' tozə chen bene' beṇəchən'
beṇə' ža' doxen lao yežlyon'. Na'
bsi'e xneze bat nitə' to to beṇə' na'
gan' nite'e. ²⁷Diozən' bnite'e yoguə'
beṇəchən' lao yežlyon' par niç ca'
yesyə'əyilje' naclə so'one' par niç
ca' so'ombi'ene' na' so'onlilaže'e
tozə le'. De'e li Diozən' bito zoe'
zita' len to to chio'o. ²⁸Le'enə'
chone' par niç zocho na' par
mbancho na' par chdacho, can'
gwnaczə to beṇə' poeta chele
ben' be' dižə' xochə gwne': “De'e
li naccho dia che Diozən'.” ²⁹Na'
əchnia' le'e de'en naccho xi'in dia
che Diozən' bito cheyalə' gonlizcho
xbab de que le' naque' ca no
lɣua'a lsaquə' de or, de p̄lat o de
yej, de'e ca' chsa'aljažə' beṇəchən'
chso'one'. ³⁰Antslə Diozən' be'e

latjə gwso'on beṇəchən' con can'
gwna xbab chega'aque'enə' yełə'
cui chejñi'i chega'aque'. Pero
ṇa'a Diozən' chone' mendad
de que yoguə'əłə beṇə' ža'
doxenlə yežlyon' yesyə'ədinjene'
xtolə'əga'aque'enə'. ³¹La' Diozən'
bambeje' Jesocristən' par
əçhoglaogüe'en che chio'o beṇəch
šə nocho napcho dolə'. Na' Diozən'
banžie' bia' batən' çhoglaogüe'en
che chio'o beṇəch. Na' de'en
bosban Diozən' Jesocristən' ladjo
beṇə' guat ca' nezecho de que de'e
li çhoglaogüe'en che chio'o beṇəch
na' zdacze' liçha ca de'en gone' ca'.

³²Catə' beyož gwse'ene'
gwna Pabən' de que yesyə'əban
beṇəchən' ladjo beṇə' guat ca'
bale' gwso'onene' borl na' yebale'
gwse'ene': —Na' gwzenagyetsi'ito'
can' cho'o dižə'anə' yetolə ža.

³³Ca' goquə beza' Pabən'
Areopagon' gan' ža' beṇə' ca'.
³⁴Pero na' balə beṇə' Atenas
ca' gwsa'aque' Pabən' txen na'
gwso'onlilaže'e Jesocristən'. Na'
entr beṇə' ca' gwsa'ac Pabən' txen,
len to beṇə' byo le Dionisio na' yeto
no'olə le Damaris. Na' Dionision'
naque' to beṇə' gwnabia' ca' chso'e
consejon' Areopagon'.

Can' goquə žlac gwzo Pabən' Corinton'

18 Gwde goc de'e ca' Pabən'
beze'e Atenasən' par
gwyeye' gan' ne' Corinto gan'
leczə mbane Gresian'. ²Catə'
bžine' Corinton' bežague' to beṇə'
Izrael le Aquila beṇə' yež Ponto,
na' no'ol che'enə' le' Prisila. Ze'e
besyə'əžingale' Corinton' zeya'aque'

Italia, chedə' Rei Claudion' ben' chnabia' Italian' bene' mendad besyə'əžaš yoguə'əloj beṇə' Izrael ca' ža' Roman'. ³Nach gwyey Pabən' ližga'aque'enə' na' gwzoe' len lega'aque'. Na' txen gwso'one' yo'o de lachə' chedə' leczə chac gon Pabən' len na' lenṇə' naquə žin che Aquilan' na' Prisan'. ⁴Na' yoguə' ža dezcanz Pabən' gwyeye' yo'odao' che beṇə' Izrael ca' na' jəzejni'ine' lega'aque' che Jesocristən' par niç so'onlilaže'ene' na' lenczə beṇə' cui zjənaquə beṇə' Izrael chja'ac yo'oda'onə'.

⁵Na' catə' gwsa'ac Silasən' len Temtion' Masedonian' par besə'əžine' gan' zo Pabən' besə'əle'ine' can' chon Pabən' cho'leczə laže'e chyixjui'e xtižə' Jeso'osən' na' chzejni'ine' beṇə' Izrael ca' de que Jeso'osən' naque' Cristən' ben' chəsə'əbeze' əselə' Diozən' par gaquəlene' lega'aque'. ⁶Pero beṇə' Izrael ca' besə'əže'e apostol Pabən' na' boso'ožia boso'onite'ene'. Nach Pabən' bse'esə xe'lenə' par blo'e de que bito bi dolə' nape' che de'e malən' chso'one', na' gože' lega'aque': —Bito bi dolə' napa' nada' de'en cuiay'i'ile zejlicane. Le'e nape dolə'ənə'. Na' dezd na'a žjəsəd žjəlo'ida' beṇə' ca' cui zjənaquə beṇə' Izrael.

⁷Nach bechoje' lo'o yo'oda'onə' na' beze'e bežine' liž to beṇə' le Josto. Josto na'anə' zotezə zoe' cho'elaogüe'e Diozən' na' liže'enə' zon cuit yo'oda'onə'. ⁸Na' zo to beṇə' le Crispo beṇə' naquə beṇə' gwnabia' che yo'oda'onə'. Na' Crispon' len yoguə'əloj family che'enə' gwso'onlilaže'e Xancho

Jesocristən'. Le'egatezə ca' beṇə' zan beṇə' Corinto ca' boso'ozenag che de'en əbsed blo'i Pabən' gwso'onlilaže'e Jesocristən' na' gosə'əchoe' nis. ⁹Na' goquən' to že' ble'idaogüe'e Pabən' Xancho Jesocristən', na' Xancho' gože' Pabən': —Bito žebo'. Gwzotezə gwzo be' xtiža'anə' na' bito so' žizə. ¹⁰Nada' zoczə' len le' na' bito gua'a latjə no bi gone le', chedə' beṇə' zan ža' lao' syoda nga beṇə' so'onlilaže' nada'.

¹¹Ca' goquən' bega'an Pabən' tgüüz yo'o gašjə Corinton' par bsed blo'ine' lega'aque' xtižə' Diozən'.

¹²Na' ca tyempən' be'enə' le Galion naque' gubernador na' chnabi'e gan' nzi' Acaya. Nach beṇə' Izrael ca' ža' Corinton' beṇə' ca' cui chso'onlilažə' gwsa'aque' tozə par gwso'one' contr Pabən'. Nach gosə'əche'ene' js'ə'ene' gan' chon gubernadorən' yełə' jostisən'. ¹³Na' catə' besə'əžine'enə' gwse'e gubernadorən': —Ca naquə bengə ža, chde' chgo'oyełe'te to to beṇə' par niç so'one' bi de'e cobə par se'ejni'alaže'e Diozən' na' nža'alən' na lein' šejni'alažə'əchone'.

¹⁴Bach zotequən' əne Pabən' catə'əczla gož Galionnə' beṇə' Izrael ca': —Ca naquə de'e nga chaole xya nga, žalə' naquən to no fałt o to no de'e malchgua, gona'an yełə' jostis. ¹⁵Pero naquən che dižə'əzə na' che la beṇə' na' che lei chelen'. Le'e gwye' naclə gonle. Nada' bito co'o lao na'a gona' yełə' jostis che de'en nac ca'.

¹⁶Nach bošaše' lega'aque' gan' chone' yełə' jostisən'. ¹⁷Nach beṇə' ca' cui zjənaquə beṇə'

Izrael boso'onize' Sostenesən' be'ena' naquə beṇə' gwnabia' che yo'oda'onə'. Na' gwso'ot gosə'əyine' le' lao Galionnə' pero bito bi cas ben Galionnə' lega'aque'.

Pabən' beyeje' Antioquian' par jətixju'i'e xtižə' Diozən' de'e gwyone

¹⁸Gwde goc ca' yezan ža gwzoch Pabən' Corinton' nach catə' beze'ena' bzeine' beṇə' ca' bachso'onlilažə' Jesocristən' dižə' nach beze'e beyo'e to lo'o barcw. Na' beyeje' Sirian' na' gwche'e Prisilan' na' be'en che' Aquilan'. Na' catə' besə'əžine' Sencrean' besyə'əchoje' lo'o barcon' par ja'aque' lao yežən'. Na' antslə z'e'le yesa'aque' Sencrean' bšib yichj Pabən' par blo'e de que bach bene' complir to de'en bene' lyebe lao Diozən'. ¹⁹Nach besyə'əyo'e lo'o barcon' par besyə'əžine' Efeson' gan' besyə'əga'an Aquilan' na' Prisilan'. Na' Pabən' gozeje' lo'o yo'odao' che beṇə' Izrael ca' par be'elene' lega'aque' xtižə' Diozən'. ²⁰Na' beṇə' ca' ža' lo'o yo'oda'onə' gwsa'atə'əyoine' le' yega'anəche' len lega'aque', pero bito gone'ene'. ²¹Nach bzeine' lega'aque' dižə' gože': —Chonən byen soa' lni de'en šo'o Jerosalennə', pero güidəchcza' delana'a le'e yetš'i' šə Diozən' güe'e latjə.

Nach beze'e Efeson'. ²²Catə' bžine' Sesarean' nach gwdie' gwyeje' Jerosalennə' na' bguape' diox beṇə' ca' chəsə'ədopə chəsə'əžag chso'elaogüe'e Jesocristən' na', nach beze'e beyeje' Antioquian' gan' mbane Sirian'. ²³Gwde to tyemp gwzoe' Antioquian', nach gwyeje'

gan' mbane Galasian' na' Frigian' jətipe' lažə' beṇə' ca' chəsə'ədopə chəsə'əžag chso'elao' Jesocristən' to to yež.

Apolosən' gwdixju'i'e xtižə' Diozən' Efeson'

²⁴Na' tyemp na' bžin to beṇə' Izrael Efeson' na' le' Apolos. Apolosən' naque' beṇə' Alejandria, na' chac cho'e dižə' lao' lcue' na' bansede' binlo can' na xtižə' Diozən' de'en nyojən'. ²⁵Apolosən' gwnezene' che de'e güen ca' ben Xancho Jeso'osən' na' de'e ca' bsd blo'ine'. Na' do yichj do laže'e be'e dižə' bzejni'ine' tcho'a tšao' de'en nezene' che Jeso'osən' la'anə'əczə con de'en əbsed əblo'i de'e Juannə' na' can' bchoe' beṇə' nis na'azən' nezene'. ²⁶Nach Apolosən' sin cui chaž chžebe' gwzolao be'e dižə' che Xanchon' lo'o yo'odao' che beṇə' Izrael ca'. Na' gwse'ene' Prisilan' na' be'en che' Aquilan' can' chzejni'i Apolosən' nach gosə'əche'e le' partlə na' boso'ozejni'ichene' le' cuase'lo' can' na' Diozən' che Jeso'osən'. ²⁷Na' ca naquə Apolosən' gone'ene' šeje' gan' ne' Acaya, na' beṇə' ca' chso'onlilažə' Jesocristən' Efeson' besyə'əbeine' de'en gone'ene' šeje' na' boso'ozoje' to cart de'e bexe'e par beṇə' ca' chso'onlilaže'e Jesocristən' Acayan' par nich yoso'ozenag beṇə' ca' che' na' so'one' güen len le'. Na' catə' bžin Apolosən' Acayan' goclenchgüe' beṇə' ca' bagoclen Diozən' par chso'onlilaže'e Jesocristən'. ²⁸Na' lao lcue' bsd blo'ine' beṇə' Izrael ca' de que clelən' chso'one' xbab che

Jeso'osən', na' bzejni'ine' lega'aque' can' nyoj Xtižə' Diozən' de que Jeso'osən' naque' Cristən' ben' chəsə'əbeze' yidə par gaquəlene' lega'aque'. Na' Diozən' goclene' Apolosən' par niçh cui bi gosə'əna beṇə' Izrael ca' ca dižə' de'en be'lenə'.

Can' goquə žlac gwzo Pabən' Efeson'

19 Na' žlac zo Apolosən' Corinton', Pabən' beze'e na' bedie' yež ca' zjəchi' do ya'ada'onə' na' bežinte' Efeson'. Efeso na' bežague' baļə beṇə' ca' bachso'onlilažə' Jeso'osən'. ²Nach gožə' lega'aque': —ĲEzedəso Spirit che Diozən' lo'o yichjla'ažda'olen' catə'an gwzolaο chonlilažə'əle Jesocristən'?

Nach beṇə' ca' gwse'ene': —Bito nē'e yeneto' šə zo Spirit che Diozən'.

³Nach goze'e lega'aque': —ĲNacxan' gwchoale nisən' ža?

Nach gwse'ene': —Gwchoato' nisən' can' bzejni'i de'e Juanṇə'.

⁴Nach gož Pabən' lega'aque': —De'e Juanṇə' bchoe' beṇə' ca' besyə'adinje xtolə'əga'aque'enə' nis pero na' leczə gožə' lega'aque' de que cheyaļə' so'onlilažə'e be'lenə' ze'e selə' Diozən' par gaquəlene' nasyon Izraelən', na' be'lenə' ne' ca' le'lenə' Jeso'osən'.

⁵Beyož boso'ozenague' can' gwna Pabən' nach gosə'əchoe' nisən' de'e yoblə par besə'əlo'e de que chso'onlilažə'e Xancho Jeso'osən'.

⁶Nach Pabən' gwxoə ne'lenə' yichjga'aque'enə' na' Spirit che Diozən' bedəson lo'o yichjla'aždao' to toga'aque' na' benən par niçh gosə'əne' gwde gwdeļə dižə' na'

leczə gosə'əyixjuie' bi de'en gož Diozən' lega'aque'. ⁷Na' entr yoguə'əga'aque' zjənaquə ca do šižine'.

⁸Na' ca do šon bio' bsd blo'i Pabən', na' sin cui chaž chžebe' be'e xtižə' Diozən' len beṇə' ca' chəsə'ədopə chəsə'əžag lo'o yo'oda'onə' chzejni'ine' lega'aque' par niçh gwse'ejle' zane' de que Diozən' chnabi'e con notə'ətezə beṇə' chso'e latjə. ⁹Pero besə'əchoj baļə beṇə' zjənaquə yichjla'aždao' žod beṇə' cui gwse'ejle'eczə na' delant beṇə' ca' ža'anə' boso'ožia boso'onite'e de'en əbsed əblo'i Pabən' che Jesocristən'. Pabən' bechoje' gan' že'lenə' na' leczə bebeje' beṇə' ca' bachso'onlilažə' Jesocristən', na' gwche'e lega'aque' gan' zo to yo'o scuel che to beṇə' le Tiranno na' lo'o yo'o scuelən' bsd əblo'ichene' lega'aque' yoguə' ža. ¹⁰Na' lao chop iz ben Pabən' ca', yoguə'əloļ beṇə' ža' Asian' beṇə' zjənaquə beṇə' Izrael na' beṇə' cui zjənaquə beṇə' Izrael gwse'enene' xtižə' Xancho Jeso'osən'. ¹¹Na' Diozən' bene' par niçh Pabən' bene' miļagr de'e besyə'əbanchgüeine'. ¹²No bey na'azə na' no lachə' na'azə šə babchelən cuerp che Pabən' nach chjəsyə'əsane'en gan' zjəde beṇə' güe' ca' na' le'e chəsyə'əyacteine' che yižgüe'en chse'ine', na' beṇə' ca' yo'o yaz no de'e xio' yichjla'ažda'oga'aque'enə' leczə chesyə'əchojən.

¹³Nach baļə beṇə' Izrael ca' beṇə' ca' chsa'aš chso'one' rmech len yelə' goža' chega'aque'enə' na' leczə chəsyə'əbeje' de'e xio', gwsa'aclašə'e yesə'əchine' la

Ḳancho Jeso'osən' par yesyə'əbeje' de'e xio' ca' zjəyo'o zjəyaz beṇə' ca' na' gosə'əne': "Chonto' mendad yechojle por yelə' chnabia' che Jeso'osən' ben' choe' Pabən' xtiže'enə'."

¹⁴Zo to beṇə' Izrael na' le Eseba na' naque' beṇə' gwnabia' che bχoz ca'. Na' nitə' gažə xi'ine' na' xi'ine' ca' gažən' choso'ozetje' la Jeso'osən' gwse'enene' yesyə'əbeje' de'e xio' ca'. ¹⁵Na' to šlas catə' gwse'e to de'e xio'on ca' na' boži'in xtižə'əga'aque'enə' gožən lega'aque': —Nezda' non' Jeso'osən' na' nombi'a Pabən', pero le'e bito nacle txen len lega'aque'.

¹⁶Nach de'e xio'onə' benən par nich be'enə' bxite'e bnize' beṇə' ca' na' benene' lega'aque' con can' chene'lennə', xte gosə'əbi'e güe' na' xte gwsa'aque'ne' zi', nach bosyo'oxonje' liž be'enə' ga'alyidga'aque'. ¹⁷Na' yoguə'əloj beṇə' ca' nitə' Efeson' beṇə' Izrael ca' na' beṇə' ca' cui zjənaquə beṇə' Izrael gosə'əneze'ne' can' goquən'. Nach yogue'e besə'əžebe' na' gwso'eche' yelə' bala'aṇ che Ḳancho Jeso'osən'.

¹⁸Na' zan beṇə' ca' bachso'onlilažə' Jesocristən' gosə'əxoadole'e lao beṇə' ca' chəsə'ədopə chəsə'əžag chso'elaogüe'e Jesocristən' gwse'e lega'aque' ca malən' bagwso'one' antslə. ¹⁹Nach zan beṇə' bagwsa'ac beṇə' goža' na' beṇə' gone ya'a bosə'otobe' libr chega'aque'enə' na' gwso'oxe'en bosə'ozeye'en delant beṇə' ljuežjga'aque' ca' bachso'elao' Jesocristən', na' besyə'əbeje' cuent ca do ja'aque'ətə' zjənyeyjue' libr

ca' na' bžinən šiyon mil mech p̄lat. ²⁰Na' ca naquə xtižə' Ḳancho Jesocristən' gosə' gwlaļjəchən' na' gwyanch beṇə' bosə'ozenague' chei.

²¹Gwde goc de'e ca' Pabən' bene' xbab yeyeje' Jerosalennə' catə' yeyož šeje' gan' mbane Masedonian' na' Acayan'. Na' leczə gwne' de que catə' yežine' Jerosalennə' cheyalə' šeje' Roman'. ²²Nach bsele'e čopə beṇə' ca' chsa'aclen le' Masedonian', Temtion' len Eraston', žlac bega'anəch le' Asian' yeto čopə ža.

**Beṇə' ca' gwso'on contr Pabən'
gwso'onchgüe' scandl Efeson'**

²³Na' zan beṇə' Efeso ca' besə'əže'e Pabən' de'en bsed əblo'ine' che Jeso'osən', nach gwsa'aš gwso'olje' lao' syodan' gwso'onchgüe' scandl. ²⁴Quingan' goquə. Zo to beṇə' le Demetrio na' chone' yo'odao' dao' de p̄lat de'en naquə ca yo'odao' gan' zo xnax Diana ben' chse'ejni'alažə'e, na' chda'ochguan na' gan xen chone' na' leczə ca' beṇə' ca' chso'on žin txen len le'. ²⁵Nach btobe' beṇə' ca' chso'on žin txen len le' na' yeziquə'əchlə beṇə' leczə zjənlan chso'on žinnə' nac ca' nach gože' lega'aque': —Nezele de que ca naquə žin nga nlancho choncho, chonlenchguachon gan. ²⁶Na' babenczele na' bable'iczele can' chonlizə to de'e le Pab chsed chlo'ine' beṇə' lao' syoda Efeso nga na' casi yoguə' beṇə' ža' doxente Asian' che'e lega'aque' de que yoguə'əlojte lgu'a' lsaquə' de'e chso'on beṇəchən' bito zjəzakuə'ən par šejni'alažə'əchon. Na' beṇə' zan bachoso'ozenag che'. ²⁷Le'e

gonšc xbab naclə goncho la' nxož
bin' yesə'əne' checho por ni che
žin de'e nga choncho, na' caguə
ləzən, sino leczə nxož so'one' par
ničh yo'odao' che xnax Diana
chechon' yega'anən ca to de'e cui bi
bi zaque'e na' leczə ca' yelə' xoche
che'ena' na' yelə' zaquə' che'ena'.
Xož gac che' ca' la'anə'əczə beṇə' ža'
doxenlə Asia nga na' doxen yežlyon'
chse'ejni'alaže'e le'.

²⁸Beyož gwse'lenene' gwna
Demetrion' ca' besə'əlocchgüe' che
de'en chsed chlo'i Pabən', nach
gwso'osye'e gosə'əne': —Beṇə'
zaquə'əchgüei xnax Diana chechon',
la' le'ena' xnax che chio'o beṇə'
Efeso.

²⁹Nach to scandl juisy bachac
lao' syodan' de'en gwsa'aque' tozə
bosə'ənize' beṇə' ca' zjəle Gayo na'
Aristarco, na' gosə'əxobe' lega'aque'
xte besə'əžinte' gan' chəsə'ədobə
yoguə' beṇə' lao' syodan'. Gayon'
na' Aristarcon' zjənaque' beṇə'
Masedonia na' chsa'aše' txen len
Pabən'. ³⁰Pabən' goclaže'e šo'le gan'
zjəndobə beṇə' ca' par güe'elene'
lega'aque' dižə' pero beṇə' Efeso
ca' chso'onlilažə' Jesocristən' bito
gwso'e latjə šeje'. ³¹Na' yebalə beṇə'
migw che Pabən', beṇə' zjənaquə
beṇə' gwnabia' Asian', bosə'osele'e
rson gwse'e Pabən' de que bito
šeje' gan' zjəndobə beṇə' ca'. ³²Na'
beṇə' ca' zjəndopə zjənžaguən'
chso'one' to scandl juisy. Gwde
gwde chso'osya'a to toga'aque',
nique nejni'a bin' chəsə'əne'. Na'
caguə yoguə'əga'aque' zjənezene'
bi parən' zjəndobe'. ³³Na' beṇə' ca'
besə'əža'a Pabən' leczə besə'əže'e
notə'ətezəchlə beṇə' Izrael. Nach

beṇə' Izrael ca' zjənžaguən'
bosə'ožigue'e to beṇə' le Ljandr par
gwzeche' lao beṇə' ca' ža'anə' par
güe'e dižə' cuent cuich yesə'əže'e
lega'aque'. Na' Ljandrən' gwliš
ne'ena' par bene' señy nite'e žizə
yoso'ozenague' rsonṇə' de'en
gwzoe' laoga'aque'ena'. ³⁴Pero catə'
besə'əle'ine' le' gwsa'acbe'ine' de
que naque' to beṇə' Izrael, nach
tšil'izə besyə'əzolaogüe' gwso'osye'e
gosə'əne': —Beṇə' zaquə' juisy xnax
Diana che chio'o beṇə' Efeso.

Ca do chop or gwso'osye'e
gosə'əne' ca'.

³⁵Nach be'ena' naquə scriban
cata'əchgua goc bebec žie'
lega'aque' nach gože' lega'aque': —
Le'e beṇə' syoda Efeso, yoguə' beṇə'
ža' doxenlə yežlyon' zjənezene' de
que naquən lao na'acho əggüia
əgwyecho yo'odao' che xnax
Diana chechon'. Le'ena' naque'
le'ezelaogüe beṇə' zaque'e la'
lgu'a' lsaquə' che'ena' bxorən
yoba na'ate par lao yežlyon'. ³⁶De'e
na'anə' ža bito gaquə no əṇa
de'e yoblə. Na' le'e so žizə, bito
bi gonle sin cui gongaxjle xbab
naquən' gonle. ³⁷Ca naquə beṇə'
quinga nche'ele nga, bito əṇacho bi
bagosə'əbane' lo'o yo'odao' checho
ca' na' nique əṇacho choso'ožia
choso'onite'e xnax Diana chechon'.
³⁸Na' Demetrion' nga len beṇə'
ljuežje' ca' yelə', šə chac bi de'e
chac chega'aque' len beṇə' yoblə,
nitə'əczə beṇə' gwnabia' so'one'
yelə' jostis chega'aque'ena' šə
žja'aque' par ničh əžjse'e lega'aque'
part. ³⁹Na' šə bichlə de'e chṇable
gaquə, partlə gaquə jont chei
par choglaon. ⁴⁰Ca naquə scandl

de'e nga chac na'a nxožchgua
 əbague'echo de que choncho contr
 gobiern ca de'en nga že'e ža'acho
 nga, na' nic bi bi de ye'ega'acchone'
 šə yesə'əṇabene' chio'o che scandl
 juisyən' choncho.

⁴¹ Beyož gože' lega'aque' ca' bene'
 mendad besyə'əžaše'.

**Pabən' gwyējəche'
 Masedonian' na' Gresian'**

20 Nach catə' beyož gwche'
 ži de'e zedən', Pabən'
 goxe' beṇə' Efeso ca' chso'onlilažə'
 Jesocristən' gan' zo'enə' na' lao
 banite'enə' btipe' lažə'əga'aque',
 nach bzeine' lega'aque' dižə'. Gwde
 na' beze'e gwyējəche' Masedonian'.
²Na' gwdie' to to yež ca' zjəchi'
 Masedonian' btipchgüe' lažə' beṇə'
 ca' chso'onlilažə' Jesocristən', nach
 gwyējəche' Gresian'. ³Na' gwzoe'
 Gresian' šon bio', na' catə' bžin
 ža yeze'e par yeyo'e lo'o barcon'
 yeyeje' Sirian', gwnezene' de que
 zjəchi'inao beṇə' Izrael ca' le',
 nach mejor bezdie' doxen gan'
 mbane Masedonia na'alə, bela'atie'
 Filiposən' gan' zoa' ca orən'. ⁴Na'
 Sopater len Aristarco len Segundo
 len Gayo len Tiquico len Trofimo
 na' leczə len Temtion' ja'aclene'
 le' Asian'. Sopaterən' naque' beṇə'
 Berea, Aristarcon' na' Segundo
 zjənaque' beṇə' Tesalonica, na'
 Gayon' naque' beṇə' Derbe. Na'
 Tiquicon' len Trofimon' zjənaque'
 beṇə' Asia. ⁵Nach gosə'əbialao
 beṇə' ca' na' jəsə'əleze' neto'
 Troasən'. ⁶Gwdech lṇin' catə'an
 chsa'ogüe' yetxtil de'en cui bi xne'i
 nchixə, nada' len Pabən' gwza'ato'
 Filiposən' gan' zo'anə' na' gwyo'oto'

lo'o barcon' na' goc gueyə' ža catə'
 bžinto' Troasən' gan' banitə' beṇə'
 ca' jəsə'əleze' neto' nach gwzoto' na'
 gažə ža.

Can' goquə lao zo Pabən' Troasən'

⁷Na' catə' bžin ža dmigw
 besə'ədobə beṇə' ca' chso'onlilažə'
 Jesocristən' Troasən' gwse'ej
 gwsa'ogüe' par chjəsyə'əzalaže'e
 bi zejen par chio'o de'en bsanlažə'
 cuin Xancho Jesocristən' gwso'ot
 beṇə' le'. Na' de'en bazon yeza'
 Pabən' ca gwxezə be'e xtižə'
 Diozən' len lega'aque' xte bžinte
 do chel. ⁸Na' lo'o yo'o gan' ndopə
 nžagto' naquən de šon cuia na'
 cuartən' de'en zo le'ezelaogüe
 la'alə, zechguan yi' na' lo'i nan'
 že'eto'. ⁹Na' to bi'i güego' lebo'
 Eutico žiabo' cho'a bentannə'. Na'
 Pabən' zdonzə zda dižə' de'en
 cho'enə' na' ca' žia bi'in cho'a
 bentannə' gwtasbo' na' lao
 chtasbo'on bexopəczlabo' lao yo
 che'elə. Na' bi'i guatzə besyə'əliše'.
¹⁰Nach betj Pabən' bžine' gan'
 jəsyə'ədixjue'ebonə' le'e
 bchequə'əte' laobo'onə' gwdele'ebol'.
 Nach gože' beṇə' ca': —Bito bi
 gaquele, mbanczbo'.

¹¹Na' begüie' de'e yoblə nach
 gwsa'ogüe' na' bezolaogüe' cho'e
 dižə'anə' len lega'aque', na' ne'e
 cho'ete'en ca' catə' gwyeni'. Nach
 beze'e. ¹²Nach catə' besyə'əsa'ac
 beṇə' ca' besyə'əbeichgüeine'
 besyə'əche'e bi'i güego'on mbambo'.

**Gwsa'aque' Troasən' na'
 ja'aque' gan' nzi' Mileto**

¹³Nach bxi'ato' len Pabən' de
 que yebialaoto' yeyejto' lo'o

barcon' xte gan' nzi' Ason, na' le' gwyazlažə'əche' yeyede' yo bižlə yela'ate' Asonnə'. Ca' goquən' beyo'oto' lo'o barcon' par bežinto' Asonnə'. ¹⁴Na' Ason na' bežagto'one' nach txen beyo'olento'one' lo'o barcon' par bežinto' gan' nzi' Mitilene. ¹⁵Nach na' bessa'ato' besyo'oto' lo'o barcon' na' beteyo bežinto' galə'əzə ganə' nzi' Quio. Nach zjəzdato' na' gwde yeto ža bežinto' ganə' nzi' Samos. Na' bechojto' lo'o barcon' na' gwyejto' gan' nzi' Trogilio na' na' bega'anto' tže' bento' dezcanz. Nach beteyo besyo'oto' lo'o barcon' de'e yoblə par bežinto' Mileton'. ¹⁶Ca' bento' par nič cui gwdeto' Efeson' la' Pabən' bito gone'ene' šeichene' yež ca' zjəchi' Asian', čhedə' bachabyenchgüeine' šə galə' soe' Jerosalennə' par ža lni Pentecostesən'.

**Pabən' be'e dižə' len beṇə' golə
blao čhe beṇə' ca' chso'elao'
Jesocristən' Efeson'**

¹⁷Mileto na' zoto' bselə' Pabən' rson par bda'ac beṇə' golə beṇə' blao ca' entr beṇə' ca' chəsə'ədotə chəsə'əžag so'elaogüe'le Jesocristən' Efeson'. ¹⁸Na' catə' besə'əla'aque'enə' Pabən' gože' le'ga'aque': —Nezcezele ca güennə' babena' entr le'e dezd catə'an bida' Asian' de'e neche. ¹⁹Gwzoa' bena' xšin Diozən' do yichj do laža'a. Bito ben cuina' xen, na' zan las gwchežəchgua' čhele, na' de'e zan de'e boso'ochi' boso'osaquə' beṇə' Izrael ca' nada'. ²⁰Bzejni'ida' le'e yoguə' de'en byažjele šejni'ile sin cui bžeba'. Bzejni'ida'an le'e

catə'an chdopə chžagle na' leczə liž to tole. ²¹Bzejni'itezəda' beṇə' zjənaquə beṇə' Izrael na' beṇə' cui zjənaquə beṇə' Izrael can' chene'e Diozən' yesyə'ədinjene' xtolə'əga'aque'enə' na' can' cheyalə' so'onlilaže'e Xancho Jesocristən'. ²²Na' na'a yeya'a Jerosalennə' čhedə' babzejni'i Spirit čhe Diozən' nada' de que chonən byen yeya'a, na' bito nezdə' bin' gaquə čhia' na'. ²³Con de'en nezdə' de'en babzejni'i Spirit čhe Diozən' nada' de que to to syoda gan' yedia' ədolə'a gaca' pres na' leczə gaquə bichlə de'e čhi' saca'a. ²⁴Bito čhi' yichja' čhe yoguə' de'e ca' čhi' saca'a. La'anə'əczə šə so'ote' nada', chzanczəda' yelə' mban čhia'anə'. Čhi' yichja' ša'alao gona' yoguə'əlol de'en naquə lao na'a gona' na' mbalaz zoa' lo'o yichjla'aždaogua'anə' žlac chona'an. Xancho Jesocristən' gwleje' nada' par yo'lo lao na'a chyixjui'a dižə' güen dižə' cobə catequən' nzi'ilažə' Diozən' beṇə'chən' na' čhixjui'an žlac ne'e yo'a biš xne.

²⁵Nadan' bzejni'ida' le'e ca naquən' chnabia' Diozən' con notə'ətezə beṇə' chso'e latjə pero na'a zoa' segor de que ni tole bitoch le'ile nada' lao yežlyo nga. ²⁶De'e na'anə' əchnia' le'e de que bito bi dolə' napa' nada' šə nole cuiayi'. ²⁷La' bach bzejni'ida' le'e yoguə'əlol de'en chene'e Diozən' ənezele sin cui bi bcuaša'a. ²⁸De'e nan' ža cuec yichjle čhe yoguə'əlol de'en babzejni'ida' le'e na' le'gwsed le'gwlo'i yežiquə'əchlə beṇə' chəsə'ədotə chəsə'əžag chso'elaogüe'e Xancho Jesocristən' de que cheyalə' yoso'ozenague'

chei. Legon ca' chedə' Xancho Jesocristən' bnežjw cuine' gwdixjue' xtolə'əchon' catə'an gwsot'ot beṇə' le', na' Spirit che Diozən' bagwleje' le'e par əggüia əgwyele yeziquə'əchlə beṇə' chso'onlilažə' Jesocristən'. ²⁹Nezda' catə' cuich zoa' len le'e la'ac beṇə' se'enene' yesə'əxoayague' le'e par niç cuejyichjle cuich gwzenagle che Jesocristən'. ³⁰Na' entr le'e yesə'əchoj beṇə' yoso'osed yoso'olo'ine' le'e por dižə' güenlažə' lgua'a dižə' li, se'enene' naole de'en yoso'osed yoso'olo'ine'. ³¹De'e na'ana' legapə cuidad niç cui no yesə'əxoayag le'e. Na' ležjza'alazažə' de que šon iz bagwzoa' bsd blo'ida' le'e na' gwneyoida' le'e teža na' še'elə na' xte bcuežən nada' por le'e.

³²Na'a ža beṇə' bišə', Diozən' gwcuasə' gwcueleje' le'e len de'e malən' na' xtiže'enə' əgwzejni'ichən le'e can' nži'ilaza'e le'e. Xtiže'enə' gaquəlenən le'e sotezə sole gonlilažə'əle Jesocristən' na' leczə gaquəlenən le'e par niç žjəyezole len Diozən' txen len yeziquə'əchlə beṇə' ca' bagwlej Diozən' par zjənaque' lažə' ne'enə'. ³³Bitonə' selaža'a bi de'en de che beṇə', nic xmechga'aque'enə' na' ni xala'anga'aque'. ³⁴Nezczele ni'a na'a bgona' žin par niç bžel bi de'en byažj de'en bchinda' txen len beṇə' ca' gosə'anitə' len nada'. ³⁵Na' bena' žinnə' ca' par niç leczə blo'ida' le'e can' gonle gaquəlenle beṇə' ca' chac falt bi de'en chəsə'əyažjene'. Na' žjsa'alazažə'əle xtižə' Xancho Jesocristən' de'en gwne':
 “Mbalazəch zocho catə' chnežjwcho bi de'en chnežjwcho beṇə' cle ca

catə'an chso'one' chio'o bi de'en chso'one'.”

³⁶Na' beyož be'e Pabən' dižə'an bzo xiben' txen len yoguə' beṇə' ca' gwsone' orasyonṇə'. ³⁷Na' yoguə'əga'aque' gosə'əbežchgüe' che Pabən' na' gosə'əyele'ene' na' gwsa'ogüe'ene' bxid. ³⁸Nach ja'aclene' le' gan' beyo'e lo'o barcon'. De'e juisy de'e gwsa'aque' de'en gože' lega'aque' de que ni yešlaszə cuich yesə'əle'ine' le'.

Pabən' beyeje' par Jerosalennə'

21 Beyož bzeišazə ljuežjto' dižə' len beṇə' ca', na' beyo'oto' lo'o barcon' zjədato' lichə bežinto' gan' ne' Cos. Na' beteyo bežžinto' gan' ne' Rodas. Na' Rodas na' bezsa'ato' na' bežžinto' Patara. Na' bechojto' lo'o barcon'. ²Na' to jəyetilzəto' chza' yeto barcw yoblə chza'an šejən Fenisia na' beyo'oto' lo'inə'. ³Na' lao zjəyedato' lo'o barcon' ble'ito' isla de'en ne' Čhipre, chil'in na'acho yeglə. Na' bedeto' zjəyedato' gan' mbane Siria. Nach catə' bežinto' Tiron' gan' bosyo'oletje' yoa' de'en zonsa'anə' na' beyetjto'. ⁴Na' jəyediljto' gan' nita' beṇə' ca' chso'onlilažə' Jesocristən', na' catə' beželetto' gan' nite'enə' bega'anlenga'acto'one' to xman. Nach gwsa'atə'əyoine' Pabən' cui šeje' Jerosalennə' chedə' Spirit che Diozən' babzejni'in lega'aque' de que gaquə de'en gac che' Jerosalennə'. ⁵Na' catə' beza'ato'onə' do xi'in do xo'oləga'aque' gwsa'aque' len neto' cho'a syodan', nach bzo xibto' bento' orasyonṇə' len lega'aque' cho'a nisdə'onə'. ⁶Beyož

na' bzei ljuežjto' dižə' nach beyo'oto' lo'o barcon'. Na' besa'aque' zjəya'aque' ližga'aque'.

⁷Na' de'en beza'ato' Tiron' bežinto' gan' ne' Tolemaida na' Tolemaida na'azə bezyetjto' lo'o barcon'. Na' jəlanə'əto' beṇə' ca' chso'onlilažə' Jesocristən' Tolemaidan' na' gwzoto' len lega'aque' tža. ⁸Na' beteyo beza'alento' Pabən' na' bežinto' Sesarean' na' jəyega'antə' liž Lipən' ben' naquə txen len beṇə' ca' yəxop zjənaque' comisyon che beṇə' ca' chso'onlilažə' Jesocristən' Jerosalennə'. Na' Lipən' zotezə zoe' cho'e dižə' che Jesocristən'.

⁹Lipən' nitə' tap xi'ine' no'ol güego' na' choso'ozenebo' beṇə' bi de'en bagož Diozən' lega'acbo'. ¹⁰Zan ža gwzoto' liž Lipən' na' lao zoto'onə' bla' to beṇə' Jodean' beṇə' le Agabo. Chzenene' beṇə' bi de'en bagož Diozən' le'. ¹¹Na' catə' ble'enə' gwṇabe' doxpey Pabən' na' bchejən ni'a ne'e ca' na' gože'ene': —Spirit che Diozən' babzejni'in nada' de que beṇə' Izrael ca' ža' Jerosalennə' yoso'ocheje' ni'a na'o ca' can' babchej ni'a na'anə' len doxpeyo' nga, nach so'one' le' lao na' beṇə' ca' cui zjənaquə beṇə' Izrael.

¹²Catə' beyož beneto' can' gwna Agabən', neto' len beṇə' Sesarea ca' gotə'əyoito' Pabən' par cui šejəche' Jerosalennə'. ¹³Nach Pabən' gwne': —Bito cuežle chia' o gonle ca soa' trist. Nada' zocza' par əcheja' na' gata' Jerosalennə' laogüe de'en chyixjui'a xtižə' Xancho Jeso'osən'.

¹⁴Na' gocbe'ito' bito bi gaquə gonto' par cui šeje' Jerosalennə', na' bitoch bi gožto'one', con gožto'one': —Gaquə con de'en əṇa Xanchon'.

¹⁵Nach beyo'eni'ato' beza'ato' zjədato' par Jerosalennə'. ¹⁶Na' gwsa'ac to čopə beṇə' Sesarea ca' chso'onlilažə' Jesocristən' len neto' na' entr lega'aque' len to beṇə' Čhipren' ben' le Mnason. Bagoc zan iz chonlilaže'e Jesocristən', na' bazo liže' Jerosalennə'. Nach bxia'ato' žjəsoto' liže'enə'.

**Pabən' bežine' Jerosalennə'
na' jəlanə'e Jacobən'**

¹⁷Na' catə' bežinto' Jerosalennə' beṇə' bišə'əcho ca' ža'anə' besyə'əbeichgüeine' na' boso'oguape' neto' diox. ¹⁸Na' beteyo gwyejlento' Pabən' jəyeto' Jacobən' na' bžinto'onə' bazjəndopə zjənžag yoguə beṇə' golə beṇə' blao che beṇə' ca' chso'onlilažə' Jesocristən' na'. ¹⁹Nach bguap Pabən' lega'aque' diox na' beyožən' be'elene' lega'aque' dižə' tcho'a tšao' ca naquən' baben Diozən' par nič zan beṇə' cui zjənaquə beṇə' Izrael bachso'onlilaže'e Jesocristən' gan' be'elene' lega'aque' xtižə' Diozən'. ²⁰Na' catə' beyož boso'ozenague' de'en gož Pabən' lega'aque' nach gwsə'elaogüe'e Diozən'. Na' gwse'e Pabən': —Beṇə' bišə' nezdə' de que zan mil beṇə' Izrael ca' bagwsə'onlilaže'e Jesocristən' na' yoguə'əlole' chsa'aquene' chonən byen ṇaocho costombr de'en na lei de'en bzoj de'e Moizezən'. ²¹Na' bazjənenene' rson de que le' chdao' chsed chlo'ido' yoguə' beṇə' Izrael ca' že'e zitə' de que cuich cheyałə' yesə'ənaogüe' costombr de'en na lei de'en bzoj de'e Moizezən'. Le'egatezə ca' bazjənenene' rson de que chsed chlo'ido' cuich cheyałə'

yoso'ozoe' xi'inga'aque'enə' señy de'en ne' sirconsionnə' can' naquə costombr chechon'. ²²¿Nacxa gaquən' ža? la' zane' yesə'əžag nga catə' yesə'ənezene' de que bačh zo' nga de'e yoblə. ²³Quinga goncho. Nitə' tap beṇə' nga beṇə' zjənon to lyebe lao Diozən' na' na'a chse'enene' so'one' complir ca de'en zjənone' lyebe. ²⁴Gwche'ega'aque' yo'odao' əblaonə' na' gono' txen len lega'aque' chixjo' bia ca' əgwnežjwle bχozən' gote'. Gono' ca' par ničh yexi' yeyachle can' na' lein' de'en bzoj de'e Moisezən' na' techlə guaquə əgwžib yichjga'aque'enə' ca' costombr checho de'en de yeyož goncho complir lyeben'. Gono' ca' len lega'aque' par ničh yoguə'əlo' beṇə' əsa'acbe'ine' de que chono' can' na' leinə' na' de que bito chzo'on ca'ə'ə can' chəsə'əne'. ²⁵Babzajtə' beṇə' ca' chso'onlilažə' Jesocristən' ga yoblə beṇə' ca' cui zjənaquə beṇə' Izrael, na' gožga'acto'one' de'en chaqueto' cui cheya'ə' so'one'. Gožga'acto'one' cui sa'ogüe' yelə' guao de'en chəsə'əne' naquən che lgua'a lsaquə'ən chse'ejni'alažə' beṇə', na' cui sa'ogüe' chen, na' cui sa'ogüe' bia chat chbe' ši'ib. Na' leczə gožga'acto'one' cui yesə'əgo'o xtoga'aque'.

Gosə'əzene' Pabən' yo'odao' əblaonə'

²⁶Beteyo gwza' Pabən' gwche'e beṇə' ca' tap par yesyə'əxi' yesyə'əyache' yo'odao' əblaonə' can' na' lei de'en bzoj de'e Moisezən'. Nach Pabən' gwyo'e gan' zo bχozən' gwduxjue'ine' le' bi žan' əza'a əsa'aque' xi'lilažə' ničh yoso'onežjue' bχozən' bia ca' gote'enə'.

²⁷Na' bačh zon gaquə gažə ža chso'one' de'en chso'one' par chesyə'əxi' chesyə'əyache', nach gozej Pabən' lo'o yo'odao' əblaonə'. Na' besə'əle'i balə beṇə' Izrael ca' za'ac Asian' le', nach bosota bosota'one' beṇə' ca' nitə'əne'. Nach gosə'əzene' Pabən'. ²⁸Gwso'osya'adie' gosə'əne': —Le'e beṇə' Izrael, ledogaquəch tozə. Benga chde' doxenlə chsed chlo'ine' beṇə' de que bito naccho beṇə' güen na' de que bito bi zaquə' lei de'en bzoj de'e Moisezən' na' nic yo'odao' əblao checho nga. Na' na'a yeto de'e mal juisy banone' len yo'odao' əblao nga de'en naquə che Dioz chechon', babž'e beṇə' ca' cui zjənaquə beṇə' Izrael lo'ina'.

²⁹Gwso'one' xbabən' ca' chedə' antslə besə'əle'ine' Pabən' lao' syodan' chdalene' to beṇə' Efeso le Trofimo na' gwsa'aque'ne' gwche'ene' lo'o yo'odao' əblaonə'.

³⁰Na' gwso'onchgüe' zda zne. Nach le'e besə'ədobte beṇə' zan cho'a yo'odao' əblaonə' nach gwso'e gwso'oxe'e Pabən' na' besyə'əxobe'ene' fuerlə yo'odao' əblaonə', na' le'e besyə'əseyjwte puert ca'. ³¹Na' bačhcə chso'ote'ene' catə' bžin rsonnə' lao beṇə' gwnabia' che soldad ca' de que doxen lao' syoda Jerosalennə' bachac scandlən'. ³²Nach le'e gwza'ate beṇə' gwnabia'anə' gwche'e soldad ca' na' capitan ca', əzja'acsese' gan' ža' beṇə' zan ca'. Na' catə' beṇə' ca' chso'ot Pabən' besə'əle'ine' bachəsə'əžin beṇə' gwnabia'anə' len soldad che' ca' gan' nite'enə', nach le'e gosə'əbezte' bitoch gosə'əyine' Pabən'. ³³Nach

catə' bžin beṇə' gwnabia'anə'
 gan' ža' beṇə' ca', bene' mendad
 gwso'oxə' soldad che' ca' Pabən'
 na' boso'ocheje'ene' čhopə gden.
 Nach gwṇabene' beṇə' ca' ža'anə'
 bi le be'ena' na' bin' none'. ³⁴Na'
 gwso'osya'adia beṇə' ca' ža'anə',
 na' gwde gwde gosə'əna to toe',
 na' gwdeczə cui gwejyni'i beṇə'
 gwnabia'anə' bixaczxan' chac
 tant scandl chso'one'. Nach bene'
 mendad gosə'əche' soldad che'
 ca' Pabən' cuartelən'. ³⁵⁻³⁶Nach
 yogua' beṇə' zan ca' jəsə'ənaogüe'
 lega'aque' chso'osye'e chso'one' to
 scandl juisy. Na' catə' besə'əžine'
 cho'a scaler che cuartelən' gosə'əlen
 soldad ca' Pabən' chedə' ne'e
 gwse'lenche beṇə' ca' yoso'onize'ene'
 na' yogue'e gwso'osye'e gosə'əne':
 —Le'e gote'.

**Pabən' be'e dižə' lao
 beṇə' ca' zjənžaguən'**

³⁷Na' bač chso'e len Pabən'
 lo'o cuartelən' catə'əczla gože'
 beṇə' gwnabia'anə': —¿Eguaguə
 güe'elena' le'e to čhopə dižə'?

Nach beṇə' gwnabia'anə'
 gože'ene': —¿Echaco' dižə' griego?
³⁸¿Ecaguə len' beṇə' Egipto ben'
 gwda btob tap mil beṇə' güet beṇə'
 bat ngazə na' gwche'e lega'aque'
 latjə dašən' gan' chso'one' contr
 gobiernən'?

³⁹Nach Pabən' gože'ene': —Caguə
 le' nada'. Nada' naca' beṇə' Izrael
 na' laž'a'anə' naquən to syoda blao
 gan' mbane Silisia de'en nzi' Tarso.
 Benšga goclen be' latjə güe'elena'
 beṇə' quinga dižə'.

⁴⁰Nach beṇə' gwnabia'anə'
 gože'ene' ya'lo. Nach Pabən'

gwzeche' lao scalerən' na' bene'
 señy len ne'ena' par nitə' beṇə'
 ca' žizə yoso'ozenague' xtiže'ena',
 na' legosə'ənitə'ətie' žizə. Nach
 gwzolaogüe' be'e dižə'an len
 lega'aque' dižə' ebreo.

22 Gože' lega'aque': —Beṇə'
 bišə' legwzenag ca naquə
 rson čhia' nga gwzoa' laolen'.

²Catə' gwse'ene'ene' dižə' ebreon'
 choe' Pabən', gosə'ənitə'əche' žizə.
 Nach Pabən' gože' lega'aque':

³—Nada' naca' beṇə' Izrael.

Golja' syoda Tarso gan' mbane
 Silisian' pero bida' syoda nga na'
 ni gwcha'ogua'. Na' bseda' len to
 maestr əblaon' be'ena' le Gamaliel.
 Le' bzejni'ine' nada' cuaselol' can'
 na lei che de'e xaxta'ocho ca'. Na'
 gocda' lechguale chona' yoguə'əlol'
 can' chene'e Diozən' cayanə'əczən'
 le'e chaquele chonle na'a. ⁴Na'
 blagzejə blagzida' beṇə' ca'
 chso'onlilažə' Jesocristən'. Go'onda'
 gotga'aca'ane' na' gwxena' beṇə'
 byo ca' na' no'ol ca' chso'onlilažə'
 le' gwche'ega'aca'ane' gwže'e
 ližyan'. ⁵Beṇə' gwnabia' che bχoz
 ca' na' yoguə'əlol' beṇə' golə beṇə'
 blao ca' chəsə'ənabia' nasyon
 Izraelən' zjənezene' can' bena'.
 Lega'aque' gwso'one' yiš de'e bexa'a
 əzya'a Damascon' par nič gaquə
 sena' baltezə beṇə' chso'onlilažə'
 Jesocristən' par che'ega'aca'ane'
 Jerosalen ni gonga'acto'one'
 castigw.

**Pabən' be'e dižə' can' goquə
 bemi'e Jesocristən'**

⁶Na' goquən' lao əzya'a
 Damascon' na' mer do gobiž bazon
 əžina'anə' catə'əczla to be'eni'

juisy de'en za' yoban' gwyechjən nada'. ⁷Xte bgüixa' lao yon' na' benda' to beṇə' gože' nada': "Saul, čbixchen' nga nlagzejə nlagzido' nada' quinga?" ⁸Nach božia'an goža'ane': "¿No le' Señor?" Nach gwne': "Nada' Jeso'os beṇə' Nasaret. Nadan' nlagzejə nlagzido'." ⁹Beṇə' ca' əzya'alena'anə' besə'əžebchgüe' besə'əle'ine' be'eni'inə' pero bito gwse'ene' de'en gwna Jeso'osən' nada'. ¹⁰Nach goža'ane': "¿Bin' cheyałə' gona' ža Xana'?" Nach Xana' Jeso'osən' gwne': "Beyas na' gwyejtezə Damascon', na' to beṇə' zo na' əne' le' bin' cheyałə' gono'." ¹¹Nach be'eni'inə' xte benən ca gwçhola', nach beṇə' ca' nžaga'anə' gwso'oxe'ene' na'anə' par bžinto' Damascon'.

¹²Na' Damasco na' zo to beṇə' le Ananias beṇə' cho'elaogüe'e Diozən' do yichj do laže'e can' na lei chechon', na' yoguə'əłol beṇə' gwlaž checho ca' ža'anə' chso'e xtižə' Ananiasən' de que naque' beṇə' chon de'e güen. ¹³Ananiasən' bide' bedənie' nda' na' catə' ble'enə' gože' nada': "Saul biša'a, bele'." Catə' gwne' ca' le'e bele'iteida', nach goc ble'ida' le'. ¹⁴Nach gože' nada': "Diozən' ben' cho'ela'ocho, ben' leczə gwso'elao' de'e xaxta'ocho ca', bagwleje' le' par niçh bable'ido' Xi'ine'enə' ben' naquə le'ezelaogüe beṇə' güen. Bagwleje' le' par niçh babendo' be'elene' le' dižə', na' par niçh šejni'ido' doxen can' chene'ene' gono'. ¹⁵Go'o xtiže'enə' len beṇə' zan beṇə' že' lao yežlyo nga na' əgwzejni'iga'acdo'one' de'e ca' babendo' na' bable'ido'. ¹⁶Na' na'a ža, bito cuzəcho'. Yo'o par niçh

çho'o nis. Na' gono' orasyon lao Xancho Jesocristən' əṇabdo'one' yeya'a yeyibe' yichjla'ažda'ogo'onə'."

**Pabən' be'e dižə' can' goquə
jəsed jəlo'ine' beṇə' ca' cui
zjənaquə beṇə' Izrael**

¹⁷⁻¹⁸Nach gwde na' beyeda' Jerosalen nga na' gwyə'a lo'o yo'odao' əblaonə' jena' orasyon na' lao chona'anə' ble'idaogüe'eda' Jesocristən'. Na' gože' nada': "Na'atec na'a bechoj Jerosalen nga la' bito yoso'ozenag beṇə' quinga çhio' ca' naquə dižə' de'en go'o chia'." ¹⁹Nach goža'ane': "Xana', zjənezczəga'aquene' de que nada'anə' gwyə'a to to yo'odao' ca' na' jetə žtina' beṇə' ca' chso'onjilažə' le' na' bseyjwga'aca'ane' ližya. ²⁰Le'egatezə ca' lencza' naquəto' txen na' gwyazlažə'əçhqua' catə'ən gwso'ote' de'e Esteban' ben' be'e xtižo'onə', na' nada' gwdapa' xadon çhe beṇə' ca' gwso'ot le'." ²¹Pero Jesocristən' gože' nada': "Bchoj la' əseła'a le' zita' par go'o xtiža'anə' len beṇə' cui zjənaquə beṇə' Izrael."

**Pabən' be'elene' beṇə' gwnabia'
çhe soldad ca' dižə'**

²²To ca'atə'əzə boso'ozenague' çhe Pabən', nach gwso'osye'e gosə'əne': —Le'e got be'enə'. Bito cheyałə' soche' yežlyon'.

²³Gwso'osya'adie' xte juisy. Na' de'e tant çəsə'əloque' xte boso'ozalə' xaga'aque'enə' lao be' na' leczə gwsa'aše'e bište yon' na' boso'ozale'en. ²⁴Catə' ble'i beṇə' gwnabia' çhe soldad ca' can' chso'one'enə' nach bene'

mendad yesə'əyine'ene' yid sot nich gü'e dižə' bi de'e malən' babene' de'en chso'osya'a beṇə' ca' contr le'. ²⁵Na' bazjəncheje' Pabən' par yesə'əyine'ene' catə' gože' capitannə' ben' zecha galə'əzə: — Segon can' na lein', bito de lsens chinle nada' yid sotən' chedə' la' naca' beṇə' nasyon Roma na' niqunə' gatə'əbia' šə bin' nona'. ²⁶Beyož gože' capitannə' ca' le'e gwyejte' capitannə' lao beṇə' gwnabia' che soldad ca', ježe'ene': —Gapgo' cuidad bin' gonecho ben' bandoḷə' la' naque' beṇə' nasyon Roma.

²⁷Nach beṇə' gwnabia' che soldad ca' gwyeje' lao Pabən', gože'ene': —Gwna nda' ələ beṇə' nasyon Roma le'?

Nach Pabən' gože'ene': —Beṇə' nasyon Roma nada'.

²⁸Nach beṇə' gwnabia' che soldad ca' gože' Pabən': —Mech xen gwxaquə'əda' nada' par nich naca' cuent len beṇə' nasyon Roman'.

Nach Pabən' gože'ene': —Nada' golja' naca' beṇə' nasyon Roman'.

²⁹Nach beṇə' ca' banitə' probnid par yesə'əyine' Pabən' le'e besyə'əbižə'əte' cuite'enə', na' lecza ca' beṇə' gwnabia' che soldad ca' bžebe' chedə' gosə'ənezene' bito de lsens len lein' par yoso'ocheje' notə'ətezə beṇə' naquə beṇə' nasyon Roman' šə cuinə' choglaon bi de'e mal none'.

Pabən' zeche' lao beṇə' golə blao ca' chəsə'ənabia' Izraelən'

³⁰Nach beteyo beṇə' gwnabia' che soldad ca' boseže' Pabən'. Na' bene' mendad besə'ədobə bχoz əblao ca'

na' beṇə' golə blao ca' chəsə'ənabia' nasyon Izraelən' par nich ənezene' bi porən' choso'ocuiše' Pabən'. Na' catə' babesə'ədobə beṇə' gwnabia' ca', gwleje' Pabən' nach bzeche' le' delant lega'aque'.

23 Nach Pabən' bgüie' beṇə' golə blao ca' chəsə'ənabia' nasyon Izraelən', na' gože' lega'aque': —Beṇə' bišə', xte ža neža zoa' lao Diozən' chona' complir de'en ngü'e'e lao na'a gona' na' lo'o la'əždaogua'anə' neзда' de que chazlaže'e can' chona'anə'.

²Nach Ananias ben' naquəch bχoz əblaonə' bene' mendad len beṇə' ca' zjəzecha cuit Pabən' yesə'əbaže'e cho'enə'. ³Nach Pabən' gože'ene': —Diozən' gone' le' castigw, goxoayag. Le' chi'o nga par gono' yelə' jostis chia'anə' can' na' lein', na' chono' contr lein' de'en benlizo' mendad yesə'əbaže'e cho'anə'.

⁴Nach beṇə' ca' zjənitə' cuite'enə' gwse'ene': —Bito yoži'o xtiže'enə' ca', la' le'enə' bχoz əblaoch.

⁵Nach Pabən' gože' lega'aque': —Beṇə' bišə' bito neзда' šə be'enə' naquəch bχoz əblaoch. Ža'alə neзда' bito goža'ane' ca', chedə' nyoj Xtižə' Diozən' nan: “Bito yoži'o dižə' pesad len beṇə' gwnabia' chelen'.”

⁶Na' Pabən' gocbe'ine' de que beṇə' golə blao ca' chəsə'ənabia' nasyon Izraelən' zjənaque' choplə. Baḷe' zjənzi'e sadoso na' yebaḷe' zjənzi'e fariseo por ni che can' chse'ejle'e na' can' choso'osed choso'olo'ine'. Nach gwne', gože': —Beṇə' bišə' nada' naca' beṇə' fariseo, la' xi'in beṇə' fariseo nada'. Na' zoa' nga chonle yelə' jostis chia' por ni che de'en chejli'a de que yesyə'əban beṇə' guat ca'.

⁷Ca beyož gwne' ca' gwzoloa to bžaš entr beṇə' fariseo ca' na' beṇə' sadoseo ca' na' gwsa'aque' čhoplə.

⁸Goc ca' čhedə' beṇə' sadoseo ca' čəsə'əne' de que bito yesyə'əban beṇə' guat ca', na' bito chse'ejle'e de que nitə' angl ca' na' spirit ca', pero na' beṇə' fariseo ca' čəsə'əne' nitə' angl na' spirit na' leczə

čəsə'əne' yesyə'əban beṇə' guat ca'.

⁹Xte bachso'osya'a beṇə' fariseo ca' len beṇə' sadoseo ca' čəsə'əšaše'.

Nach gosə'əzoža' to čhopə beṇə' ca' zjənsed lein' beṇə' ca' zjənaquə

beṇə' fariseo, gosə'əne': —Ni to de'e mal cui non bengā. Na' bito

naquən güen goncho contr le'.

¿Chexa šə babsed blo'i no spiritən' o no anglən' le'?

Caguə de'e si'innə' goncho contr Diozən'.

¹⁰Can' čəsə'ədilə čəsə'əšaše'enə' xte bach chžeb beṇə' gwnabia' čhe soldad ca' šə yoso'ozoxj

yoso'onitlaocze' Pabən'. Nach beṇə' mendad besə'əžin soldad ca' par

besyə'əbejxaxje' Pabən' ladjo beṇə' ca' na' besyə'əčhe'ene' cuartelən' de'e yoblə.

¹¹Na' že' beteyon' bžin Xancho

Jesocristən' gan' de Pabən' na' gože'ene': —Bito žebo' Pab. Can'

babi'o xtiža'anə' Jerosalen nga, ca'aczen' go'on Roman'.

Boso'oxi'e so'ote' Pabən'

¹²Na' beteyon' balə beṇə' Izrael ca' besə'ədobe' par boso'oxi'e so'ote' Pabən'. Na' boso'ozo'e jorament

gosə'əne': —Diozən' gone' chio'o castigw šə ye'ej šə gaocho antslə

cuiṇə' gotcho Pabən'. ¹³Mazlə čhoa beṇə' ca' boso'oxia' so'ot

Pabən'. ¹⁴Nach ja'aque' gan' ža'

bxož əblao ca' na' beṇə' golə blao ca' čəsə'ənabia' Izraelən', gwse'e

lega'aque': —Neto' bach bzoto' jorament gon Diozən' neto' castigw

šə ye'ej šə gaoto' mientrzə cui gotto' Pabən'. ¹⁵Na' na'a ža, le'e yedopə

legon jont par nič le'e len beṇə' ljuēžje ca' əṇabele beṇə' gwnabia'

čhe soldad ca' cueje'ene' gwxe par yide' laolen' na' con gwde'itezele

de que par əšaš əche'enəchle šə bi de'e xiṇjən' none'enə'. Na'

neto' cue'enaoto'one' tnezən' par gotto'one' antslə ze'e le'e gan' ža'alēn'.

¹⁶Pero na' zo to bi'i byo čhe beṇə' zan Pabən', na' benebo' ca naquən'

bazjəngüie' so'one'. Nach gwyejbo' cuartelən' par jəzenebo' Pabən'.

¹⁷Nach Pabən' goxe' to capitannə' na' gože'ene': —Gwče' bi'i nga lao

beṇə' gwnabia' čhe soldadən'. De to de'e ye'ebə' le'.

¹⁸Nach capitannə' gwče'e bi'inə' lao beṇə' gwnabia' čhe soldadən'

na' catə' besə'əžine'enə' gože' beṇə' gwnabia'anə': —Ca naquə Pabən'

ben' de pres goxe' nada' na' gwṇabe' goclen laogua'anə' par nič

zedəgua'a bi'i nga laogo' nga. De to čhopə dižə' gü'e'lembə' le'.

¹⁹Nach beṇə' gwnabia' čhe soldad ca' bexe'e na' bi'in na' gwče'ebə'

ga cui nonə' bene, nach gože'ebə': —¿Bin' de ənao' nada'?

²⁰Nach bi'inə' gožbo' le': —Ca naquə beṇə' blao čhe beṇə' Izrael

ca' bach boso'oxi'e yedəsə'əṇabene' le' cuejo' Pabən' gwxe par əselo'one'

gan' čəsə'ədopə beṇə' gwnabia' ca', na' con yoso'ode'ine' yesə'əne'

de que yoso'ošaš yoso'očhe'ene' šə bitequən' none'. ²¹Pero bito šejli'o

chega'aque' chedə' mazlə choa
 beṇə' ca' banaquən yesə'əbe'ena
 le' tnezən' par so'ote'ene' con šə
 babnežjw cho'a xtižo'o əseļo'one',
 na' beṇə' ca' baboso'ozoe' jorament
 gon Diozən' lega'aque' castigw šə
 se'ej šə sa'ogüe' mientrzə cuiṇə'
 so'ote'ene'.

²²Nach beṇə' gwnabia' che soldad
 ca' bose'e bi'inə' na' gože'ebo': —
 Cuidad no güe'eləno' dižə' ca naquə
 rsonṇə' de'en babedəgo'o laogua'
 nga.

**Boso'osele'e Pabən' lao
 gobernadorən' ben' le Fels**

²³Nach beṇə' gwnabia' che soldad
 ca' goxe' chopə capitān che' ca'
 na' gože' lega'aque' de que cheda
 ga še'elə yesə'ənite'e probnid len
 chopə gueyoa soldad beṇə' əsa'ac
 nia'aze' na' gyon ši beṇə' yesə'əbia'
 cabey nach yechopə gueyoaga'aque'
 əso'oxe'e lanz par əžja'aque'
 Sesarean'. ²⁴Na' leczə gože'
 lega'aque' yesə'əyilje' cabey bia
 cuia Pabən', ničh ca' cui bi gaquə
 che' lao zjso'ene' lao gobernadorən'
 ben' le Fels. ²⁵Nach bzoje' to
 cart de'e əbgoxe'e lega'aque' par
 gobernadorən' na' nan:

²⁶“Señor Gobernador:

Nada' Claudio Lisias chzoja' le'
 gobernador Felix, əchguapa' le'
 diox. ²⁷Ca naquə beṇə' Izrael ca'
 gosə'əzene' bengā na' bazjəngüie'
 so'ote'ene' ža'aque' gwy'a
 na' gwchi'a soldad chia' ca' par
 jəyesla'ane' chedə' gwnezdā de
 que naque' beṇə' nasyon Roma.
²⁸Na' de'en go'onđā ənezdā bi
 porən' choso'ocuiše'ene' joa'ane'
 lao beṇə' gwnabia' chega'aque' ca'

gan' chəsə'ədobe'. ²⁹Nach gwnezdā
 de que choso'ocuiše' le' por ni che
 bizə falt che' len lei chega'aque'ena',
 pero bito əṇacho bi de'e mal
 none' par so'ote'ene' o gate'e
 ližyan'. ³⁰Nach ṇa'a babla' rson
 laogua'anə' de que beṇə' Izrael ca'
 baboso'oxi'e yesə'əbe'enaogüe'ene'
 par so'ote'ene' na' de'e na'anə'
 əchseļa'ane' laogo'onə' lgüegwzə.
 Na' babena' mendad len beṇə' ca'
 choso'ocuiš le' da'aque' laogo'onə'
 par yesə'əne' le' šə bin' chsa'ac
 chega'aque' len le'. Si'ixenšgo' che
 yoguə'əļoļ de'en chṇeyoišgueida' le'.
 Claudio Lisias.”

³¹Nach soldad ca' besyə'əbeje'
 Pabən' can' ben beṇə' gwnabian'
 mendad. Na' bedo yel gosə'əgüe'e
 nezən' len le' besə'əžinte' gan' nzi'
 Antipatris. ³²Nach gwye'eni'inə'
 besyə'əbi'i soldad ca' ja'ac con ni'e
 jəya'aque' cuartelən', na' porzə
 beṇə' güiab ca' ja'aclene' Pabən'.
³³Catə' besə'əžine' Sesarean'
 boso'onežjue' gobernadorən'
 cartən' zjənoxə'ene' nach gwso'one'
 Pabən' lao ne'e. ³⁴Na' beyož blab
 gobernadorən' cartən' gwṇabene'
 Pabən' ga be'ena'. Gotə'əbia' de
 que Pabən' naque' beṇə' Tarso gan'
 mbane Silisia. ³⁵Nach gože'ene': —
 Na' ənezdā šə bi'in ənao' catə' la'ac
 beṇə' ca' choso'ocuiš le'.

Nach bene' mendad boso'oseyjue'
 Pabən' lo'o yo'o gan' chbe' Rei
 Erodən' catə'ən chone' yelə'
 jostisən'.

**Pabən' be'e dižə' lao
 gobernadorən' ben' le Fels**

24

Na' catə' bačh goc gueyə'
 ža zo Pabən' Sesarean',

nach bžin be'en naquəch bχoz əblao ben' le Ananias na' nche'e to χopə beṇə' golə beṇə' blao na' len to beṇə' le Tertolo beṇə' chac cho'e dižə' lao' lcu'e'. Nach gwsa'ogü'e' xya contr Pabən' lao gobernadorən'.² Nach gobernadorən' bene' mendad gwyey Pabən' laogü'e'ənə' na' Tertolon' gwzolaogü'e' chcuışe'ene', che'e gobernadorən': —Si'ixenšgo' Señor Gobernador ca naquə za'ato' laogo' nga ža, la' de'en zocho binlo juisy naquən por le' na' de'e zan de'e güen de'e bachac por ni che can' chnabi'o neto'.³ Na' gatə'ətezə zoto' syempr nato' choχcwleno'onə' Señor Gobernador, tant chebeito' can' chnabi'o neto'.⁴ Na' par niχ cui gonšgüeito' le' zedte, chatə'yoišgüeida' le' əgwzenago' šlož dao' ca naquə nga ənato'.⁵ Ca naquə bengə zo laogo' nga par gono' yelə' jostis che'ənə', baχ nēzeto' de que naque' to beṇə' güec de'e zed juisy. Na' chde' entr neto' beṇə' Izrael ža'ato' doxenlə yežlyon' chta chne' neto' par niχ gaquəto' χoplə, la' naque' beṇə' blao che beṇə' ca' zjənzi' beṇə' Nasaret por ni che de'en chəsə'ənaogü'e' de'en əbsed əblo'i de'e beṇə' Nasaretən' gwle Jeso'os.⁶ Na' de'e mal juisy ngüie' gone' len yo'odao' əblao cheto'onə' de'en gone'ene' gwže'e beṇə' cui zjənaquə beṇə' Izrael lo'inə'. De'e na'anə' gwxento'one', na' gone'eto' gonto' yelə' jostis che' segon can' na lei cheto'onə'.⁷ Pero na' gwyaz Lias ben' naquə beṇə' gwnabia' che soldad ca', na' la fuers beque'ene' lao na'ato'onə'.⁸ Na' bene' mendad de que notə'ətezəto' chene'eto' əgwcuışto'one' cheyalə'

əgwcuışto'one' laogo' nga. Guac ənabdo' Pabən' bin' goquə par niχ ənēzdo' che de'e ca' chcuışto'one'.

⁹ Nach beṇə' Izrael ca' nžague'ənə' gwsa'aque' tozə gosə'əne' de que le can' naquən.¹⁰ Nach gobernadorən' bene' seņy len Pabən' par niχ ənē'. Nach gwzolaogü'e' gwne': —Ca naquə nēzda' de que baχ goc zan iz chono' yelə' jostis che nasyon nga, de'e na'anə' ža chebeida' gwzo rson chia'anə' laogo'onə'.¹¹ Na'a chac šižin žazə gwyə'a Jerosalennə' par əje'elaogua'a Diozən'. Na' gwaquə ənabga'acdo'one' šə le can'.¹² Na' bito ənacho chacyoža' no beṇə' lo'o yo'odao' əblaona' na' bitonə' yesə'əle'ine' nada' ša'a do lo'o yo'odao' ca' yelə' par žjəta žjənia' beṇə', na' nic lao' syodan'.¹³ Na' bito bi de so'on beṇə' quinga par yesə'əlo'e de que napa' dolə' can' choso'ocuiše' nada'.¹⁴ Con nia' le' clar de que cho'elaogua'a Dioz ben' gwso'elao' de'e xaxta'oto' ca', na' naogua' costombr cobə par cho'elaogua'ane' de'en chəsə'əna zan beṇə' gwlaž chia' ca' zjənaquə costombr mal. Pero bito zjənaquən costombr mal, la' chejli'a che yoguə' libr ca' gan' zjənyoj Xtizə' Diozən' de'en bzoj de'e Moisezən' na' yeziquə'əchlə beṇə' gwso'e xtiže'ənə' cana'.¹⁵ Na' zoa' lez de que Diozən' yolis yosbane' beṇə' guat ca'. Yolis yosbane' beṇə' güen na' beṇə' mal, ca'aczən' beṇə' gwlaž chia' ca' nite'e lez gone'.¹⁶ Na' zotezə zoa' chi' yichja' chona' can' chene'e Diozən' par niχ nēzda' lo'o yichjla'aždaogua'anə' de que bito napa' dolə' lao Diozən' na' nic lao beṇə'əchən'.

¹⁷ Bagoc zan iz zoa' zitə', pero na'a ža babeyeda' Jerosalennə' par bnežjua' mech de'en btoba' par beṇə' yašə' ca' chəsə'əyažj chəsə'əchine' na' jua'a de'e jua'a lo'o yo'odao' əblaonə'.

¹⁸ Na' goquən' zoa' lo'o yo'odao' əblaonə' babexi' beyacha' can' na lei de'en bzoj de'e Moizezən', na' chnežjua' de'e ca' chnežjua' par Diozən'. Ca' chona' catə' to čhopə beṇə' Izrael za'ac Asian' bla'aque' gan' zoa'anə'. Bito əṇacho nochlə ntopa' na' bitobi scandl chona'.

¹⁹ Na' lega'aque' žalə' bda'aque' laogo' nga par yoso'ocuišə' nada' šə bin' chsa'ac čhega'aque' len nada'. ²⁰ O beṇə' quinga nitə' nga guac yesə'əne' šə bi de'e malən' nona' catə'əna' bosə'odie' nda' lao beṇə' gwnabia' čhega'aque' ca'.

²¹ Tozə de'en gwnia' laoga'aque'en, catə'ən gožəga'aca'ane': "Ca naquə nga chonle yelə' jostis čhia'anə', chonlen čhedə' chejli'a de que gwžin ža yesyə'əban beṇə' guat ca'."

²² Catə' bene goberṇador Felsən' gwna Pabən' ca', bitoch gone'ene' gone' yelə' jostis čhe Pabən' ca orən', čhedə' la' baṇezczene' čhe de'en chejle'e chio'o chonlilažə'əcho Jesocristən'. De'e na'anə' par gwcho'one' čhega'aque' sša gože' lega'aque': —Catə' yidə Lisiasən' ben' naquə beṇə' gwnabia' čhe soldad ca', cana' yeyož gwzenaga' ca naquə de'e nga chaole xya nga.

²³ Nach Felsən' bene' mendad len to capitan čhe' par beče'e Pabən' gaquache' pres na' gatə' lsens par gone' bitə'ətezə chene'ene' na' guaquə žjəsə'əlanə' beṇə' migw

čhe' ca' le' par əso'ene' šə bi de'e čhyažjene'.

²⁴ Goc to čhopə ža beza' goberṇador Felsən' Sesarean' catə' bežzine' len no'ol čhe'enə'. Naque' no'olə Izrael na' le' Drosila. Na' gox Felsən' Pabən' na' bzenague' be' Pabən' dižə' can' cheyalə' gonlilažə'əcho Jesocristən'.

²⁵ Nach Pabən' be'elene' le' dižə' can' cheyalə' goncho par gaccho beṇə' güen lao Diozən' na' can' bito cheyalə' güe'echo latjə ṇabia' la'ažda'omalchon' chio'o, na' can' əžin ža catə' Diozən' čhoglaogüe'en čhe to to chio'o beṇač šə nocho napcho dolə'. Na' goberṇador Felsən' bžebe' xte juisy ca naquə dižə' de'en choe' Pabən'. Nach gože'ene': —To ca'atə'ətə' gwzenaga' na'a. Guaxcza' le' catə' gatə' to latjə čhia'.

²⁶ Goberṇadorən' goquene' cueze' par nič Pabən' əgwnežjue'ene' mech par yosane' le', na' de'e na'anə' goxe'ene' telizə be'elene' le' dižə'. ²⁷ Ca' chac gwde čhop iz, na' le'e bžine tyemp gwde ben' le Porsio Festo goque' goberṇador. Na' de'en gone'e Felsən' yega'ane' binlo len beṇə' Izrael ca' catə' cuich naque' goberṇadorən', de'e na'anə' ze'e yechoje' bene' mendad ze'e deczə Pabən' pres.

Pabən' chzo rson čhe' lao goberṇadorən' ben' le' Festo

25 Na' catə' bžin Feston' Sesarean' gan' ṇabi'e, gwzoe' šonə ža na' gwze'e gwyeje' Jerosalennə'. ² Nach bxož əblao ca' na' nochlə beṇə' blao čhe beṇə' Izrael ca' ja'aque' jesə'əye'ene'

par boso'ocuiše' Pabən'. ³Na' gwsa'atə'əyoine' Feston' gone' goclen gaquə can' chəsə'əṇabe', gonšgue' mendad əžjsə'e Pabən' Jerosalennə'. Gwsa'atə'əyoine' le' gone' ca' par niç lega'aque' yesə'əbe'enaogüe' Pabən' par so'ote'ene' tnezən'. ⁴⁻⁵Nach Feston' gože' lega'aque' de que Pabən' naque' segor Sesarean' na' leczə gože' lega'aque': —Nada' bito yega'ana' Jerosalennə' sino le'e cheza'atia'. Benə' ca' zjənaquə blao entr le'e guaquə əsa'aque' len nada', na' šə bi de'e xinjən' non be'ena', guaquə yoso'ocuiše' le' Sesarean' gan' chona' yelə' jostisən'.

⁶Na' gwzoe' len lega'aque' ca do xon' o ši ža na' beyeje' Sesarean'. Nach beteyo gwchi'e gan' chone' yelə' jostisən' na' bene' mendad gwyej Pabən' laogüe'ena'. ⁷Nach catə' bžin Pabən' laogüe'ena' banitə' benə' Izrael ca' za'ac Jerosalennə' na' le'e gwse'echjte' le' na' gosə'əzolaogüe' chosə'əcuiše'ene' chəsə'əne' de que de'e zan de'e mal juisy de'e chone', pero na' bito bla'alaon šə chso'e dižə' lin'. ⁸Nach Pabən' bzo rson che'ena' gwne': —Ni tozə falt cuinə' gapa' len lei che neto' benə' Izrael, na' ni len yo'odao' əblao cheto'onə' na' nic len Rei Sesar ben' chnabia' doxen nasyon Roman'.

⁹Nach Feston' ca naquə gone'ene' soe' binlo len benə' Izrael ca' gože' Pabən': —ĎEgüe'endo' sa'o niç gona' yelə' jostis chio'onə' Jerosalennə' ca naquə yoguə' de'e quinga choso'ocuiš benə' quinga le'?

¹⁰Nach Pabən' gwne': —Laogo' len' zecha', banzo Rei Sesarən'

le' par gono' yelə' jostis, na' nga cheyalə' gaquə yelə' jostis chia'anə'. Ca naquə benə' Izrael quinga, le' nęzczədo' de que bito bi bi ne'e gona' contr lega'aque'. ¹¹Žalə' bi falt bagwdapa' o bichlə de'e babena' de'e cheyalə' gata', bito nia' cui gata'. Pero de'en cui bi bi nona' ca naquə de'en choso'ocuiš benə' quingan' nada', notono no zaquə' əgwde nada' laoga'aque'ena'. Na' na'a chnaba' tia' lao Rei Sesarən' niç cuine' gone' yelə' jostis chia'anə'.

¹²Nach Feston' len benə' gwnabia' che' ca' yelə' boso'oxi'e naquən' so'one', nach gože' Pabən': —Lao Rei Sesar na'anə' bagwṇabo' tio', na' laogüe' na'anə' šejo'.

Feston' bdie' Pabən' lao Rei Agripan'

¹³Na' ca' chac gwde to chopə ža catə' Rei Agripa na' no'ol che' Berenise bla'aque' Sesarean' par bedəsə'əguape' Feston' diox. ¹⁴Na' gwnite'e zan ža, na' be'elen Feston' Rei Agripan' dižə' ca naquən' chac len Pabən', gože'ene': —Zo to benə' nyixjw Felsən' pres nga. ¹⁵Na' catə' gwya'a Jerosalennə' bxož əblao ca' na' len nochlə benə' golə benə' blao che nasyon Izraelən' gosə'əṇabe' choglaogua'an che' de que nape' dolə'. ¹⁶Pero na' gožəga'aca'ane' ca naquə costombr che chio'o benə' nasyon Roma bito gaquə gwdechə benə' sa'aque' castigw sin cui yesyə'ədillaogüe' benə' ca' choso'ocuiš lega'aque' na' gatə' latjə yoso'ozo rson chega'aque' ca naquə de'en choso'ocuiše'ene'. ¹⁷Na' catə' bla'aque' nga beteyo le'e gwche'etia' gan' chona' yelə'

jostisən', nach bena' mendad gosə'əbeje' Pabən'. ¹⁸Na' beyož bosə'ocuiš beṇə' ca' le', ni tozə de'en chacda' choso'osbague'ene' le' cui bi gosə'əne'. ¹⁹De'en chaczə čhega'aque' len le', cui chejṇi'alažə' Pabən' can' chse'ejṇi'alažə' lega'aque' na' chso'e dižə' che to de'e beṇə' guat beṇə' gwle Jeso'os, na' Pabən' ne' de que mbancze'. ²⁰Na' nada' ža, cui bežellaža'a bi gona' ca de'en chac čhega'aque', nach goža' Pabən' šə chene'ene' yeza'alene' nada' Jerosalennə' par nič gaquə yelə' jostis che'ena' ca naquə de'e ca' choso'osbague'ene' le'. ²¹Per na' gwnab Pabən' šeje' gaquə yelə' jostis che'ena' lao Rei Sesarən'. Nach bena' mendad beyejue' mientr gwdi'ane' lao Rei Sesarən'.

²²Nach Rei Agripan' gože' Feston': —Łeczə che'enda' gwzenaga' can' choe' ben' dižə'ənə'.

Nach che' Feston' le': —Gwxe əgwzenago'.

²³Nach beteyon' de'e juisy chacchgua besə'əžin Rei Agripan' na' len Berenise, nach gwso'e gan' chi' gubernadorən', na' łeczə zjəlen beṇə' gwnabia' che soldad ca' na' yeziquə'əchlə beṇə' blao che syodan'. Nach ben Feston' mendad jəsə'əxi'e Pabən'. ²⁴Nach Feston' gwne': —Rei Agripa na' yoguə'əłəł le'e ža'ale nga len neto', ca naquə bengə chgiiale nga, beṇə' zan beṇə' Izrael ca' ža' Jerosalennə' na' beṇə' ca' ža' nga bagosə'əne' nada' de que beṇə' mal bengə, chəsə'əṇabe' de que cabich cheyalə' əban bengə yežlyon'. ²⁵Pero na' chgiia' nada' de que bito bi bi

none' par čhoglaogua'an gate', na' bagwṇabe' tie' lao Rei Sesarən' na' bač goža'ane' šeje'ena'. ²⁶Pero na' cui de bixa de'e gwzoja' rein' par yapa'ane' bin' none'. De'e na'anə' bač gwleja'ane' laole nga, na' catec naco' le' Rei Agripa, par nič na' yeyož əgwzenagcho che' na' gatə' de'e gwzoja'. ²⁷La' chacda' bito bi rson napa' con əgwseła'a to pres sin cui gwzoja' šə de bi de'en none'.

**Pabən' bzo'e rson che'
lao Rei Agripan'**

26 Nach Rei Agripan' gože' Pabən': —Guaquə ṇio' par əgwzo' rson chio'ona'.

Nach Pabən' bze ne'en lao beṇə' ca' gwzolaogüe' bzo rson che'ena' gwne': ²—De'e mba juisy nga bagoc čhia', Rei Agripa, ca naquə nga de to latjə ṇa'a gwzo rson čhia'anə' laogo' nga ca naquə de'en choso'ocuiš beṇə' Izrael gwlaž čhecho ca' nada'. ³Le' nezdə ca naquə costombr che chio'o beṇə' Izrael, na' ca naquə beṇə' gwlaž čhecho ca' chsa'acyože' entr lega'acze'. De'e na'anə' ža chata'əyoišgueda' le' par garəšgo' yelə' chxenlažə' əgwzenago' čhia'.

**Pabən' be'e dižə' can' bene' catə'
cuiṇə' gonlilaže'e Jesocristən'**

⁴Yoguə'əłəł beṇə' Izrael gwlaž čhecho ca' zjənezcene' nac gwzoa' dezd gwzolao bgüego'otia', gwzoa' Jerosalennə' entr lega'aque'. ⁵Na' zjənezcene' de que nada' dezd bgüego'otia' naca' beṇə' fariseo, na' neto' beṇə' fariseo naochto' yoguə'əłəł costombr de'en de ca naquən'

chejni'alažə'əcho Diozən' mazəchlə ca notə'ətezəchlə beṇə' Izrael. ⁶Na' beṇə' gwlaž čecho ca' bachəsə'əṇabe' gono' yelə' jostis čhia' laogüe de'en chejli'a de que gwžin ža catə' Diozən' yosbane' beṇə' guat ca' can' bene' lyebe len de'e xaxta'ocho ca'. ⁷Beṇə' zan lao šižin family che chio'o beṇə' Izrael nite'e chso'elaogüe'e Diozən' do yichj do lažə'əga'aque' na' do ža do yel nite'e lez gaquə complir ca naquə lyeben'. Na' ni che de'en zoa' lez yosban Diozən' beṇə' guat ca', de'e na'anə' choso'ocuiš beṇə' Izrael ca' nada' Rei Agripa. ⁸¿Bixčhexan' chaque le'e caguə de'e no šejle'enə' de que Diozən' cholis chosbane' beṇə' guat ca'?

Antslə Pabən' blagzejə' blagzide' beṇə' ca' chso'onlilažə' Jesocristən'

⁹Antslə nada' godca' de'e cheyałə' gona'an benteca' contr beṇə' ca' chso'onlilažə' Jeso'os ben' naquə beṇə' Nasaret. ¹⁰Beṇə' zan beṇə' Jerosalen ca' bagwlej Diozən' par zjənaque' lažə' ne'enə' bseyjua' ližya segon can' na yiš de'en beṇə'a de'en gwso'on bχoz čecho ca' beṇə' ca' zjənaquə beṇə' blao. Na' catə' bχoz əblao ca' gosə'əchoglaogüe'en so'ote' beṇə' ca' chso'onlilažə' Jesocristən' lena' bda' cho'a xtiža'a. ¹¹Na' de'e zan las gwya'a to to yo'odao' jəsaquə'əzi'iga'aca'ane' par nič yoso'ožia yoso'onite'e Jesocristən'. Na' de'e tanttec bgue'iga'acda'ane' gwya'a blagzejə' blagzidəga'aca'ane' syoda che nasyon ca' yela'.

Pabən' be'e dižə' can' goquə bembie Jesocristən'

¹²Na' leczə güen de'e na' əzya'a Damascon'. Noxa'a yiš de'en gwso'on

bχoz čecho ca' beṇə' ca' zjənaquə beṇə' blao de'en chon mendad gona' ca'. ¹³Pero na' lao əzya'a ngua'a nezən' ca do gobiz catə'əczla ble'ida' to be'eni' juisy de'e za' le'e yoban' xte bnitlaon be'eni' che bgüižən' na' to gwyechjzən nada' len beṇə' ca' žaga'anə'. ¹⁴Na' xte bgüižə yoguə'əto' lao yon'. Ca' deto' lao yon' catə' benda' to beṇə' chṇe' dižə' ebreo gwne': "Saul, ¿bixčhen' nlagzejə nlagzido' nada'? De'en chono' contr nada' chone zi' cuino' can' chac che to go'on bian' chlibə lao ya la de'en zo lao garrošən'." ¹⁵Nach bolgüižə'ane' chara'ane': "¿No le' Señor?" Nach gwna Xancho Jeso'osən': "Nada' Jeso'osən' nlagzejə nlagzido'. ¹⁶Pero na'a beyas la' bach bloe' laogua' le' par nič gono' xšina'anə' na' go'o dižə' che yoguə'əłol de'e quinga bach ble'ido', na' yeziquə'əchlə de'e ze'e le'ichdo' catə' yozloe' laogua' le'. ¹⁷Na' na'a əseļa'a le' gan' ža' beṇə' ca' cui zjənaquə beṇə' Izrael na' bito gua'a latjə no got le', ni beṇə' Izrael na' nic beṇə' ca' cui zjənaquə beṇə' Izrael. ¹⁸Eseļa'a le' par nič əgwzejni'ido' lega'aque' nac so'one' par nič šo'o be'eni' čhia'anə' lo'o yichjla'ažda'oga'aque'enə' na' yesə'əbejyichje' de'e malən'. Na' yesyə'əchoje' xni'a gwxiye'enə' na' yoso'ozenague' che Diozən' na' nitlao xtołə'əga'aque'enə', na' əsa'aque' txen len yoguə'əłol beṇə' ca' yelə' bagwlej Diozən' par zjənaque' lažə' ne'enə' por ni che de'en chso'onlilažə'e nada'."

Pabən' bzenague' can' gož Jesocristən' le'

¹⁹Na'a ža Señor Rei, bzenaga' ca naquə de'en bzejni'i Jeso'osən' nada' len de'en ble'idaogüe'eda'.

20 Zgua'atec Damasco na' gwzolaogua' bzejni'ida' beṇə' ca' ža'anə' che Jesocristən', na' leczə ca' Jerosalennə' na' doxen gan' mbane Jodean'. Na' lente beṇə' ca' cui zjənaquə beṇə' Izrael gwɔdixjue'iga'acda'ane' de que cheyałə' yesyə'ədinjene' xtolə'əga'aque'enə' na' yoso'ozenague' che Diozən', na' so'one' ca gacbia' de que babesyə'ədinjene' xtolə'əga'aque'enə'. 21 Na' por ni che de'en chzejni'ida' beṇə', de'e na'anə' beṇə' Izrael gwlaž checho ca' gosə'əzene' nada' lo'o yo'oda' əblao chechon' na' gwsa'aclaže'e so'ote' nada'. 22 Pero na' Diozən' zocze' chaclene' nada' par nich zocza' cho'a xtiže'enə' xte ža neža len yoguə'əloł beṇə', la'anə' bi'i xcuidə' na' la'anə' beṇə' golə. Bito nacho bilə bagwnia' sino ca de'en gosə'ənacə de'e profet ca' beṇə' ca' gwso'e xtižə' Diozən' cana', na' can' gwna de'e Moisezən' che de'en za' gaquə ca tyemp chega'aque'enə'. 23 Gwso'e dižə' de que Cristən' ben' sełə' Diozən' par gaquəlene' nasyon chechon' cheyałə' saquə'əzi'e na' le' gaque' beṇə' nech yebane' ladjo beṇə' guat ca' na' cuich gate'. Na' leczə gwso'e dižə' de que Cristən' gwzenene' chio'o naccho beṇə' Izrael na' len beṇə' ca' cui zjənaquə beṇə' Izrael naquən' goncho par nich šo'o be'eni' che Diozən' lo'o yichjla'ažda'ochon'.

Pabən' gone'ene' gone' par nich Rei Agripan' gonlilaže'e Jesocristən'

24 Na' ca' cho'e dižə'anə' par chzo rson che'enə' catə'əczla gwṇe

Feston' zižjo gože'ene': —Chac tonton' Pab. De'e tanttec chsedo' na'anə' bačh chac tonto'.

25 Nach Pabən' gože' Feston': —Bito chac tonta' Señor Gobernador. Dižə' lin' cho'a na' de'e yejni'anə'. 26 Ca naquə Rei Agripa nga, nezene' che de'e quinga cho'a dižə' chei na' de'e na'anə' cho'a dižə'an clar laogüe' nga. Zoa' segor cabi nacho cui nezene' che' de'e ca', la' caguə goquə de'e ca' do gazə zo bižə' de'e ngašə'anə'. 27 Le' Rei Agripa, žəchejli'o ca naquən' bosozož de'e profet ca' beṇə' ca' gwso'e xtižə' Diozən' cana'? Nada' nezdə' de que chejli'o.

28 Nach Rei Agripan' gože' Pabən': —žEchacdo' len to čhopə bi'in bagwna'onə' gonlilažə'tia' Jesocristən'?

29 Nach Pabən' gože'ene': —Chona' orasyon lao Diozən' de que šə to čhopə dižə' o šə zan dižə' de'e bagwnia' le', le' na' yoguə'əloł beṇə' ca' choso'ozenag can' ənia' nga so'onlilaže'e Jesocristən' can' chonlilaža'ane', pero sin cui gacle pres ca nada' nga ncheja' naca' pres.

30 Na' beyož gwna Pabən' ca' bezoža' Rei Agripan' len no'ol che' Berenisen' na' len gobernador Feston' na' beṇə' ca' gosə'əbe' len lega'aque'. 31 Nach bežaše' jəsyə'ədobe' ga yoblə nach gwse'e ljuežje': —Bito ənacho bi chon benga de'e zaquə' gate' o gate'e ližya.

32 Nach Rei Agripan' gože' Feston': —Guaquə yezan benga žalə' cuinə' nabe' tie' lao Rei Sesarən' par gone' yelə' jostis che'enə'.

Boso'osele'e Pabən' Roman'

27 Nach bosoxi'e yoso'osele'e neto' Italian'

tla'o nis. Na' Pabən' len yeto
 çhopə pres ca' gwsa'aque' lao na'
 to capitan beṇə' le Jolio. Naque'
 capitan che zan soldad che rein'
 beṇə' zjənzile "Batallon Augusto".
 Na' nada' Locas zoa' len Pabən'.

²Nach gwyo'oto' to lo'o barcw de'e
 za' Adramitio par əžinən Asia. Na'
 za'alēn Aristarcon' neto'. Naque'
 beṇə' syoda Tesalonica de'en chi'
 gan' mbane Masedonian'. ³Beteyo
 bžinto' Sidonṇə' na' Jolion' bencze'
 güen len Pabən' be'e latjə par
 gwyeye' gan' ža' beṇə' migw che'
 ca' par boso'onežjue'ene' bi de'en
 byažjene'. ⁴Na' gozsa'ato'onə' na'
 zdato' to lcue'ej latə' yežlyo de'e
 nga'an lo'o nisdə'onə' de'en nzi'
 Čipre, chedə' be'ēnə' cheçhən
 clelə, na' yežlyo na'anə' bcue'ejən
 neto' len be'ēnə'. ⁵Na' beyož
 gwdeto' lao nisdə'o' de'en de cho'i
 gan' zjəmbane distrit ca' de'en
 zjənzil' Silisia na' Panfilia nach
 bžinto' syoda gan' nzi' Mira de'en
 chi' gan' mbane distrit che Lisia.

⁶Na' na' bžele capitannə' to
 barcw de'en za' syoda Alejandria
 na' chza'an šejən Italian', na' bene'
 mendad gwyo'oto' lo'inə' na' lenczə
 le'. ⁷Nach gwza'ato' zdato' lao
 nisən' de'e yoblə. Zan ža zdato'
 šo'olažə' na' do caṇe gwdeto'
 gaḷə'əzə gan' ne' Gnido. Na' por
 ni che can' gwyechj be'ēnə' de'e
 na'anə' cui be'ēn latjə šejto' lichə
 na' de'e na'anə' gwcua'ato' zdato'
 to lcue'ej yelə' yežlyo de'e nga'an
 lo'o nisdə'onə' de'en nzi' Creta, part
 de'en zo gaḷə'əzə syodan' de'en
 nzi' Salmon, la' na' cuitēc gwyechj
 be'ēnə' fuert. ⁸Na' zdato' do caṇe
 to lcue'ejən' na' bžinto' ganə' nzi'

Buenos Puertos gaḷə'əzə yež de'en
 nzi' Lasea.

⁹Na' gocze gwde zan ža zdato' na'
 baçh chonən zdebə par šejəçto'
 lao nisən' chedə' baçh bžin tyemp
 catə' cheçhçhgua be' zaguən'. ¹⁰Na'
 Pabən' gwṇeyoine' beṇə' ca' che'e
 lega'aque': —Chgüia' de que ca
 naquə bjaç nga naquən leçhguale
 zdebə na' nxož caguəgazə cuiayi'
 de'en noa' barcon' sino lenczə
 len na' len yelə' mban checho šə
 šejəçcho.

¹¹Pero na' capitan che soldad ca'
 bzenaguəche' che ben' nsa' barcon'
 na' che xan barcon' cle ca che
 de'en gož Pabən' lega'aque'. ¹²Na'
 latjə gan' zoto' bito naquən par
 əgwdeto' tyemp zaguən', na' gwyən
 beṇə' ca' gwsa'aque'ne' šə gaquə
 güench sa'ato' na' əžinto' yež gan'
 ne' Fenise par niçh na' zoto' te de'e
 zaguən'. Fenisen' naquən puert che
 Creta gan' cuitēc cheçh be' de'en
 za' la'alə na' che'elə.

Gwyechj to be' gual lao nisdə'onə'

¹³Na' gwzolao cheçh to be' gol
 de'e za'ate che'elə, nach beṇə' ca'
 choso'osa' barcon' gwsa'aque'ne' de
 que guaquə can' chse'ene'ene', nach
 gozsa'ato' zdato' lao nisən', zdato'
 gaḷə'əzə Cretan'. ¹⁴Pero na' caguə
 gwža catə' za' to be' gual de'e nzi'
 Noreste de'e cheçhən contr galən'
 zda barcon'. ¹⁵Na' bžiguə'əxəxjən
 barcon', caguə bi goquəch gonto'.
 Na' gwlejjyichjšazə cuinto' len
 barcon' nžiguə'ən neto'. ¹⁶Na' ca'
 zdato' to lcue'ej yežlyo dao' de'e nzi'
 Claudia de'e chi' lo'o nisdə'onə' gan'
 cuitēc gwyechj be'ēnə'. Na' barcw
 cha'o gan' yo'oto'onə' nxobən to

barcw dao', na' cane goc becueto'on lo'i de'e cha'onə'. ¹⁷Na' ca beyoż becueto' barcw da'onə' lo'i de'e cha'onə', na' bchejto' barcon' ryat par gwlo'oto' fuers chei. Na' laogüe de'e bžebto' gaguə'əto' gan' naquə yox, bletjto' lachə' de'en chon par niçh chza' barcon' niçh cuich bžiguə'ətec be'enə' len. Na' zdato' lao nisən' con can' gwyey barcon'. ¹⁸Pero na' bžaglaochguato' chedə' gwyechjchgua to be' gual juisy nach beteyo bos'ošašzaze' yoa' ca' nsa'annə' bos'ozałe'en lo'o nisən'. ¹⁹Na' ža gwyon žeinə' goclena'act'o'one' besšazəto' šinłaz barcon'. ²⁰Na' zan ža bito bolo'e lao bgüižən' na' še'elən' ni que zjənła'azə beljw ca'. Na' de'e tant gwyechjchgua be'enə' xte bitoch gwzoto' lez yelato'.

²¹Na' goquən' baçh gwža cui chaoto', nach Pabən' gwzože'e ladjo beñə' ca' na' gwne': —Le'e beñə', žalə' əbzenagle chia' catə'ən gwnia' cui sa'acho Cretan' bito chac checho quinga žalə' ca' na' bito gwžiyai' šinłazchon'. ²²Pero na' chnia' le'e le'e yebei chedə' ni to le'e cui cuiayi' yelə' mban chelen', lete barcw nga cuiayi'in. ²³Na' ca naquə cho'elaogua'a Diozən' na' baben cuina' lažə' ne'enə', de'e na'anə' bablo'e lao angl che'lenə' nada' neže', na' anglən' gwne' nada': ²⁴“Bito žebo' Pab. Syempr cheyałə'əczə' tio' lao Rei Sesarən', na' əchnia' le' de que Dioz na'anə' gone' par niçh ni to beñə' ca' za'ac len le' cui sa'at.” ²⁵Na'a ža, le'e yebei, chedə' nezdə' de que Diozən' gone' par niçh gaguə can' bagwna anglən' nada'. ²⁶Pero bia'aczə

yecho'onən chio'o yo biž de'e nga'an latə' lo'o nisən'.

²⁷Na' že' goc žda'obiž zdato' nilə na'alə' lao nisdə'o de'enə' nzi' Adria. Na' ca do chel beñə' ca' zjənsa' barcon' gwsa'acbe'ine' de que baçh zdato' serczə to yo biž. ²⁸Nach bos'oletje' to plom lo'o nisən' par bos'očiħe' ca do ja'aquə'ətə' zitjw naquə nisən', na' beyoż bos'očiħe'ennə' goquən šil'intochoa metr. Nach gosə'əzdie' yelatə' na' bosə'əzchiħe'en de'e yoblə na' ca orən' goquən gažəchoa metr. ²⁹Na' besə'əžebe' žjti'i barcon' yej lo'o nisən' nach bos'oletje' tap ya xen de'en ne' ancla, bos'ocheje'en zda xni'alei par gwsə'oħə'ən barcon' na' bazjəzelaže'e še'eni'. ³⁰Nach beñə' ca' zjənsa' barcon' gwsa'aclaže'e yesy'əxonje' na' bos'oletje' barcw da'onə' con chosə'əde'itezene' yoso'oletje' ancla ca' de'en yoso'ocue' laolei. ³¹Nach Pabən' gože' capitannə' na' len sołdad ca': —Šə beñə' quinga cuich nite'e lo'i nga, ni tocho cui yelacho.

³²Nach sołdad ca' gosə'əçhogue' don' zjənca'a barcw da'onə' na' bos'o'sane'en.

³³Nach do šbał Pabən' gwzolao gwneyoine' beñə' ca' de que cheyałə' sa'ogüe', che'e lega'aque': —Na'a chac žda'obiž zole cui chtasle na' cui chaole. ³⁴Na'a ža, chatə'əyoišgueda' le'e le'e gao par niçh sole binło, la' de'e li ni tole cui cuiayi'ile.

³⁵Na' beyoż gwne' ca' beħe'e to yetxtilən' na' be'e yelə' choxcwlen che Diozən' lao yoguə'əłol neto' ža'ato' lo'o barcon' nach gwxi'e to

pedasən gwzolaogü'e' chaogü'e'en.
³⁶Nach yoguə'əlołto' bebeicheto' na'
 lecəə gwdaoto'. ³⁷Chopə gueyoa
 gyonš'i'ntoto'onə' ža'ato' lo'o
 barcon'. ³⁸Na' gwde gwdaoto' con
 ca beljeto' na' ca naquə trigon' de'e
 ne'e zjəns'e'e, gwso'ose'en lo'o nisən'
 nič barcon' cuich goctequən zi'i.

Goxj barcon'

³⁹Na' catə' gwyeleni' bito
 zjənombi'e yežlyon' gan' besə'əžine'
 pero na' choso'ogüie' de to latjə
 ga žia nisən' žizə na' bade to
 lašə' de'e naquə porzə yox. Nach
 gwsa'aque' tozə par nič žjəche'
 barcon' lašə' lao yoxən'. ⁴⁰Nach
 gosə'əchogue' do che ancla ca'
 na' gosə'əbejyichjga'aque'en lo'o
 nisən'. Nach bosə'oseže' do de'en
 bosə'ocheje' yag de'en chsa' barcon'
 liča na' bosə'olise' lachə' de'en
 zo yichjen' par bžiguə' be'enə' len,
 nach əzja'aque' cho'a nisən'. ⁴¹Pero
 na' jəsə'ədi'e ga chedił nisdə'onə'
 len to de'e yoblə, na' jšo'o laogüen'
 lo'o yoxən' na' caguə goquəch tan.
 Na' nisən' gwzolaə bzožjən xni'einə'
 de'e tant fuers nsə'an. ⁴²Nach
 gwsa'aclašə' soldad ca' so'ote' pres
 ca' nič ni toe' cui yesyə'əxoe' lao
 nisən' na' yosyo'oxonje'. ⁴³Pero
 na' capitannə' gone'ene' yosle'
 Pabən' na' bžone' ca naquən'
 bachsa'aclašə' soldad ca' so'one',
 nach bene' mendad len pres ca' šə
 noe' chac chxoə lao nisən', gwaquə
 lega'acteque' yesyə'əxite'e lao nisən'
 na' yesyə'əchoje' yo biž. ⁴⁴Na' bene'
 mendad de que be'nə' ca' cui chac
 yesə'əxoa lao nisən' yoso'ochine' no
 yagla' o bichlə šinłaz barcon' par
 yesyə'əxoe' lao nisən'. Ca' gwso'one'

na' yogue'e besə'əžine' binlo yo
 bižən'.

De'en goc che Pabən' žlac zoe' Malta

28 Na' catə' beyož bžin
 yoguə'ato' yo bižən'
 gwnezetə' de que latjənə' nzi'in
 Malta na' naquən to yežlyo
 de'en nga'an latə' lo'o nisən'.
²Na' be'nə' ca' ža'anə' mbachgua
 gwso'elaogü'e' neto', bosə'oxene' to
 yi' xen na' gwsa'axe' yoguə'əlołto'
 gan' nite'ena' chedə' bagwzolaə
 yejon' na' chacchgua zag. ³Nach
 Pabən' btobe' xonj xis na' lao
 chcue'en lao yi'inə' bechojczlə to
 beł bia benen lo'inə' na' gwdi'linə'
 ne'ena' xte golə'əditəb. ⁴Na'
 choso'ogüia be'nə' ca' nalə'ədit
 bełən' na' Pabən', nach gwse'e
 ljuežje': —De'e li bengə naque'
 be'nə' güet be'nə'. Bač bele' lao
 nisən' pero na' Diozən' bito cho'e
 latjə əbane'.

⁵Nach bse'esə' ne'ena' lao yi'inə'
 nič bexopə bełən' na' bito bi
 goquene'. ⁶Nach be'nə' ca' bač
 chəsə'əbeze' bat solao gatə' Pabən'
 yi o əbižəcle' to de repentzə
 gate'. Na' ca' gosə'əbeze' sša na'
 choso'ogüie' bito bi bi chaquene'
 nach gwso'one' xbab yoblə
 chəsə'əne' de que naque' to be'nə'
 cheyalə' šejni'alažə'əcho.

⁷Be'nə' blao che doxen Maltan' le'
 Poblío na' de bien che' galə'əzə, na'
 mbachgua be'elaogü'e' neto' na'
 gwzoto' šonə ža len le'. ⁸Na' goquən'
 xa Poblion' de' cam chacšene'
 yo'e de'e la na' che'ine' yiž chen.
 Nach Pabən' gwyo'e gan' de'ena' na'
 beyož bene' orasyon gwxoə ne'ena'
 yichj be'nə' güe'ena' na' beyone' le'.

⁹Beyož bene' ca' yeziquə'əchlə beṇə' ca' ža' latjən' beṇə' chsa'acšene leczə bda'aque' na' beyone' lega'aque'. ¹⁰Na' beṇə' ca' de'e zan de'e gws'o'one' cheto'. Na' catə' bžin ža beza'ato', bosyo'ože'le lo'o barcon' yoguə' de'e ca' chyažjeto'.

Pabən' bžine' Roman'

¹¹Bega'antə' Maltan' šon bio' nach gwza'ato' zjəzdato' lao nisən' yo'oto' to lo'o barcw de'en za' Alejandria de'e gwlezə latjən' mientr gwde de'e zaguən'. Na' mben le'e barcon' lguə'a lsaquə' ca' zjənzi' Castor na' Polocs. ¹²Na' bžinto' gan' ne' Siracosa na' gwzoto' šonə ža. ¹³Na' gozsa'ato' par bžinto' gan' ne' Regio. Na' na' bega'antə' tža. Na' gwzolao chechj be' de'en za' che'elə, na' beteyo bezžinto' ganə' nzi' Poteoli na' na' bechojto' lo'o barcon'. ¹⁴Na' bežagto' beṇə' ljuežjto' ca' chso'onjlilažə' Jesocrstən' Poteoli na' gosə'əṇabe' gwzoto' len lega'aque' to xman. Na' gwdenə' gwza' ni'ato' par zdato' Roman'. ¹⁵Pero na' antslə ze'e žinto' Roman' gosə'əṇeze beṇə' ljuežjto' ca' ža'anə' de que əžinto' na' bedəsə'əleze' neto' latjə gan' nzi' lao ya'a che Apio, na' gan' ne' Šonə Ranš. Na' catə' ble'i Pabən' lega'aque', be'e yełə choxcwlen che Diozən' na' bebeine' lo'o yichjla'ažda'ogü'e'enə'. ¹⁶Na' ca bžinto' Roman' capitannə' bene' pres ca' yełə' lao na' beṇə' gwnabia' che soldad ca', pero na' Pabən' gotə' lsens soe' ca'azə na' gwzo to soldad gwdapə le'.

Pabən' be'e xtižə' Jesocrstən' Roman'

¹⁷Na' goquən' beyon ža Pabən' goxe' beṇə' blaə che beṇə' Izrael

ca' ža' Roman' na' catə' beyož besə'ədobe'ena' gože' lega'aque': —Beṇə' bišə', bito ṇacho bi beṇə' contr beṇə' gwlaž checho ca' o contr costombr che de'e xaxta'ocho ca'. Pero na' Jerosalen na'ate gws'o'one' nada' pres lao na' beṇə' Roma ca'. ¹⁸Na' beṇə' ca' beyož gosə'əṇabyože' gwsa'aclaže'le yoso'osane' nada' chedə' cui bi bi xtołə'a de par əṇacho gata'. ¹⁹Pero na' beṇə' gwlaž ca' ža' Jerosalennə' bos'o'ožoncze' par yoso'osan beṇə' ca' nada'. De'e na'anə' benən byen gwṇaba' tia' lao Sesarən', pero bito ṇacho gua'a part beṇə' gwlaž chia' ca'. ²⁰Na' de'e nin' chac bač goxa' le'e par le'ida' le'e na' par güe'elena' le'e dižə'. Na' chnia' le'e por ni che de'en zocho lez yesyə'əban beṇə' guat ca', bałə beṇə' gwlaž checho ca' gosə'əzene' nada' na' bos'o'ocheje' nada' gden ni.

²¹Nach beṇə' ca' gwse'ene': —Bito bi bi cart ne'e la' laoto' nga de'e za' Jodean' de'e güe' dižə' šə bin' chac len le', na' notono no beṇə' gwlaž ne'e la'ac yesə'əṇe' mal chio' o əsa'ogüe' xya contr le'. ²²Pero na' chaqueto' güenczən' yeneto' go'o dižə' ca' naquən' chono' xbabən', la' neto' nezeto' doxenlə chəsə'əṇe' contr le'e chejle'ele che Jesocrstən'.

²³Na' bos'o'ožie' bia' to ža par žjəsə'əye' le' na' beṇə' zan zjənaque' ja'aque' gan' zo'enə'. Nach Pabən' be'e dižə' len lega'aque' can' chon Diozən' chnabi'e notə'ətezə beṇə' chso'e latjə. Na' bzejni'ine' lega'aque' can' na lei de'en bzoj de'e Moisezən' na' can' na de'en bos'o'ozoj de'e profet ca' beṇə' ca' gws'o' xtižə' Diozən' cana' par nich se'ejle'le che Jeso'osən'. Bedo ža be'e

dižə'an len lɛga'aque'. ²⁴Na' baɭə beɳə'
ca' gwse'ejle'e ca naquə dižə' de'en
be'enə' na' yebale' cabi gwse'ejle'e. ²⁵Na'
ca' chac gwsa'aque' ɕhoplə, na' bazon
yesa'aque' catə' gož Pabən' lɛga'aque':
—De'e li can' gož Spirit ɕhe Diozən' de'e
profet Isaiazən' ben' be' xtižə' Diozən'
cana' gožən le' gwzoje'en par de'e
xaxta'ocho ca', nan:

²⁶Gwyej gož beɳə' gwlaž ɕhio' ca'
de que Diozən' ne':

De'e li yenele pero cabi šejni'ile
bin',

na' de'e li gwle'ile pero cabi
gache'ile bi zejen.

²⁷Cuiczə bi rson chazle.

Bach nažjoczə yichjla'ažda'olen'
na' bito chzenagle dižə' lin',

bito chonle cas chei, na' nic
chejni'ilen, na' ni que
chedinjele xtolə'əle ca'.

Na' de'e na'anə' bito yebeja' le'e
xni'a de'e malən'.

²⁸Na' le'e cheyalə' ənezele de que
ɳa'a par delante Diozən' chsele'e
beɳə' chəsə'əyixjui'e xtižə'enə' len
beɳə' ca' cui zjənaquə beɳə' Izrael
par niɕ yoso'ozenague' ɕhe' na'
yebeje' lɛga'aque' xni'a de'e malən'.

²⁹Beyož gwna Pabən' ca'
besyə'əžaš beɳə' Izrael ca'
chsa'acyože' xte juisy.

³⁰Pero na' Pabən' gwzoe' nya'
ɕhop iz to yo'o ga chyixjue' na'
gwzocze' gwleze' yoguə'əloɭ beɳə'
jəsə'əlanə' le'. ³¹Na' sin cui chaž cui
chžebe' na' sin cui no no əbseyjw
əbžon gwduxjue'ine' lɛga'aque' ca
naquən' chnabia' Diozən' notə'ətezə
beɳə' chso'e latjə, na' clar bsed
blo'ine' lɛga'aque' xtižə' Xancho
Jesocristən'.